

國學基
本叢書

文山先生全集

上



書叢本基學國

集全生先山文

(上)

著祥天文

行發館書印務商

重刻文山先生文集序

吉安舊刻文山先生文集。簡帙龐雜。篇句脫誤。歲久漫漶。幾不可讀。中承德安何公遷來撫江右。旣出素所養者。布之教令。復表章列郡先哲。以風厲士人。會郡守浦江張公元諭始至。卽舉屬之。張公手自編緝。釐類剔訛。出羨帑。選良梓。刻將半。致中丞之命於洪先。俾序所以校刻之意。嘗觀孟子論北宮黝孟施舍之養勇。而有感焉。彼其不挫與無懼者。若詛盟而要結之。終其身不可解也。夫二子憑氣者也。猶有爲之所者。以主於中。矧其進於是者耶。洪先於是反覆先生之事。取證其詩與書。因得其平生之詳而論之。始先生弱冠及第。憂歸。四年。授京兆幕。而邊遽起。董奄力主和議。首應詔數其罪。乞斬之。以安社稷。且自罷免。旣改洪州。復自罷。尋用故事。以館職召進刑部郎。而董奄復用。又上疏求罷。自知瑞州。轉江西提刑。爲臺臣論罷。後兼學士。爲福建提刑。卽又連論罷。如江西。已而權學士院。草制忤賈似道。嗾臺臣劾之。罷其少監。及除湖南運判。又論罷之。遂引錢若水例致仕去。當是時。年纔三十七耳。當其甫入朝著。非有兵革艱大之委。而國事它屬。又無臺諫糾刺之權。其言與否。宜未有訾及者。乃不能一日稍待。何哉。人之遭蹉跌者。往往回顧而改步。三已不愠。古人難之。今罷而仕。仕而復罷。經歷摧創。至于六七。志愈堅。氣愈烈。曾一不以自悔。此其中必有爲之所者矣。且自始進而遽早休。當盛年而甘退處。目爲猖狂而不辭。置之危

地而不改。彼非異人之情也。亦曰爲世道計。吾之心未能已也。與吾相持而不使其直遂者。勢也。吾屈勢而違心耶。亦求以自盡耶。是故事寧無成。不取隱忍以諱言。言寧不用。不能觀望以全身。身寧終廢。不欲玩愒以充位。其必爲此不爲彼。決絕審固於死生之間。秋毫無所皇惑。是先生之平生也。今觀其文辭。矯乎如雲鴻之出風塵。汎乎如渚鷗之忘機械。凜乎如匣劍之蘊鋒芒。至於陳告敷宣。肝膽畢露。旁引廣喻。曲盡事情。則又沛乎如長江大河。百折東下。莫有當其騰迅者。此豈一朝一夕之故。偶得之者哉。及其灑泣入衛。捐家餉軍。流離顛頓。出萬死一生。以圖興復。力既不支。猶以拘囚之餘。從容燕市。收三百年養士之功跡。愈久而聲光不滅。使天下後世。曉然知有人臣之義。莫不以爲處死之難。古今未若是烈者。不知其屢罷而不悔。爲之者誠豫也。使幸而不值其變。則處死者。人必不聞。不幸而聞於人。人且歎其難矣。或擬之憑氣。而莫能原其所以爲心。使先生平生所養。卒不暴白於天下後世。是尙爲知論世矣乎。夫不幸非人所常值也。值其幸而能自盡。則亦何至於屢罷。夫惟求自盡。而不免屢罷。則知決絕審固於死生之間。蓋有大不得已。而非先生所願明矣。非所願而必豫爲之所。逆知其不免。而未嘗少動。古之知所養者。蓋如此。有世道之責者。其思有以豫待之哉。洪先生先生之鄉。想慕其平生。設以身處。而深有感於養氣之說。因序集而并著之。嗚呼。使人人皆知所養。不徒仰嘆先生之難。將於世道必重有賴。二公風厲之意。至是效矣。

嘉靖三十九年庚申二月望後學吉水羅洪先頓首謹書

文山先生全集

重刻文山先生文集序

文山先生全集目錄

羅序

卷一文集

詩

次鹿鳴宴詩

明堂慶成恭進詩

祕省再會次韻

題卓大著順寧精舍

和朱衡守約山韻

送朱制幹象祖

司戶弟生日

題陳國秀小園

贈閻丘相士

贈秋月相士

集英殿賜進士及第恭謝詩

敬和道山堂慶瞻御書

送曹大著知廣德軍

送卓大著知漳州

題玄潭觀雪浪閣

送林溶孫歸省

梅

題靜山

贈神目相士

贈曾蘭谷相士

御賜瓊林宴恭和詩

劉左司餞潘祕丞次韻

贈祕書王監丞

和蕭安撫送行韻

玄潭觀和龔宰韻

京城借永福寺

暑布送王廷舉

贈拆字嗅衣相士

贈鏡湖相士

贈月洲相士

贈劉矮跛相士

贈徐相士

贈桂巖相士

贈彭別峯

贈葉大明

贈劉忠樸

贈涂內明

贈曾一軒

贈魏山人

贈適菴

象弈等級四絕

贈蕭文彬

贈羅雪厓

題王聲甫松坡苦唱

贈梅谷相士

贈鑑湖相士

宣州罷任再贈

贈黃生

贈舒片雲

贈金稱

贈一壺天

贈龔豫軒

贈廖希說

贈劉可軒

贈彭善之

題周山甫錦繡段

題得魚集

題毛霆甫詩集

贈碧眼相士

贈趙神眼

贛州再贈

贈楊樵隱

贈彭神機

贈余月心

贈蕭巽齋

贈徐吉甫

彭通伯衛和堂

慧和尚

贈曹大崧

還梅尉詩軸

題彭小林詩

送趙王賓

又送前人琴棋書畫

題羅道士玉澗

聽羅道士琴

和雲屋道士

遊集靈觀

題凝祥觀

遊青源

題碧落堂

和龔使君

餞新班弟

別弟赴新昌

送劉民章

題宣州疊嶂樓

題宣州覽翠堂

登雙溪閣

題吳城山

貧女吟

名姝吟

東方有一士

和故人

賦吉州隆慶寺塔火

寄故人劉方齋

題高君寶紺泉

題曾氏連理木

題滕王閣

題黃岡寺

龍霧洲覺海寺

題積學齋

題八窻玲瓏

予鄧峒

題六梅亭

卷二文集

詩樂府并
詞附

文山卽事

出山

關山寄朱約山

山中卽事

宿山中

山中

山中謾成柬劉方齋

山中載酒

山中立夏

山中和韻

山中自賦

入山卽事

山中感興三首

山中呈聶心遠

再用前韻

山中六言三首

用蕭敬夫韻

山中

竹花

夜歸

八月十六日見梅

和蕭秋屋韻

月夜

江行

紙帳

爲劉定伯索油蘼

山中小集

新年

生日和聶吉甫

生日和謝愛山

生日謝朱約山

生日和蕭敬夫

與朱古平飲山中

所懷

山中偶成

次約山杏花韻

贈黃梅峯

送人往湖南

題張景召梅墅

和謝愛山

別謝愛山

和胡琴窻

七月十三夜

病中作

又二絕

又賦

又賦

借道冠

又賦

病甚夢至帝所

病愈簡劉小村

夜坐偶成

簡琴窻雲屋竹軒諸友

用前韻留琴窻

又用韻簡李深之

早起偶成

又用韻

曉起

夜坐

和朱松坡

陳貫道浩浩歌

借朱約山韻

用前人韻賦招隱

用前人韻招山行

翰林權直罷歸

慶羅氏祖母百歲

拜羅氏百歲母

醉清湖

羅山長存叟來

壽朱約山八十

壽朱約山八十三

賀巽齋遷居

挽李制帥

挽孫庸齋

挽龔用和

挽万丞監

哭彭止所

挽吳西林

挽晏桂山

挽鄒晉叔

挽王遠叔

挽蕭帥機

挽朱尙書

挽朱太博

挽黎致政

壽江古心

送張宗甫兄弟

送胡端逸

題楚樓觀

別宋安序

贈周東卿畫魚

別李肯齋

幕客舟中序別

用韻謝諸客

湘潭道中贈了相士

別徐暎

和宋安序送行

贈萍鄉道士

白髭行

將母赴贛道西昌

快閣遇雨觀瀾

題鬱孤臺

用韻別五湖翁

用韻謝前人

翠玉樓晚雨

翠玉樓觀雪

翠玉樓和胡端逸

翠玉樓

合江樓

皂蓋樓

石樓

馬祖巖

禪關

吸江

塵外

雲端

清江何漢英

送曹巖山

和前人賦別

贈蕭信叔

贈碧鑑和士

送吉州陳守

贈鍾正甫

改題凝祥觀

題倪氏山水圖歌

山中次胡德昭韻

山中泛舟

病中作

山中卽事

挽巽齋先生

送劉其發

贈周蒼厓

題竹巖摘藁

挽劉知縣

古樂府壽人母

齊天樂

齊天樂

卷三文集

對策 封事 內制

御試策題

己未上皇帝書

癸亥上皇帝書

輪對劄子

擬進御筆

又擬

擬册立皇太子文

卷四文集

表牋

門謝表

湖南提刑到任謝表

謝皇太后表

謝皇后牋

皇太子生日賀皇帝表

賀皇太后表

賀皇后牋

皇子進封賀皇帝表

賀皇太后表

賀皇后牋

皇女進封賀皇帝表

賀皇太后表

賀皇后牋

知贛州到任謝表

謝皇太后表

謝皇后牋

壽崇節本州賀皇帝表

賀皇太后表

賀皇后牋

壽崇節兵馬鈐轄賀表

賀皇太后表

賀皇后牋

乾會節本州賀皇帝表

賀皇太后表

賀皇后牋

乾會節鈐司賀皇帝表

賀皇太后表

賀皇后牋

皇子賜名本州賀皇帝表

賀皇太后表

賀皇后牋

皇子賜名鈐司賀皇帝表

賀皇太后表

賀皇后牋

皇帝登寶位本州賀表

賀太皇太后表

賀皇太后表

皇帝登寶位鈐司賀表

賀太皇太后表

賀皇太后表

謝皇帝登極赦文表

太皇太后加尊號本州賀表

賀太皇太后表

賀皇太后表

太皇太后加尊號鈐司賀表

賀太皇太后表

賀皇太后表

皇太后加尊號本州賀表

賀太皇太后表

賀皇太后表

皇太后加號鈐司賀皇帝表

賀太皇太后表

賀皇太后表

大行皇帝升遐本州慰皇帝

表

大行皇帝升遐鈐司慰皇帝表

慰太皇太后表

慰皇太后表

百日慰皇帝表

慰太皇太后表

慰皇太后表

期年慰皇帝表

慰太皇太后表

慰皇太后表

再期慰皇帝表

慰太皇太后表

慰皇太后表

禫祭慰皇帝表

慰太皇太后表

慰皇太后表

賀皇帝聽政表

賀太皇太后同聽政表

天瑞節本州賀皇帝表

賀太皇太后表

賀皇太后表

天瑞節鈐司賀皇帝表

賀太皇太后表

賀皇太后表

大行皇帝諡號本州慰表

慰太皇太后表

慰皇太后表

大行皇帝諡號鈐司慰表

慰太皇太后表

慰皇太后表

冬至節本州慰皇帝表

慰太皇太后表

慰皇太后表

啓殯慰皇帝表

慰太皇太后表

慰皇太后表

發引慰皇帝表

慰太皇太后表

慰皇太后表

祔廟慰皇帝表

慰太皇太后表

慰皇太后表

正旦慰皇帝表

慰太皇太后表

慰皇太后表

改元賀皇帝表

賀太皇太后表

賀皇太后表

曆日謝皇帝表

謝太皇太后表

謝皇太后表

疏

壽崇節本州進功德疏

鈴司進功德疏

乾會節本州進功德疏

鈴司進功德疏

天瑞節本州進功德疏

鈴司進功德疏

大行皇帝升遐本州進功德疏

鈴司進功德疏

皇帝違和保安諸廟疏

本州宮寺保安疏

鈴司宮寺保安僧疏

道疏

大行皇帝遺詔本州成服道疏

僧疏

鈴司成服道疏

僧疏

本州成服滿散疏

鈴司成服滿散疏

大行皇帝本州追嚴道場疏

鈴司追嚴道場疏

申省狀

辭免新除祕書省正字狀

再狀

辭免知寧國府狀

卷五文集

書

回胡僉判請交割

賀吳提舉

回聶吉甫

賀何縣尉

上丞相

通廟堂

通江參政

通潭州安撫江丞相

與李復卿

與孫子載

與胡觀洲

與楊學錄

回巽齋先生

與前人

又

回劉架閣會孟

回曾衢教

回李宮教

與朱大博

回鄧縣尉

與顏縣尉

與聶吉甫

回王國智

與劉司戶

與胡端逸

與黃主簿

與劉正伯

回鍾叔玉

與黎節判

與劉民章

與梅制幹

與杜教授

回謝教授

與劉知縣

與李知縣

與陳知縣

回唐知縣

回劉運使

與袁守雷侍郎

與知贛州翁丹山

賀翁丹山兼憲

賀方逢辰

賀前人除江西漕

回許祕丞

賀倪提舉

與趙月山

與知吉州江萬頃

賀知吉州黃提舉

與前人

賀楊提刑

與知吉州繆知府

回吉州竇檢閱

回江州李都丞

回潘檢閱

回鍾編校

回吳制帥

回宣州洪倅

回吳直閣

與游提刑

與趙知郡

賀前人得盱守

與趙監丞

慰前人

回安福趙宰

回孟之縉

卷六文集

書

回寧國陳節推

與吳提刑

與陳提舉

回林學士

回贛守李宗丞

回李宗丞

與江西黃提刑

回林司業

回信豐羅宰

與前人

回羅子遠

與汪安撫

回前人

與胡都丞

慰胡通判

與李大卿

回永州楊守

回林侍郎

回楊祕監

與劉尙書

與陳察院

與鄧校勘

與陳直院

與曾縣尉

與曾架閣

回吉守王提舉

與龔知縣

與許權縣

賀劉敬德

賀鍾有謙

與周德甫

與文侍郎及翁

與楊大卿

與趙戶部

與陳侍郎

與宋衡州

與錢運使

與曹提刑

回汀州陳守

與趙大卿

與江西趙倉

與吉州劉守

回吉州趙倅

回袁州鄒倅

回臨江婁倅

回隆興熊倅

與楊縣尉

回唐書記

回黃強立

回文教

與胡節推

繳奏藁上中書札子

賀江端明

與前人

與吉守李寺丞

回曹提刑

回陳侍郎

與湖南廖提刑

與安撫李大卿

與吉州劉漢傳

回李端明

回岳縣尉

與洪端明

與贛州屬縣宰

回袁永州

賀曾尙書

回曾知縣

回曾連推

回李本中

回傅縣尉

卷七文集

啓

上權郡陳通判

上倉守李愛梅

賀吳丞相

謝吳丞相

謝丞相

謝皮樞密

謝何樞密

謝江樞密

賀江左相

賀馬右相

通章簽書

賀趙編脩

回瑞州羅權府

餽朱約山

回彭知縣

回胡宣教

送章主簿

賀前人

通交代李樓峯

賀化地冬

賀參政正

回前人送禮

回前人送九日禮

回前人送冬酒

回前人送春

回前人

回吉州繆守

回前人餽歲

回太和趙宰

回蕭子倉

回廬陵趙簿

賀劉省元

賀前人

賀化地正

賀江丞相

謝江丞相宴

賀前人冬

賀前人正

賀前人赴召

送前人七夕

回朱約山

回前人賀生日

回太和趙尉

賀朱太博

回吉州陳守

迎交代孟知府

又賀生日

賀簽書冬

賀前人除特進

送前人九日禮

送前人折筵

送前人酒

通羅提舉

請前人宴

回前人折筵

請前人九日宴

送前人折筵

通董提舉

回前人到狀

迎前人

送前人洗拂

回前人送私覲

謝前人招宴

送前人新除禮

送前人折俎

回前人中秋請宴

回前人折俎

回前人送酒

賀前人冬

又送冬至酒

送前人歲節酒

賀前人正

回前人送春

得贛送前人禮

回前人請宴

送前人折俎

回前人送酒折俎

賀宋吏部

回前人到任狀

請前人到任宴

送前人洗拂

謝前人招宴

送前人特會折俎

回前人送物

回前人賀雪

回前人餽歲

謝前人折俎

送前人折俎

回前人賀正

回前人請宴

請前人宴

回前人請聚宴

回宋衡袖請宴

請前人宴

請前人別會

回前人請

謝送禮物

通胡都丞

回楊祕監

卷八文集

啓

通丁侍郎

通楊提刑

回李安撫

回前人賀遷秩

送前人冬

賀前人冬

餽前人歲

賀前人正

送前人元宵

賀前人納子婦

送前人別會

謝章簽書

謝高尚書

謝陳尙書

謝陳正言

謝陳侍郎

賀曹尙書

賀劉尙書

賀趙侍郎

賀汪制帥

迎李經略狀

請廣帥會

折送諸監司

回朱帥參

回劉志叔

回葉茶場

賀桂陽劉守

賀寶慶王守

賀道州王守

賀永州袁守

回前人

請雷州虞守

送前人別禮

回諸郡守冬

回諸郡送年酒

回諸郡賀年

送徐權府折俎

回前人請宴折俎

回前人送轉官折俎

回前人送冬

回柯權郡

回前人賀得贖

回李潭倅

回諸郡倅賀冬

回諸郡倅賀正

回諸簽幕賀冬

回諸司諸郡幕賀正

回施帥

回洪準

回趙檢法

回諸郡教官賀冬

回諸郡教官送別

回桂陽劉教授

回林教授

回張教授

回胡山長

回邢山長

回衡州江判官

回趙判官

回郭判官

回陳撫屬張監倉

回黎知錄李司理

回永州司戶

回謝司法

回諸縣宰賀冬

回諸縣宰賀正

回衡山趙宰

回善化韓宰

回鄂縣爰宰

回攸縣郭宰

回湘潭張權縣

回永興趙權縣

回瀏陽任丞

回寧遠簿到任

回澧縣趙簿衡陽易尉

回衡陽歐陽尉

回楊料院

回宋稅院

回劉學錄

通交代廖提刑

與袁州安守

回袁守不赴請

回交代孫提刑

回陳侍郎

賀會京尹

回曾主簿

回吉州權府

回李寺丞

回前人

回前人送冬禮

回黃主簿

回錢監魁

賀府簿

回大庾縣尉

卷九文集

記

吉州州學貢士莊記

吉州右院獄空記

龍泉縣梓潼祠記

文山觀大水記

鄒文叔垂芳堂記

李氏族譜亭記

蕭氏梅亭記

衡州耒陽縣進士題名記

撫州樂安縣進士題名記

瑞州三賢堂記

建昌軍青雲莊記

贛州趙清獻祠堂記

贛州嘉濟廟記

贛州興國縣安湖書院記

道林寺衍六堂記

五色賦記

衡州上元記

雷州十賢堂記

雷州重建譙樓記

序

孫容菴甲藁序

危恕齋論序

金匱歌序

張宗甫木雞集序

趙維城洗冤錄序

龔知縣帥正錄序

蕭叢夫采若集序

羅主簿一鸚詩序

曾季輔杜詩句外序

忠孝提綱序

八韻關鍵序

壬戌童科小錄序

題家保狀序

又家保狀序

曾叔仁義約籍序

送隆興鄒道士序

送彭叔英序

送王山立序

與山人黎端吉序

贈林梅所序

送項巽可入南序

送賴伯玉入贛序

送李秀實序

送彭和父游學序

贈談命朱斗南序

又贈朱斗南序

贈曹子政劍客序

贈山人黃煥甫序

贈黃璘翠微序

贈仰巔峯序

送僧了敬序

吉水縣永昌鄉義役序

燕氏族譜序

龍泉縣鄉舉題名引

卷十文集

題跋

題先人遺墨後

跋曾子美萬言書藁

跋李景春萬言書藁

跋劉翠微罪言藁

跋繆上舍論丁大全詞案

跋歐陽公與子帖

跋胡景夫書堂字

跋呂逢德收平園文字

跋誠齋錦江文藁

跋崔丞相帖

跋李世脩藏累科狀元帖

跋李龍庚殿策

跋王元高詞科擬藁

跋呂元吉先人介軒記後

跋周蒼厓南嶽六圖

跋李孟博東山夢境圖

跋周一愚負母圖

題陳尙書雲萍錄

題劉左史雲萍錄

跋辛龍泉行狀

跋蕭敬夫詩藁

跋李敬則樵唱藁

跋劉玉窗詩文

跋周汝明白鳴集

跋胡琴窗詩卷

跋趙靜齋詩卷

跋王道州仙麓詩卷

題勿齋曾魯詩藁

跋惠上人詩卷

跋婁道士詩卷

跋彭道士虛碧房

跋番禺徐應明梯雲帙

跋王邦立藏元祐關書

跋賈端老不忘室

題張德從畏心堂

題戴行可進學齋

跋周應可千藥物日子後

跋彭和甫族譜

跋吳氏族譜

跋楊宰連理木

跋彭叔英談命錄

跋王金斗談命錄

跋劉季文畫像

跋李氏譜

贊

巽齋先生像贊

贊龔知縣龍

贊程縣丞龍

贊何了翁帳龍

贊三山莊之龍魁星

贊沈俊之筆

自贊

銘

彭叔英砥齋銘

黃山人羅鏡銘

辭

劉良臣母哀辭

贈蕭才夫談命

鄒翠屏改葬哀辭

吳伯海滄浪歌辭

說

答歐陽秘書承心制說

吳郎中山泉說

徐應明恕齋說

勉耘說

何晞程名說

王通孫名說

陳逢春肖軒說

送呂元吉麥舟說

龍泉縣修橋說

葉校勘社倉說

與濟和尙西極說

慧和尙說

深衣吉凶通服說

卷十一文集

講義

西澗書院釋菜講義

熙明殿進講義

行實

先君子革齋先生事實

知潮州東巖洪公行狀

墓誌銘

知韶州劉容齋墓誌銘

義陽逸叟曾公墓誌銘

羅母墓誌銘

鄒月近墓誌銘

羅融齋墓誌銘

樂菴老人墓誌銘

劉定伯墓誌銘

鄒仲翔墓誌銘

文山先生全集 目錄

徐溪莊墓誌銘

蕭明允墓誌銘

蕭從事墓誌銘

祭文

祭歐陽巽齋

祭胡石壁

祭郭正言

祭道州徐守

祭鄒主簿

祭彭秘書

祭安撫蕭

祝文

過家告廟文

代富川酌魁星文

代酌解星文

卷十二文集

樂語

宴交代寧國孟知府致語

宴交代湖南李運使致語

宴朱衡守致語

宴湖南董提舉致語

宴交代權贛州孫提刑致語

又宴前人致語

上梁文

山中堂屋上梁文

山中廳屋上梁文

代曾衢教秀峯上梁文

公牘

與湖南大帥論秦寇劄子

大使司回

提刑節制司與安撫司循環曆

大使司回

文判

宣州勸農文

湖南憲司隆冬疎決批牌判

斷配典吏侯必隆判

審問楊小三死事批牌判

平反楊小三死事判

門示茶陵周上舍爲訴劉權

縣事判

卷十三

指南錄

自序

後序

赴闕

所懷

自嘆

鐵錯

和言字韻

愧古人

求客

紀事

紀事

紀事

信雲父

則堂

思蒲塘

思方將軍

峻都

二王

氣槩

使北

杜架閣

聞雞

命裏

留遠亭

平江府

無錫

吊五木

哭尹玉

常州

鎮江

渡瓜洲

弔戰場

回京口

思小村

沈頤家

脫京口

定計難

謀人難

踏路難

得船難

給北難

定變難

出門難

出巷難

出隘難

候船難

上江難

得風難

望城難

上岸難

入城難

眞州雜賦

天下趙

議糾合兩淮復興

出眞州

至楊州

賈家庄

楊州地分官

思則堂先生

高沙道中

至高沙

泰州

懷則堂實堂

卽事

卽事

如臯

懷楊通州

石港

北海口

楊子江

過楊子江心

亂礁洋

過黃巖

和自山

文山先生全集

目錄

發高沙

卜神

貴卿

紀閑

發海陵

聞諜

海船

賣魚灣

出海

使風

入浙東

夜走

至温州

林附祖

稽莊卽事

旅懷

憶大夫人

聲苦

聞馬

哭金路分

發通州

卽事

漁舟

蘇州洋

夜潮

綠漪堂

長溪道中和張自山韻

呈小村

二月晦

有感呈景山校書諸丈

卽事

所懷

自嘆

題蘇武忠節圖有序

卷十四

指南後錄

過零丁洋

元夕

懷趙清逸

二月六日海上大戰

又六噫

言志

南海

有感

張元帥謂予國已亡矣殺身

以忠誰復書之予謂商非不亡夷齊自不食周粟人臣自盡其心豈論書與不書張爲改容因成

一詩

登樓

海上

贛州

出廣州第一宿

英德道中

晚渡

珊瑚吟

和中甫端午韻不依次

又呈中齋

又

竹間

越王臺

南華山

南安軍

黃金市

萬安縣

秦和

蒼然亭

別里中諸友

發吉州

臨江軍

隆興府

湖口

安慶府

池州

魯港

采石

建康

金陵驛

懷忠襄

早秋

睡起

中秋

南康軍和東坡酌江月

和中齋韻

再和

和友人

驛中言別友人

和

懷中甫

行宮

廣齋謂柳和王昭儀滿江紅韻惜未之見爲賦一闕

和王夫人滿江紅韻以庶幾

后山妾薄命之意

代王夫人作

王夫人詞

浪淘沙

東海集序

送行中齋三首

發建康

江行有感

眞州驛

望楊州

維楊驛

過邵伯鎮

高郵懷舊

發高郵

寶應道中

淮安軍

小清口

崔鎮驛

中原

彭城行

發彭城

固陵道中

遠遊

新濟州

自汝陽至鄆

發東阿

發陵州

河間

樓桑

過淮河宿闕石有感

桃源道中

發崔鎮

望邳州

燕子樓

沛歌

發魚臺

六歌

汶陽道中

來平館

宿高唐州

獻州道中

保州道中

涿鹿

發淮安

桃源縣

發宿遷縣

徐州道中

戲馬臺

歌風臺

自歎

發潭口

汶陽館

發鄆州喜晴

平原

滹沱河二首

趙太祖墓

過梁門

白溝河

懷孔明

劉琨

祖逖

顏杲卿

許遠

過雪橋過琉璃橋

五月二日生朝

胡笳曲

上巳

寒食

覽鏡

讀赤壁賦

自歎

端午初度

端午卽事

自述二首

五月十七夜大雨歌

先太師忌日

築房子歌

有感

正氣歌

七月二日大雨歌

詠懷

偶成

移司卽事

不睡

宮籍監

還司卽事

夜起二絕

還獄

偶賦

讀杜詩

感懷二首

先兩國初忌

重陽

又三絕

夜

雨雪

偶成

得兒女消息

爲或人賦

世事

新薦

小年

除夜

壬午

生日

端午

自歎

病目

有感

早起

贈許柏溪淮

卷十五

吟嘯集

生朝

西瓜吟

足石三峯詩

蚤秋

寄惠州弟

感傷

自歎

虎頭山

高沙道中

戰場

哭崖山

上塚吟

墓無主墓碑

邳州哭母小祥

哭母大祥

哭妻文

先太師忌日

告先太師墓文

罹狴犴有感而賦一十七首

和夷齊西山謠

又從而歌之

十二月二十日作

二十四日

立春

遇靈陽子談道贈以詩

歲祝犁單闕月赤奮若日焉逢涪灘遇異人指示以大光明正

法於是死生脫然若遺矣作五言八句

己卯歲除

元日

庚辰四十五歲

感興

正月十三日

上元懷舊

讀史

感傷

遣興

又

四月八日

夜起

端午感興三首

見艾有感

自歎

自遣

自述

不睡

七夕

有感

聞季萬至

有感

感懷

重陽三首

己卯十月一日予入燕城歲月冉冉忽復周星而予猶未得死也因賦八句

己卯十月五日予入燕獄今三十有六句感興一首

去年十月九日余至燕城今

周星不報爲賦長句

冬至

冬晴

自歎

戊寅臘月二十日空坑敗被執于今二周年矣感懷八句

所懷

除夜二首

元日二首

初六日卽事

人日

自歎

元夕二首

卷十六

集杜詩

自序

社稷

理宗度宗

誤國權臣

瀘州大將

襄陽

荆湖諸戍

黃州

陽羅堡

京湖宣闡

渡江

鄂州

江州

安慶府

魯港之遁

建康府

相陳宜中

召張世傑

鎮江之戰

將相棄國

京城二首

陵寢二首

江陵

淮西帥

揚州

京湖兩淮

景炎擁立

福安府

幸海道

景炎賓天

祥興登極

祥興七首

陳宜中

張世傑二首

蘇劉義

魯淵子

江丞相萬里

趙倅昂發

將軍王安節

李安撫芾

李制置庭芝

姜都統才

張制置珪

陸樞密秀夫

勤王

蘇州

拜相

出使

發京師

去鎮江

至真州

行淮東

自淮歸浙東

至福安

福安宰相

南劍州督

汀州

梅州

贛州

江西二首

復入廣

駐惠境

駐潮陽

同府之敗

行府之敗

南海二首

至廣州

至南安軍

過章貢

至吉州

吉州二首

過臨江

過隆興

江行五首

北行六首

至燕城三首

入獄六首

懷舊五首

金應

張雲

劉欽貢元

呂武

鞏宣使信

張秘撰汁

繆朝宗

閩三士

諸幕客

趙太監時賞

劉沐

孫櫟

彭司令震龍

蕭從事叟夫

蕭架閣

陳督幹

陳少卿

鄒處置二首

劉監簿二首

蕭資

杜大卿澣二首

徐榛

林檢院琦

曾先生

鄧禮部

家樞密鉉翁

墳墓

宗族

母

舅

妻

二女

次子

妻子三首

長妹

長子

二女

弟四首

次妹

思故鄉七首

雜然寫其本心二十九首

歎世道九首

卷十七

紀年錄

卷十八

拾遺

與方伯公書

正月書

齊魏兩國夫人行實

遺墨

遺像

卷十九

附錄

文天祥傳

宋史

文丞相傳

劉岳申

丞相傳

胡廣

文丞相督府忠義傳

鄧光薦

卷二十

文山先生全集

目錄

附錄

- | | | | |
|---------|-----|------------|-----|
| 生祭文丞相文 | 王炎午 | 望祭文丞相文 | 前人 |
| 文丞相祠重修記 | 楊士奇 | 宋丞相文信國公祠堂記 | 羅倫 |
| 墓田記 | 羅元泰 | 文信國公祠堂祭田記 | 彭序 |
| 重修富田祠堂記 | 羅洪先 | 文丞相傳序 | 許有壬 |
| 文山先生文集序 | 韓雍 | 文山文別集序 | 王守仁 |
| 文山先生全集序 | 鄢懋卿 | 文山舊隱祠記 | 王育仁 |
| 跋文山先生遺墨 | 蘇伯衡 | 文丞相像贊 | 孫燧 |
| 浮丘道人招魂歌 | 汪水雲 | 哭文丞相詩 | 虞伯生 |

文山先生全集卷之一

詩

次鹿鳴宴詩

時提舉知郡李愛梅
迪舉送弟璧同薦

禮樂皇皇使者行。光華分似及鄉英。貞元虎榜雖聯捷。司隸龍門幸綴名。二宋高科猶易事。兩蘇清節乃真榮。囊書自負應如此。肯遜當年禰正平。

集英殿賜進士及第恭謝詩

於皇天子自乘龍。三十三年此道中。悠遠直參天地化。昇平奚羨帝王功。但堅聖志持常久。須使生民見泰通。第一臚傳新渥重。報恩惟有厲清忠。

御賜瓊林宴恭和詩

壬戌以祕書
省官南宴

奉詔新彈入仕冠。重來軒陛望天顏。雲呈五色符旗蓋。露立千官雜珮環。燕席巧臨牛女節。鸞章光映璧奎間。獻詩陳雅愚臣事。况見賡歌氣象還。

明堂慶成恭進詩

於皇藝祖德乘乾。聖主宣光奕葉前。運再庚申皇建極。祀同癸亥數參天。中嚴外辨三千禮。累治重熙四

十年願贊帝心長對越。至忱功用貫垓埏。

敬和道山堂慶瞻御書韻

墨灑天奎映籀紅。斯堂殿閣與俱隆。方壺圓嶠神仙宅。溫洛榮河造化工。列聖文章千載重。諸孫聲氣一時同。著庭更有邦人筆。稽首承休學二忠。著作之庭乃胡忠簡公書周文忠公立

次韻劉左司前以著作郎主祕書省營繕事時落成適潘祕丞得郡構李并餞行有詩

蓬壺日月四時春。金碧新來絢帝宸。俎豆幸陪麟省雋。衣冠中有虎符新。詩餘和氣生談麈。坐久風光入醉茵。多謝蘭臺舊盟主。好歸羣玉領儒珍。

祕省再會次韻

蓬萊春宴聚文星。多荷君恩錫百朋。四座衣冠陪賀監。一時梁棟盛吳興。圖書光動青藜杖。人物溫如玉升。好是木天新境界。螢窻容我種金燈。古玉升見隋律曆志

送曹大著知廣德軍

暫屈瀛洲客。來臨汭水民。山川歸史記。岳牧屬詞人。館舍朋簪舊。都門祖帳新。儒林官可紀。何止吏稱循。

贈祕書王監丞

君不見祕書外監賀放翁。鏡湖一曲高淸風。又不見太子師傅兩疏氏。東門祖帳羅羣公。人生晚節良不

易。頽波直下誰障東。使人知有在我者。二三君子爲有功。我公金華山下住。赤松安期白雲處。風骨細瘦真神仙。急流勇退不肯顧。我昔山中想風采。幾回擊節歸田疏。適來追陪水蒼佩。親見辭歸白雲路。御筆擢公領蓬山。師表玉立東宮官。兩年苦口一去字。未許鷗鷺從公閑。瑤池深深鎖策府。玉皇宮闕僑其間。暫分赤符管下界。半空雲氣常往還。多少持麾辭上國。悠悠風塵見此客。莫作尋常太守看。疏賀以來偉人物。夜瞻婺女次舍中。一點光明射南極。公歸眠食重調護。世道尙憑公氣力。

贈莆陽卓大著順寧精舍三十韻

人生天地間。一死非細事。識破此條貫。八九分地位。趙岐圖壽藏。杜牧擬墓志。祭文潛自撰。荷鍾伶常醉。此等蛻浮生。見解已不易。齊物逍遙游。大抵蒙莊意。聖門有大法。學者必孔自。知生未了了。未到知死地。原始則返終。終始本一致。後來得西銘。精蘊發洩泗。吾體天地塞。吾氣天地帥。一節非踐形。終身莫繼志。舜功禹顧養。參全穎錫類。伯奇令無違。申生恭不貳。聖賢當其生。無日不惴惴。彼豈不大觀。何苦勤與寐。吾順苟不虧。吾寧始無愧。人而有所忝。曠達未足智。卓哉居士翁。方心不妾媚。蒙讓以去國。七年無怨懟。風雨三間茅。松楸接蒼翠。斯丘亦樂哉。未老先位置。宇宙如許大。豈以爲敝屣。當其歸去來。致命聊自遂。天之生賢才。初意豈無爲。民胞物同與。何莫非己累。君方仕于朝。名高貴所萃。乾坤父母身。方來日川至。西銘一篇書。順事爲大義。請君觀我生。姑置末四字。

送卓大著知漳州

蓬山隔風雨。芸觀司陽秋。厭作承明直。出爲漳浦遊。問俗便桑梓。過家拜松楸。錦堂事相儷。棠舍陰易留。何來瀾蠡間。何物輒負舟。翻覆十年事。行止隨坎流。倘來豈不再。遲取終無尤。太守執此往。邦人庶其瘳。昔予援西銘。期子以前脩。願覲弘濟學。四海放一舟。

陸氏登三閣。源明出一麾。清聲光漳浦。便道拜長基。赤子歌來暮。同寅賦去思。西銘功用大。圻驗順寧詩。

大陸登三閣。源明出一麾。臨軒親策後。上冢過家時。秋色吳山外。春風漳水涯。斯文交獨厚。羞賦送行詩。此初詩也。不及用。今附見此。

和蕭安撫平林送行韻。逢辰字應父。樞密檢詳。江西安撫。

得失元來付塞翁。何心桃李問東風。人皆有喜榮三仕。我尙無文謝五窮。秘苑固知朋可正。畏途猶恐甲方夷。欲酬長者殷勤祝。坎止流行學四忠。

和朱衡守約山韻。澗字行父。大理寺丞。

昔人一出正朋字。今我慚非行祕書。人樣相看願元祐。詩章甚雅突黃初。競言汲黯猶須復。或謂顏愚亦可如。把酒對花姑勿論。春行後長莫妨徐。

題玄潭觀雪浪閣用誠齋韻

棄官學道勾山許。學到至人本無怒。赤子臍臍如魚頭。不堪妖孽腥上流。鉗鍵長潭鐵樹立。摩挲穹石寶劍濕。當時豈忍如是觀。毒流不可開眼看。英風凜凜萬古寒。

玄潭觀和龔宰韻

晉代何曾谷此陵。到今樓觀隱居亭。幻成鷗鷺乾坤闊。陶盡魚龍雲水腥。仙有神功參造化。人將故事入丹青。我來欲去長橋孽。祠下徘徊夜乞靈。

送朱制幹象祖

一官聲漫任如何。屢疏賤天氣不磨。宋祚萬年陳大計。周圖五字訂前訛。重尋范老憂時箸。旁豎文公衛道戈。投匭近年殊不少。有人說似此君麼。

送三山林溶孫歸省

束書遊京師。孤雲瞻太行。辭歸慕何蕃。捨養殊歐陽。山林乾坤靜。菽水日月長。好味諸公詩。勝讀寒泉章。

京城借永福寺漆臺口占似王城山翁

名孟孫字長翁後太常丞

心如明鏡臺。此言出浮屠。後來發精義。并謂此臺無。此臺已是贅。何況形而器。圓釋正超然。點頭會意思。多謝城山翁。一語迎禪鋒。顧我塵俗人。與物方溶溶。

景定壬戌司戶弟生日有感賦詩

夏中與秋仲兄弟客京華。椒柏同歡賀。萍蓬可歎嗟。孤雲在何處。明歲却誰家。料想親幃喜。中堂自點茶。

梅

梅花耐寒白如玉。干涉春風紅更黃。若爲司花示薄罰。到底不能磨滅香。

香者梅之氣。白者梅之質。以爲香不香。鼻孔有通窒。我有天者在。一白自不易。古人重伐木。惟恐變顏色。大雅久不作。此道豈常息。詩翁言外意。不能磨滅白。

暑布送王廷舉用蕭敬夫韻

平生涼薄資。挺陶誤大窰。誰知此石怪。愈沃乃愈焦。崑崙織火鼠。頓易鶉衣飄。榮我絲蘿附。免此蒲柳凋。服之雪漫白。長袂風搖搖。表之以霧縠。緣之以烟綃。振衣從姬滿。佩玉遊西瑤。高人无烟火。跳出天地窰。掀然立千仞。塊視金與焦。香袂拂雪冷。紫髯逐風飄。摩挲雲冥樹。豈隨羣卉凋。但知仙骨輕。不學倒影搖。人間盡描貌。妙不在生綃。揭斗斟天漿。霞衣卻瓊瑤。

題陳國秀小園

席地自乾坤。半樹闕今古。池館豈不寬。每換牡丹主。園公非隴傭。獨拚占春風。弄影不在多。臭香知乃翁。長鶴展輕翻。遠棲松桂林。故宇入清夢。盤盤亦苦心。中林風月賒。十畝園幽陰。林下有奇士。繞樹從之吟。

題靜山

地得一以寧。凝然者卷石。嶷巖及培塿。異形不異質。古之能定者。悟此爲一極。春榮秋以悴。一歲百態出。鳥鳴花落句。此意誰與詰。所以尼丘人。仁智不廢一。萬象此緯經。死灰彼何物。明發此乎遊。參入觀水術。贈拆字嗅衣相士

水火坎離紫陽怪。滑波皮骨長坡駭。解州得解解中膠。費家封鋪同一解。唵字從金詩反窮。貝何爲分田何同。黃絹幼婦我自樂。竹犬多事鴉鶴翁。阿英薰蒸透肌理。不潔未蒙好西子。芙蓉浪中薔薇水。蘇合蜚蜋忘彼己。馬嵬新韞釣新月。腥臊千年天地裂。是間曾著鼻孔麼。梅香寶臭無如何。

贈閻丘相士

急流勇退識真臞。昔有麻衣撥地爐。我亦愛君雲水趣。莫言雷雨起江湖。言余遇水則發故云。

贈神目相士

道茂數遁甲。長房得役鬼。風鑑麻衣仙。地理青烏子。擇術患不精。精義本無二。奇哉夢筆生。熊魚掩前氏。贈鏡湖相士

五月五日揚子江心水。鑄作道人雙瞳子。吾面碟子大。安用鏡照二百里。

贈秋月葉相士

急流勇退神仙。跛蹙龍鍾將相。借問華山山中。何似天津橋上。

贈曾蘭谷相士

許負眼。禰衡口。巧言甘莠言醜。

贈月洲相士

月洲月眼閱人多。且道西州事若何。朱紫貴人皆好命。不知中有孔明麼。

贈劉矮跛相士

鍊石爲形。鏗金爲音。世方好圓。癡守方心。陰陽網緼。人一氣質。善惡之微。證于聲色。意所欲發。雖吾不知。彼美子劉。洞其先幾。骯髒難合。今世道病。如子所言。生稟已定。戇夫勇士。往往一偏。以視妾婦。豈不猶賢。洪範得三。二曰剛克。會其歸其。好是正直。學問工夫。氣質用微。汝能觀形。安知其餘。子術已定。吾情已成。子執子術。吾安吾情。

嬾嬾三尺軀。舉止如不揚。瞻視照肝膽。音吐何琅琅。君看水中鳧。不及鶴脰長。昔聞藥憐蚊。未聞一足僵。萬物各自適。形色安足量。子言良有理。與子持酒漿。

贈梅谷相士

當年壽陽額。春風點顏色。後來廣平腸。水雪峙氣骨。世人識花面。識花還自淺。花有歲寒心。清貞堅百鍊。君家在梅谷。自詭知梅熟。須得花性情。不假花頭目。莫說和羹事。花被和羹累。突兀烟水村。我梅自林氏。贈碧眼相士

蒼蒼垂天雲。靈照行下土。秋江浸草木。魚蝦歷可數。眉山老麻衣。偷入此阿堵。色界只點頭。從人道吾瞽。贈鏡齋徐相士

鄒忌不如徐公美。引鏡自窺得真是。門下食客纔有求。昏昏便與妻妾比。徐家耳孫却不然。自名一鏡京師市。世人無用看青銅。此君雙眼明秋水。君以無求游公卿。勿令此鏡生瑕滓。堞子太面何難知。從今光照二百里。

贈鑑湖相士

瘦竹凌風弄碧漪。山光雲影共熹微。月黃昏裏疎枝外。認取半天孤鶴飛。

贈趙神眼

一條一褐髯如鐵。神爲秋水眼爲月。欲從壺子覓三機。劍首終然吹一映。

贈桂巖楊相士

榮悴紛紛未可期。夕多未振已朝披。得剛難免於今世。行好須看有驗時。萱畫堂前惟有母。槐陰庭下豈

無兒好官要做無難做。身後生前是兩歧。

宣州罷任再贈

貧賤元無富貴思。泥塗滑滑總危機。世無徐庶不如臥。見到淵明便合歸。流落丹心天肯未。嶢嶢青眼古來稀。西風爲語巖前桂。若更多言却又非。

贛州再贈

此別重逢又幾時。贈君此是第三詩。衆人皆醉從教酒。獨我無爭且看棋。凡事誰能隨物競。此心只要有天知。自知自有天知得。切莫逢人說項斯。

贈彭別峯太極數

手把先天已後書。當來一畫本全無。白雲山下泠泠水。自在人間太極圖。

贈黃生銀河數

乘槎人從天上來。天上知有君平術。黃生能談君平書。不知曾認支機石。

贈楊樵隱應炎談命

莘郊一介堯舜君。民薇山二難。百世忠清富春耕。叟涕洟雲臺終南遯。士仕宦梯媒是數公。者俱以隱名。木石一跡霄淵異。情九華山人賣樵江湖請。算世間幾種樵夫。

贈葉大明

大明標榜葉氏子。自稱後村門下士。誤言木吉。幸爲災。後村曾發一笑來。其師流傳說如此。寧知禍福乃不爾。犀腰貂首徒勞人。甘藜藜藿無苦辛。我生有命殊六六。木幸循環相起伏。袖中莫出將相圖。盡洗舊學讀吾書。

贈舒片雲

麻源謫仙人。噓呵成陰陽。向來懷袖間。冉冉天孫裳。一夕大雷電。六丁下取將。仙人乘風來帝鄉。又從膚寸起飛揚。仙術亦如此。天機神翁張。有時行渾天。周游十三萬里強。往來仙馭不可韁。正恐問命人。望氣蓬萊隔渺茫。

贈彭神機

挽強二石徒碌碌。學到穿楊精藝熟。百發百中無虛弦。百中一跌前功辱。彭君絕識透黃間。不師逢善師。珞瑜天度三百六十強。一算不容失正鵠。吾聞天機難語人。往來了了拈衆鏃。君姑藏用凝於神。矢口莫輕談禍福。

贈劉忠樸

楹何爲折劍何借。鬚肯爲拂糞肯嘗。馬公布衾王公飯。石家錦障丁家香。忠邪佞邪兩無定。一瑠一璞異

其性忠樸先生躔法高。古今四者豈關命。五九六餘能善惡。鐵算不是并州錯。使從忠樸問如今。忠果誰忠樸誰樸。

贈金稱

我有一叢籬下花。黃金滿眼無人拾。夜看璇璣度玉衡。猿啼雨外青山濕。

贈余月心五首

月之所在謂之身。朝市山林幾樣人。靜看一輪如此潔。莫將身著輭紅塵。
我生之辰月宿斗。如何謗譽由箕口。月明只合醒眼看。斗亦何須挹漿酒。
月比於人歷世多。纔圓又缺幾消磨。只因受用長生藥。嗟爾死蛙如月何。
一種黃州月。曹蘇善惡幾。吾磯連月釣。此月是邪非。
子心月其明。子術星之數。爲月詰衆星。不知何以故。

贈涂內明

老云五色令人盲。而壁不視佛慧生。彼皆去眼絕人僞。孰知涂者出天成。有口能談貴人命。有耳能聽貴人聲。此中一片光明藏。嗜欲淺處天機深。

贈一壺天李日者

汝南市人眼。壺小天地大。誰知賣藥翁。壺寬天地隘。李君血肉身。大化中一芥。天度三百餘。滿腔粲著蔡。仙翁以過謫。長房以術敗。造化多漏泄。鬼神爭訝怪。君歸視斯壺。口匏深覆蓋。得錢且沽酒。日晚便罷賣。

贈蕭巽齋

未有大撓書。先有伏羲易。古人尙卜筮。今人信命術。八卦與五行。皆自河圖出。易中元有命。道一萬事畢。卦義六十四。蕭君得其一。江湖旅瑣瑣。談命以巽入。人情愛委曲。喉舌嫌棘棘。言言依忠孝。君平意未失。我生獨骯髒。動取無妄疾。是有命流行。誰隕復誰詘。安能從兒女。朝夕談呢呢。若卦有人買。不妨君賣直。

贈曾一軒

磨蝎之宮星見斗。簸之揚之箕有口。昌黎安身坡立命。謗毀平生無不有。我有斗度限所經。適然天尾來臨丑。雖非終身事干涉。一年貝錦紛雜糅。吾家祿書成巨編。往往日者迷幾生。惟有一軒曾正德。其說已在前五年。陰陽造化蕩書夜。世間利鈍非偶然。未來不必更臆度。我自存我謂之天。

贈龔豫軒數術

挾筴考休徵。巫甘邁何追。君亦布靈草。乃復探其微。載觀河洛書。今也休明時。天高鳳鳥翔。擊拊邀以嬉。贈剋擇徐吉甫。

東望會稽山。穆陵鬱岩嶢。卜壤藏劍履。伯也昭其勞。昔者遊仙人。龍耳致君王。君家世其傳。芳躋疇可量。

青囊落君手。辯語如流河。尋雲履高阜。湯湯俯長波。朔風渺天垂。萬里草離離。安得結方軌。爲君起遐思。

贈魏山人

君不見。而家直臣犯天怒。身死未寒碑已仆。又不見。而家處士承天渥。閉門水竹以自樂。雲仍妙參曾揚訣。謂余地宅誰優劣。小煩穩作子午針。靈於己則靈於人。

贈老菴廖希說

短屐平生幾兩穿。錦囊真得當家傳。山中老去稱菴主。天上將來說地仙。面皺不妨筋骨健。舌存何必齒牙全。金精深處苔堪飯。更住人間八百年。

彭通伯衛和堂

理身如理國。用藥如用兵。人能保天和。於身爲太平。外邪奸其間。甚於寇搶攘。守護一不謹。乘間敵益勦。古有黃帝書。猶今六韜經。悍夫命雄喙。仁將資參苓。羽衣爲其徒。識破陰陽爭。指授別生死。錚然震能名。道家攝鉛汞。膚腠如重扃。到頭關鍵密。六氣無敢嬰。君方建旗鼓。不敢走且驚。他時囊吾弓。閉門讀黃庭。

贈適菴丹士

本是儒家子。學爲方外事。此身恨臆短。有意求蟬蛻。猶留鼎餘藥。還授人間世。從君臥山中。共談弘景祕。

贈劉可軒寫真

燕頰鵞肩都易寫。從前只道點睛難。近來阿堵君休問。燈下時將頰影看。
慧和尚三絕

畫我郎潛先帝時。而今白髮漸參差。若交傳入都人眼。疑汝前身妙善師。
風雪衡山涕滿膺。懶殘不管自家身。殷勤撥火分煨芋。却有工夫到別人。
花光老矣墨婆娑。無賴梅花一白何。爲問西來宗旨道。世間色相是空麼。

象弈各有等級四絕品四人高下

螳臂初來攬晚蟬。那知黃雀沐饑涎。王孫挾彈無人處。一夜珊瑚薦玳筵。
右一爲周子善言。蕭耕山能勝二劉。不覺敗於子善。子善敗於我。
射虎將軍髮欲枯。茫茫沙草正迷途。小兒謾取封侯去。還是平陽公主奴。

右二爲耕山言。老夫敗於子善也。

坐踞河南百戰雄。少年飛掣健如龍。世間只畏兩人在。上有高公下慕容。
右三爲劉淵伯言。所畏者。惟吾與子善。

擊柱論功不忍看。築壇刑馬誓河山。當年絳灌如何似。只在春秋魯衛間。
右四爲劉定伯言。與淵伯上下也。

贈樂軒彭善之

吾家小黃溪。其間石甚巨。可寫歸來辭。可刻盤谷序。晉唐文章手。誰敢以自負。異時此重來。煩君作玉筯。

贈墨林曹大崧

巍峨幼婦碑。伶俜七步詩。又得墨林墨淋漓。湊作曹家三絕奇。

贈刊圖書蕭文彬

蒼籀書法祖。斯水篆家豪。昔人鋒在筆。今子鋒在刀。收功棠谿金。不禮中山毛。囊錐脫穎出。鑄崖齊天高。

題周山甫錦繡段

客從西北來。遺我錦繡段。上有雙鳳凰。文彩何燦燦。置之篋笥中。歲月亦已晏。天孫顧七襄。雷電下河漢。鳳凰忽飛去。遽然失把玩。貧家機杼寒。秋蟲助予嘆。

題梅尉詩軸

乃翁聖俞君。瑰辭燦琳琅。吾鄉歐陽子。逸韻諧宮商。人物雄中原。園囿盛洛陽。濃郁追皇風。詭怪抑晚唐。雲仍四方志。生長百戰場。憂國杜少陵。感興陳子昂。我亦青原人。君遺明月光。掩卷不能和。握手談肝腸。

贈羅雪厓樵青

蕭蕭山下人。閉門衣裘單。春心動溪谷。曉起捫松看。

題得魚集史評

男兒生作事，豪傑死留名。天運常相禪，江流自不平。百年多險夢，千古有閑評。諸父淵源在，吾猶及老成。

題彭小林詩稿

其父號雅林

晚識宗文憶浣花，刪餘今見雅名家。牙籤料理西風讀，共笑鍾山說老鴉。

題王聲甫松坡樵苦唱後

倚柯睨蒼髯，短簑挾風雨。談道誰我知，對弈者其侶。狂吟發悲調，谷鳴相律呂。屢屢豈不怨，寧售大夫股。長鑱斲仙苓，穫薪爲吾煮。

題毛靈甫詩集

雲澗美毛靈甫詩也。

英英白雲，在澗之濱。彼美人兮，其德孔純。
英英白雲，在澗之阿。彼美人兮，其思孔多。
白雲英英，澗水泱泱。彼美人兮，碩大且昌。

雲澗三章，章四句。

送趙王賓三首

文山先生全集 卷之一

風流不比賀家狂。瀟灑黃冠意更長。自有武夷溪九曲。鑑湖何必問君王。
蕭然被褐不求知。歸倚溪船理釣絲。却笑荆山空自售。未應有智不如葵。
懶從原上訪桃花。又不青門去種瓜。傳得神仙蟬蛻法。君如覓我問烟霞。

又送前人琴棋書畫四首

不知甲子定何年。題滿柴桑日醉眠。意不在言君解否。壁間琴本是無弦。
我愛商山茹紫芝。逍遙勝似橘中時。紛紛玄白方龍戰。世事從他一局棋。
蔡邕去後右軍死。誰是風流入品題。只少蛟龍大師字。至今風骨在浯溪。
欲覓龍眠舊時事。相傳此本世間無。黃金不買昭君本。只買嚴陵歸釣圖。
書 書 棋 琴

題延真羅道士玉潤

雙巖夾方流。知有至妙蘊。山石發清暉。草木得餘潤。泉源皆寶氣。樵牧駭潛蜃。
仙翁獨危坐。華池養水性。神澤溫而栗。骨峭老益勁。苔磯枕泓碧。時有魚出聽。糜瓊飯潺湲。
冲淡意無朕。

聽羅道士琴

斷崖千仞碧。下有寒泉落。道人揮絲桐。清風轉寥廓。飄飄襟袂舉。冰紈不禁薄。
紫烟護丹霞。雙舞天外鶴。吾聞泗濱磬。暗含角與徵。又聞天樂泉。淨洗箏笛耳。
如何碧一泓。乃此并二美。藍田滄海意。請問玉溪子。

閑居和雲屋道士

一樽聊共此時心。文字追隨落醉吟。仙子樓臺脩竹外。行人冠蓋畫橋陰。一年芳草東風老。五月空江夜雨深。且作蘭亭歡喜集。更論誰後又誰今。

遊集靈觀時奉祠祿

小洞烟霞國。重陽風雨秋。歐公嵩嶽步。朱子武夷舟。香火真吾識。觥籌且此遊。龍山馬臺事。糠粃舊王侯。

題凝祥觀

前路風塵走且僵。我來一日此徜徉。歐公自是遊嵩觀。迂叟原非過太行。始信神仙還有國。不知蠻觸是何鄉。世間如此紛紛者。贏得山林作道場。

遊青源二首

鍾魚間日月。竹樹老風烟。一徑溪聲滿。四山天影圓。無言都是趣。有想便成緣。夢破啼猿雨。開元六百年。空庭橫蠨蛸。斷碣偃龍蛇。活火參禪笈。真泉透佛茶。晚鐘何處雨。春水滿城花。夜影燈前客。江西七祖家。

題碧落堂知瑞州日

大廈新成燕雀歡。與君聊此共清閑。地居一郡樓臺上。人在半空煙雨間。脩復盡還今宇宙。感傷猶記舊江山。近來又報秋風緊。頗覺憂時鬢欲斑。

和龔使君韻

名琦知瑞州日

淡和心事葛天民。回首歸來清渭濱。長倩君賓孫子行。道原義仲輩流人。一生受用忘非是。萬事升沉等故新。近日貞元朝士少。蒲輪有命出楓宸。

餞新班弟

送君天上去。當戶理瑤琴。萬里白鷗遠。千山黃葉深。江空行路影。日暮倚門心。若見西湖雪。霸橋人正吟。

別弟赴新昌

十載從遊久。諸公講切精。天淵分理欲。內外一知行。立政須規範。脩身是法程。對床小疏隔。戀戀弟兄情。

和韻送逸軒劉民章

庚午科名子俊

少日屠龍事已勞。送人千里發江濤。蓬萊地近風方細。閩闔門開日正高。春裏看花須款款。雨中剪韭且陶陶。金吾已辦長安月。雙鳳扶雲立海鰲。

題宣州疊嶂樓

初日照高樓。輕烟在疎樹。峨峨遠岫出。泯泯清江去。簷隙委殘籬。屋隅連宿莽。蒼蔚互低昂。熹微分散聚。城郭諒非昔。山川儼如故。童鬢已零落。姝顏慰遲莫。沈沈澹忘歸。欲歸重回顧。

題宣州推官廳覽翠堂前宣州推幕季君於其廡作亭梅聖俞以覽翠名之而爲之記今去之二

百餘年碑埋沒久矣。天台陳君客實來發而得之。復表之亭上。江山如昨。翰墨宛然。感陵文某時。守茲土。既爲作顏間二字。復詩以志之。

都官自楚產。文采光陸離。當年從事君。如與山川期。歲月忽已逾。天球落塵土。豈曰無嘉賓。過者不我顧。誰令赤城子。發坎出方珉。靈物必復見。其見乃以人。回視城南端。飛藿俯蒼蒨。物理有屈伸。流峙豈云變。寥寥南樓月。至今有遐音。千年一邂逅。共調風中琴。亦欲結方軌。望滄事幽尋。行行且言邁。踟躕思何深。

登雙溪閣

碧落神仙宅。當年庾謝來。烟雲連草樹。山水近樓臺。萬雉銀缸舉。千鴉鐵騎回。梅花衣上月。把玩爲徘徊。

題吳城山

龍行人鬼外。神在地天間。彭蠡石罅出。洞庭商舶還。秋風黃鵠闊。春雨白鷗閑。雲際青如粟。河流接海山。

貧女吟四首

春夏
秋冬

柴門寒自閉。不識賞花心。春筍翠如玉。爲人拈繡針。
竹扇掩紅顏。辛苦紉白苧。人間羅雪香。白苧汗如雨。
西風兩鬢鬆。涼意吹伶俜。百巧不救貧。誤拜織女星。
巧梳手欲冰。小翠爲寒怯。有時衿肘露。頗與雪爭潔。

名姝吟

丈夫至白首。鍾鼎垂功名。未有朱門中。而無絲竹聲。與主共富貴。不見主苦辛。名姝從何來。婉孌出神京。今人薄生男。生女卽不貧。東家從王侯。西家事公卿。吾行天下多。朱紫稀晨星。大都不一。甚者曠數城。如何世上福。冉冉歸娉婷。乃知長安市。家家生貴人。

東方有一士

萬金結遊俠。千金買歌舞。丹青映第宅。從者塞衢路。身爲他人役。名聲落塵土。他人一何傷。富貴還自苦。東方有一士。敗垣半風雨。不識絲與竹。飛雀滿庭戶。一飯或不飽。夜夢無驚寤。此事古來多。難與俗人語。

和故人韻

去歲惶中穀。醫瘡咸耀新。一言堪救藥。三秩敢貪噴。自是仁由己。休論哲保身。當時若瘖默。何面見鄉人。人情嗟愈變。世法合何如。氣以心平定。才因意廣疎。時行或時止。無咎亦無譽。第一嚴交際。琴紳敢不書。

賦吉州隆慶寺塔火

玉塔穿空不可梯。剗然霹靂暗招提。四城決破吳居眼。一炷然成漢卓臍。風雨滿山連地捲。鬼神現世覺天低。時人子細回頭看。萬事悠悠落日西。

溪頭濁潦擁魚蝦，笑殺漁翁下釣差。棹取扁舟湖海去，悠悠心事寄蘆花。

題高君寶紺泉

亭亭巖下泓，澄碧落梧影。寒瑤披清猗，殘月照淵澗。俯淵測浮雲，流日蕩苔穎。向來滄浪歌，孺子不可詗。載寄衣上塵，懷古意深永。招招素心人，相期發深省。

題曾氏連理木

皇后嘉樹生，僑僂四衢合。一軌德澤純，洽八方一。乘木而王固如此，大明香琴橘。貞觀玉華李，一時圖傳傳奇觀。榮華過眼轉九易，惟有武城宅前樹。不知何年已連理，從來縣官不以聞。武城子孫世專美，人言協氣薰嘉生。此家孝友陶協氣，朱門多少鎖喬木。百年瞬息滋一喟，焉得鼎鼎爲輪菌。受命不遷相曾氏，傳聞此木更八世。方遇麻陽大夫記，誠齋先生字麻陽又幾年。却又青螺地與志，北來徹當路。表名連瑞里，有日捧圖上。嘉禾靈草共青史，物生隱顯始有時。展如之人亦應爾，榷楠杞梓離奇生。繼此廬陵城北不止稱三瑞。

題滕王閣

五雲窻戶瞰滄浪，猶帶唐人翰墨香。日月四時黃道闊，江山一片畫圖長。迴風何處搏雙雁，凍雨誰人駕獨航。回首十年此漂泊，閣前新柳已成行。

題黃岡寺次吳履齋韻

名潛丞相

長江幾千里。萬折必歸東。南浦驚新雁。廬山隔晚風。人行荒樹外。秋在斷蕪中。何日洗兵馬。車書四海同。

龍霧洲覺海寺次李文溪壁間韻

名昂英侍郎

闍黎鍾後訪團蒲。江色漫漫晝欲晡。一笛梅邊何滿子。千簑蘆外筆頭奴。急風吹雁還家未。新雨生濤到海無。本是白鷗隨浩蕩。野田漂泊不爲孤。

題鍾聖舉積學齋

東家築黃金。西家列珊瑚。嘆此草露晞。良時聊斯須。古人重孜孜。殖學乃菑畬。彼美不琢瑯。積中竟何如。空同白雲深。君子式其廬。棐几照初陽。垂籤動涼噓。方寸起岑樓。一勺生龍魚。辰乎曷來遲。競諸復競諸。

題顏景彝八窻玲瓏

我闔無纖埃。風日自清好。面面有芙蓉。何如交翠草。吾聞開十牖。不及一戶明。泰宇有天光。八荒盡夷庚。

予鄧峒 巽齋歐陽先生爲淦鄧峒賦詩以孝子慈孫望於人先生之盛心也敢不拜手敬贊鄧

君勉之

乃翁猶旅殯。霜露幾焮蒿。日與清江遊。雲連桂嶺高。時無郭元振。夢有令狐綯。目斷方田墓。招魂我欲騷。

題陳正獻公六梅亭

相府亭前梅六株。四圍香影護琴書。月華猶帶玉堂色。風味曾分金鼎餘。五柳門前空寂寞。三槐堂上竟蕭疎。惟渠不變凌霜操。千古風標只自如。

文山先生全集卷之二

詩樂府并
詞附

文山卽事

宇宙風烟闊。山林日月長。開灘通燕尾。代石割羊腸。盤谷堪居李。廬山偶姓康。知名總閑事。一醉棹滄浪。

出山

日日騎馬來山中。歸時明月長在地。但願山人一百年。一年三百餘番醉。

關山寄朱約山

一笠一簑三釣磯。歸來不費買山貲。洞天福地深數里。石壁湍流清四時。樵牧舊蹊今可馬。鬼神天巧不容詩。先生曾有空同約。那裏江山未是奇。

山中卽事

攜壺藉草醉斜陽。白鶴飛來月下雙。蘆葉西風驚別浦。芭蕉夜雨隔疏窗。千年帝子朱簾夢。一曲仙人鐵笛腔。若問山翁還瘦否。手持漁竹下寒江。

宿山中用前韻

文山先生全集 卷之二

南山之隩北山陽。羽扇輕風共影雙。書檠孤蒲明月笛。青燈蟋蟀白雲窻。半生遊子成行債。一夜佳人作別腔。倚釣重來此簑笠。梅花十里雪空江。

山中

滄州棹影荻花涼。款乃一聲江水長。賴有蕙風堪斫脍。便無花月亦飛觴。山中世已驚東晉。席上人多賦晚唐。何處魚羹不可飯。蚤拚泉石入膏肓。

山中謾成柬劉方齋

名夢桂居南湖太師公玄孫

東風解凍出行嬉。一闋烟塵隔翠微。自有溪山真樂地。從來富貴是危機。二三輩行惟須醉。多少公卿未得歸。明日主人酬一座。小船旋網鱖魚肥。

山中載酒用蕭敬夫韻賦江漲

拍拍春風滿面浮。出門一笑大江流。坐中狂客有醉白。物外閑人惟弈秋。晴抹雨粧總西子。日開雲暝一滁州。忽傳十萬軍聲至。如在浙江亭上遊。

山中立夏用坐客韻

歸來泉石國。日月共溪翁。夏氣重淵底。春光萬象中。窮吟到雲黑。淡飲勝裙紅。一陣絃聲好。人間解愠風。

山中和韻

白扇揮殘暑。青鞋踏嫩晴。花床尋小隱。石鼎引長鳴。紗帽有時去。酒壺惟意傾。山僧癡與坐。閑却瘦彌明。

山中自賦

口口口口口口口口。門外蒼松一水脩。不必清高逼巢許。祇教瀟灑勝由求。空花自滿三千界。老樹相看五百秋。坐有鷹揚人物在。怕牽昨夢上漁舟。

入山卽事

江流風瀼瀼。雲薄雨絲絲。上馬忙呼繖。巡簷靜看棋。露天廚作溲。沙地水生池。秉燭留前夕。茲遊更絕奇。

山中感興三首

載酒之東郊。東郊草新綠。一雨生江波。洲渚失其足。青春豈不惜。行樂非所欲。采芝復采芝。終朝不盈掬。大風從何來。奇響振空谷。我馬何玄黃。息我西山麓。

山中有流水。霜降石自出。驟雨東南來。消長不終日。故人書問至。爲言北風急。山深人不知。塞馬誰得失。挑燈看古史。感淚縱橫發。幸生聖明時。漁樵以自適。

桃花何天天。楊柳何依依。去年白鳥集。今年黃鶴飛。昔爲江上潮。今爲山中雲。江上潮有聲。山中雲無情。一年足自念。况復百年長。但存松柏心。天地真茫茫。

山中呈聶心遠諸客

誰入山來問野舟。一篙花外渡深流。小翠風樹躡隨鶴。淺約湍沙浩蕩鷗。湖上有時思洛社。人間何處不滌洲。徘徊才是黃昏候。短笛先催月上樓。

再用前韻

黃葉婆娑上釣舟。喚回舊夢到江流。多情政自憐檣燕。兩鬢終當付野鷗。未說離懷向南浦。須知詩意在夔州。朔風昨夜吹沙急。早覺寒聲戰玉樓。

山中六言三首

兩兩漁舟搖下。雙雙紫燕飛回。流水白雲芳草。清風明月蒼苔。鶴外竹聲簌簌。座邊松影疎疎。夜靜不收棋局。日高猶臥紗廚。風暖江鴻海燕。雨晴簷鷓鴣林鳩。一段青山顏色。不隨江水俱流。

用蕭敬夫韻

庭院芭蕉碎綠陰。高山一曲寄瑤琴。西風遊子萬山影。明月故鄉千里心。江上斷鴻隨我老。天涯芳草爲誰深。雪中若作梅花夢。約莫孤山人姓林。

山中

烟雲開窈窕。荆棘剪離披。蠟屐上下齒。竹枝長短詞。半山江色透。獨樹午陰遲。世上兒孫老。有人獨看棋。

倏忽當年遇。蒙茸幾度披。水霞明畫卷。草樹幻騷詞。鳥過目不瞬。江流意自遲。世人空黑白。一色看坡棋。

竹花

黃家紫家鬪魏姚。夷齊玉立青蕭蕭。便是人間小天地。不特水上作萍萍。

夜歸

市橋燈火未闌珊。一簇人家樹影間。想把神仙爭羨我。不知我正羨渠間。

八月十六日見梅

廣寒殿裏玉樓開。那得孤山處士來。半夜西風半身影。夢中騎得雪驢回。

和蕭秋屋韻

蘆花作雪照波流。黃葉聲中一半秋。明月嬋娟千里夢。扁舟汗漫五湖遊。星辰活動驚歌笑。風露輕寒敵拍浮。贏得年年清賞處。山河全影入金甌。

月夜

月到中天雲劃開。斷橋幻出玉樓臺。夜深一鶴掠舟過。疑是坡仙赤壁來。

江行

日日看山好。山山色蒼蒼。忘機鷗下早。戀旆馬行忙。松曉清風濕。荷秋流水香。短簑吹鐵笛。年歲大江長。

紙帳

紙帳白如雪。上有坐客影。一白不自由。黑光蕩無定。人倦影已散。依然雪花瑩。須臾秉燭眠。相忘心目靜。

爲劉定伯索油麻

我欲登山去采薇。江南秋雨正霏霏。仙家解有逡巡手。一筴西風落翠微。

山中小集

江山閑勝賞。萬戶不須留。客醉客多事。吾詩吾自酬。夕風吹絳蠟。春色漾黃流。賓從歸來夜。滌翁無此遊。

新年

梅花枕上聽司晨。起綰金章候拜親。喜對慈顏看鋪鬢。髮雖疎脫未如銀。

生日和聶吉甫

五月初二日

青蒲花未老。黃竹筍初生。細味詩工部。閑評字率更。大江流日影。時鳥說春榮。共作千年計。身謀政自輕。

生日和謝愛山長句

嶽老字伯華

余屏跡山間。誦昌黎三星行政。自多感。亦何有於初度客。謝愛山翩然遠來。貽我長句。噓拂而縑籍之者。至矣。倚歌而和。愧不成章。

寓形落落大塊間。噓吸一氣自往還。葉弧未了男子事。何能局促甘囚山。昔年此日作初度。賓客如雲劇

歡舞。今年避影却閉門。捧觴自壽白頭母。故人憶我能遠來。虹光滿袖生瓊瑰。一栢相屬慰岑寂。使我發
笑愁顏開。簸揚且聽箕張口。丈夫壯氣須衝斗。夜闌拂劍碧光寒。握手相期出雲表。

生日謝朱約山和來韻

元豐五年正月日。洛中耆英佳話出。當時韓公七十九。歡噓廣酬老吟筆。偉然冠劍照孔鸞。給背鳩杖蒲
輪安。韓公而下文寬夫。相高以壽不以官。洛塵已隨流水急。雲仍相逢松下石。顧我行輩真我來。兼暮故
事強安排。約對青山共長久。醉歌要賽滁州守。願隨後社著深衣。闌風伏雨從是非。便令攜樽西墅去。山
花山鳥爲歌舞。招招瑤母來庭闈。拍手共笑偷桃兒。吾山陂陀白雲滿。猿鶴司我北門管。紫霞隔斷雞犬
聲。下有珀琬滋長齡。向來福地七十二。此亦清高仙地位。朝遊崑崙暮崆峒。駕風鞭霆迎我公。丹崖翠壁
千萬丈。與公上上上上上。

生日山中和蕭敬夫韻

山深不用結涼棚。風起江蘋暑氣輕。處士林泉自今古。男兒弧矢付豪英。客來不必籠中羽。我愛無如橘
裏枰。一任蒼松栽十里。他年猶見茯苓生。

與朱古平飲山中和蕭敬夫韻

古平名植字聖陶。丙辰賦魁太傅卒。
江山自足引千杯。况有如今此客哉。石室只還湖守住。蘆峯曾屈晦翁來。酒酣剩有詩酬唱。步倦何妨車

馬回遊徧此山方可別。北厓莫遣曉雲開。

所懷

英英香蕙瑩朝華。收拾東風作一家。燕語鶯啼春又夏。燈花剔盡暗窻斜。

山中偶成

白鶴飛來牽我衣。東風吹我下漁磯。當年祇爲青山誤。直草君王一詔歸。

次約山賦杏花韻

名花韻在午晴初。雨沁臙脂臉更敷。蒲驛莫妨娛刺史。錦坊豈不勝中書。時無艷曲臨軒縱。公莫巍壇韞匱沾。春老綠陰青子近。東風來往一吹噓。

贈南安黃梅峯

清淺風流聖得知。黃昏歸鶴月來時。嶺頭更有高寒處。却是江南第一枝。

送人往湖南

雁拖秋月洞庭邊。客路淒涼野菊天。雲隔酒尊橫北海。風吹詩史落西川。夜深鬼火千山雪。春後鶻花一樹烟。爲我祝融峯上看。朝暾白處禮蓬仙。

題張景召簿尉梅墅并餞入南

喚醒三影燕支魂。一枝半樹專黃昏。江南暗香鬢不住。霜風吹入羅浮村。疎枝不入輞川畫。暗香不到東山棋。雲階一枕梨花夢。參橫月落無人知。

和謝愛山晚吟韻。日晚與客散步。因誦夕陽雖好不多時之句。謝愛山欣然賦之。余亦率然。口占以和。亦一時之樂也。

日落未落天滄涼。懸厓掛壁留餘光。紫烟翠霧空迷茫。颼颼度壑松風長。牛背短笛催歸忙。飄飄逸興空悠揚。襟懷灑落萬慮亡。須臾薄暝山色藏。長歌浩浩相激昂。淡雲弄月微昏黃。

別謝愛山

綠綺知音早。青燈對語遲。那知今雨別。又重故人思。山隔詩情遠。雲含容思悲。小樓今夜笛。莫向月中吹。君今拂衣去。我獨枕書眠。一片過林雨。數聲當戶蟬。情長空有恨。吟苦不成篇。後會知何日。西風老雁天。

和胡琴窻名日宣字德昭

買得青山貴似金。瘦筇上下費沉吟。花開花落相關意。雲去雲來自在心。夜雨一江漁唱小。秋風兩袖客愁深。夾堤密與栽楊柳。剩有行人待綠陰。

七月十三日夜用燈牌字韻湊成一詩與諸賓一笑

赤壁當年賦子虛。西風忽復到菰蒲。蟾蜍影裏千秋鑑。蟋蟀聲中七月圖。詩思飄飄入雲漢。歌聲隱隱動

江湖萬家簫鼓連燈火。見說來年此事無。

病中作

歲月侵尋見二毛。劍花冷落鶻鶻膏。睡餘吸海龍身瘦。渴裏奔雲馬骨高。百忌不容親酒具。千愁那解減詩豪。起來大作屠門嚼。自笑我非兒女曹。

又二絕

瞿塘隘處真重險。勾漏坡前又一灘。世事不容輕易看。翻雲覆雨等閑間。病中忽誤通真理。靜處專尋入定工。雨汗淋頭都不管。須臾和氣自冲融。

又賦

一病忽兩月。蓬頭夏涉秋。形羸心自壯。手弱筆仍逾。昨夜燈如喜。今宵諜莫愁。問誰驅五瘧。正與五窮謀。一病四十日。西風草木涼。倚床腰見骨。覽鏡眼留眶。倦策吟詩杖。頻燒讀易香。夜深排果餌。乞巧太醫王。

又賦

病裏心如故。閑中事更生。睡貓隨我嬾。黠鼠向人鳴。羽扇看棋坐。黃冠扶杖行。燈前翻自喜。瘦得此詩清。驟雨知何處。一溪秋水生。苦吟肩鶴瘦。多病耳蟬鳴。隱几惟便睡。挑包正倦行。山深明月夜。乞我半窻清。寄興逃吾病。吟詩老此生。風高鳴雁起。晴久鶻鳩鳴。野樹辭秋落。溪雲帶雨行。晚涼便懶坐。移傍竹陰清。

借道冠有賦

病中蕭散服黃冠。笑倒羣兒指爲彈。秘監賀君曾道士。翰林蘇子亦祠官。酒壺釣具有時樂。茶竈筆床隨處安。幸有山陰深密處。他年煉就九還丹。

又賦

時以草果數百枝作枕遂得汗

一番潮信過。時暫脫熬煎。心似轆轤轉。身如徽纆纏。夜聽飢鼠嘯。書看伏雌眠。急雨千山動。應知爲解弦。

病甚夢召至帝所。獲宥覺而頓愈。遂賦

臥聽風雷叱。天官赦小臣。平生無害物。不死復爲人。道德門庭遠。君親念慮新。自憐螻蟻輩。豈意動蒼旻。

病愈簡劉小村

秋光沁人骨。意氣曉來新。古鼎龍團雪。虛簷塵尾春。商山弈棋老。赤壁洞簫賓。風月眞倉扁。招呼入屋頻。倦餘心似醉。病起首如蓬。黃竹斷橋雨。白蘋長笛風。僊僊鷗屢舞。咄咄雁書空。孤負秋來眼。閑挑爨下桐。

夜坐偶成

蕭蕭秋夜涼。明月入我戶。攬衣起中庭。仰見牛與女。坐久寒露下。悲風動紈素。不遇王子喬。此意誰與語。

簡琴窻雲屋竹軒諸友

世情千萬變。險甚劍頭炊。嗜傳姑成癖。登山且作癡。烟霞非疾痼。泉石自心馳。獨喜精神健。山中剩有詩。

用前韻留琴窻

百年矛上浙。萬事枕中炊。病苦還思老。貪嗔未若癡。雲低天欲動。江長岸如馳。明月西風健。山頭賦別詩。

又用韻簡李深之

名道大。號深齋。

晚尊和月吸。早飯帶星炊。鷓鴣從高下。螳蟬任點癡。水澄神自止。雲遠意俱馳。門外誰車馬。故人來課詩。

早起偶成

澹澹池光曙。沉沉野色秋。片雲生北舍。隻雁過南樓。有見皆成趣。無言總是愁。芭蕉夜來水。嚙罷自搔頭。

又用韻

江山如有意。天地可無秋。夜月馮驩缺。西風王粲樓。露蛩令我喜。烟草爲誰愁。且醉杯中物。相看尙黑頭。

曉起

夢破風烟迴。衾寒不自由。鍾聲到枕曙。月影入簾秋。雁過江山老。蛩吟草樹愁。整冠人共笑。兩月不梳頭。遠寺鳴金鐸。疎窻試寶熏。秋聲江一片。曙影月三分。倦鶴行黃葉。癡猿坐白雲。道人無一事。抱膝看回文。

夜坐

淡烟楓葉路。細雨蓼花時。宿雁半江畫。寒蛩四壁詩。少年成老大。吾道付逶遲。終有劍心在。聞雞坐欲馳。

和朱松坡

學醫未至太醫王。笑殺年年折臂傷。屏裏江山如出色。亭臯松菊已成行。細參不語禪三昧。靜對無弦琴一張。多謝嶺頭詩寄我。滿園梅意弄春光。

陳貫道摘坡詩如寄以自號達者之流也爲賦浩浩歌一首

浩浩歌。人生如寄可奈何。春秋去來傳鴻燕。朝暮出沒奔羲娥。青絲冉冉上霜雪。百年歛若彈指過。封侯未必勝瓜圃。青門老子聊婆娑。江湖流浪何不可。亦曾力士爲脫靴。清風明月不用買。何處不是安樂窩。鶴脛豈長身。豈短。夔足非少。蛟非多。浩浩歌。人生如寄可奈何。不能高飛與遠舉。天荒地老懸網羅。到頭北邙一杯土。萬事碌碌空奔波。金張許史久寂寞。古來賢聖聞丘軻。乃知世間爲長物。惟有真我難滅磨。浩浩歌。人生如寄可奈何。春夢婆。春夢婆。拍手笑呵呵。是亦一東坡。非亦一東坡。

借朱約山韻就賀桂冠

身健尙堪松下飯。眼明正好橋中棋。青山有約當朱戶。白首何心上彩闌。栗里田園供雅興。午橋鍾鼓賞清時。晚來倦客秋江上。坐看半天黃鶴飛。

用前人韻賦招隱

釣魚船上聽吹笛。煨芋爐頭看下棋。膾有晚愁歸別浦。已無春夢到端闌。去年尙憶桃紅處。好景重逢橘綠時。珍重山人招隱意。猿啼鶴嘯白雲飛。

用前人韻招山行以春爲期

掃殘竹徑隨人坐。鑿破苔磯到處棋。一水樓臺開曉鏡。萬山花木放春闌。雪中便有回舟興。林下豈無燒筍時。莫待東風吹柳絮。眼穿籠鶴遶湖飛。

翰林權直罷歸和朱約山韻

閑雲舒卷無聲畫。醉石敲推一色棋。試問挂瓢棲碧洞。何如襍被臥彤闈。夢中芳草還成路。別後黃花又是時。羞殺今年堂上燕。片心寄與雁南飛。

慶羅氏祖母百歲 羅氏慶門壽母百歲。父老見所未嘗。鄉閭夸以爲盛。某旣交朋。升堂爲壽。退

布席廳事。與橫舟昆弟子姪。舉酒盡歡。酒酣賦詩。志喜也。

麗日萱花照五雲。升堂風采見乾淳。蓬萊會上逢王母。婺女光中見老人。雨露一門華髮潤。江山滿座綵衣新。只將千載苓爲壽。更住人間九百春。

拜羅氏百歲母之明日主人舉酒客張千載心賦詩某喜贊不自已見之趁韻

翠微三鳥近。畫閣五雲橫。春水鷗聲滑。夕陽鴉背明。尊前持一笑。花下臥餘醒。曾見瑤池母。不爲虛此生。

醉清湖上三日存叟獨不在坐卽席有懷

石鼎吟方透。瑤觴醉未闌。疎林花密綴。舊墨燕新安。春半湖山好。夜深江海寒。王孫隔芳草。初月正相看。

羅山長存叟兄弟來謝宴山中存叟名耕登科

天開盤谷隱。春到浣溪家。一水樓臺影。滿山桃李花。春風寄橫笛。夜月擬乘槎。政好逢佳客。江空北斗斜。

壽朱約山八十韻九月十三日

翠袖瓊樓八十翁。平安曉宇看孤鴻。五湖圖裏添彭祖。南極光中約祝融。日日青山醉春色。年年黃菊飽西風。鷹揚但願無施處。臣老婆娑一釣蓬。

壽朱約山八十三歲

八十餘翁雪滿顛。深衣大帶耳垂肩。磻溪回首今三載。絳縣論心又十年。歸去來兮真富貴。美哉壽也活神仙。門前燕雀紛如雨。媿我白雲深處眠。

賀祕書歐陽巽齋先生遷居名守道字公權

先生挾冊當菑畬。不待辛勤有屋廬。宅樣只還齊里舊。鄉風好似潁川居。鏡湖今日賀外監。瀛館前年虞祕書。天下經綸獨一室。時人尙敢說吾迂。

挽李制帥二首名遇龍字叔典

上下荆淮劍氣雄。進擔全蜀凜英風。將壇敵血金湯志。白腹填天竹帛功。治法征謀關世道。精忠定力簡皇衷。傷哉生出瞿塘險。翻落黃梁一夢中。

世變江河渺未涯。如公真是濟時危。幾年荆益龍驤譽。一日瀟湘鵬識悲。天下皆傳清獻節。人心自有武侯碑。郎君昔共慈恩約。拭淚西風寄些詞。

挽孫庸齋樞密

淮水奇人物。樞星偉弟兄。泰山開學譜。雲谷發時源。委吏初行志。脩文莫返魂。功名傳久遠。賴有二郎存。

挽龔用和

結屋南陵三十秋。田園舊隱隔江流。鄜州避亂杜工部。下澤乘車馬少遊。名利無心付隍鹿。詩書有種出烟樓。長淮清野難歸玉。魂魄猶應戀故丘。

挽方監丞益之

文華時輩右。質朴古風餘。壁上春陵記。屏間太極圖。雲山居士屋。風雪故人書。一夢中觀化。堯夫以後無。

哭祕書彭止所名方週。丙辰省元。

人物孤中祕。神山返異仙。日穿陪繡處。夢斷曝書年。玉質應無死。韋編豈不傳。奠芻和泪遣。此月向誰圓。

挽湖守吳西林名道夫。字深潭。沒於湘。

凜凜千軍筆。堂堂一面威。荆流春浪湧。峽樹暮雲飛。素壁鯨猶在。中橋鶴不歸。劍亭遺跡古。豐石照山輝。傾蓋歲年晚。相知江海深。春天思北樹。夜雨話西林。五嶺生前夢。中原地下心。英雄凋落盡。慷慨一窩襟。

挽高郵守晏桂山名陶字復之祕書丞

淮南已仙去。桂樹鬱青青。五馬賢聲望。三丞舊典刑。邦人多感嘆。諸老半凋零。何日持雞酒。傷心請葬銘。

挽鄒晉叔主簿名晉同榜

此君何坦坦。迥首杏園遊。魂魄湘潭去。聲名彭澤休。百年中道短。千里故鄉愁。六子三方幼。遺言可泪流。

挽王遠叔

孟嘗生五日。白首嘆遭逢。燈火殘編雨。葦鹽短褐風。八天下鷗鷺。半水偃蛟龍。原上諸生哭。黃花衰草中。

挽蕭帥機虎溪名了翁字明可

世以千金重。誰能學隱君。一門名似雨。滿座客如雲。志願生無憾。聲華死有聞。韓碑照原草。含笑有斯文。

挽朱尙書寵孫

一代文昌貴。千年諫議名。天球聲渾厚。元酒韻和平。巖穴思風采。朝廷惜老成。東西生死別。江水汨爲傾。

挽太博朱古平

白氏賢司馬。昌黎真學官。江湖驚落筆。朝野望彈冠。天馬高風骨。秋鷹折羽翰。萊庭人白髮。烟雨萬松寒。
鐵硯傷同志。青燈憶舊游。臨軒朝鳳闕。馳道聽雞籌。魏野神仙宅。元龍湖海樓。西風一揮汨。世事蓋棺休。

挽黎致政黎探化祖

楚峯天地闊。四世百年家。鶴髮垂袍葉。龍孫上榜花。詩書新雨露。松柏老烟霞。白馬蒼山路。斯人忽已遐。
古心江先生。以舊弼出鎮長沙。癸酉十月乙亥。是爲七十六歲。門人文某。以一節趨走部內。謹擬古體一首爲壽。

炎圖啓丕運。皇路熙以平。蜿蟺發令姿。有美洵一人。鴻藻舒朝華。大音鏘韶鈞。黼珽麗三階。火龍昭統紘。桓圭殿南服。熊旂被金城。瞻彼鶉爲火。翼軫宜其精。祥鸞舞瑤席。鳴鳳翔鳩笙。孟冬兆陽氣。西北無浮雲。駕言酌春酒。可以寫我情。揚旂下祝融。躡履朝奉清。嘉猷扇九垓。遠以遂古淳。君子保金石。所以永國成。純嘏錫千歲。綿綿贊休明。

送張宗甫兄弟楚觀登舟赴湖北試

金螺曉氣照人寒。手把天漿領佩環。夜月送魚來赤壁。秋風吹雁發衡山。東南折處棋花見。牛女光中槎影還。見說青年文賦好。士龍一笑共雲間。

衡州送胡端逸赴漕號觀齋。時八月十五日發兵討賊。

楚觀簷花曉。舟人擊鼓東。蛟龍噴靈雨。鵬鷲展雄風。此客雲霄士。斯文造化工。捷來君飲此。我亦凱元戎。

題楚觀樓

西風吹感慨。曉氣薄登臨。半壁楚雲立。一川湘雨深。乾坤橫笛影。江海倚樓心。遺恨飛鴻外。南來訪遠音。

安序宋吏部來牧衡陽。某將指聯事好也。會以便郡歸養。獲忝交承。臨發賦詩。湘水千里。傾蓋年華晚。行人早發湘。白雲虹浪小。明月燕花香。明浦春何急。巴山日正長。祝君加一板。我意爲桐鄉。

贈周東卿畫魚

觀君瀟湘圖。起我濠上心。短褐波濤舊。秋雨菰蒲深。

某叨臬衡湘。蒙恩以便郡歸養。肯齋大卿實寓衡。我十年前邦君也。一再見間。卽分南北。五言啓

之所以致今舊。丙縉綵云。李肯齋名節。

瀟湘一夜雨。湖海十年雲。相見皆成老。重逢便作分。啼鶻春浩蕩。回雁曉殷勤。江闊人方健。月明思對君。

幕客載酒舟中卽席序別

故人滿江海。遊子下瀟湘。夢載月千里。意行雲一方。櫓聲人語小。岸影客心長。總是浮萍迹。飛花莫近檣。

用韻謝諸客和章

傳鼓發船去。我秦君向湘。持螯思太白。占鵲問東方。世味秋雲薄。交情江水長。相期天路曉。陣馬度風檣。

湘潭道中贈丁碧眼相士

自詭衡山道士孫。至今句法有軒轅。世人未見題堯廟。盡把昌黎作寓言。

收拾衡雲作羽衣。便如屈子遠遊歸。離騷忘却題天柱。爲立斜陽問翠微。

咸淳甲戌第二朔。予道儲洲里。徐叟方諫。自長沙來爲別。問客幾何。曰半年矣。臨別爲賦。
君爲湘水燕。我作衡陽雁。雁去燕方留。白雲草迷岸。

和衡守宋安序送行詩并序

某將指罔功。叨符便養。初聯寅誼。近依清燕之香。未忝交盟。親授朱提之印。冠蓋一時之盛事。縉紳百世之深情。別集殷勤。歌詞鄭重。夢回雲舍。深懷萱草之詩。思乏雪車。謾和梅花之賦。瞻言作遠。覽擲百榮。

玉立湘西第一州。丹梯小爲嶽雲留。東風城郭人行樂。春日旌旗公出遊。便趁梯香摩碧漢。莫嫌繡影澗清流。兩君相見衣冠好。記取兒孫好話頭。
方共衡雲把酒杯。春風吹向鬱孤臺。雁將回處驚帆落花未開時。怯笛催別草。可堪遊子去。寄梅應爲故人來。臨行笑覓凝香譜。十駕那追逸驥材。

贈萍鄉道士

道上觀行人。半似重相見。古云性相近。性豈不如面。萬形本一性。萬心方一殊。世固難絕聖。亦恐難絕慮。

白髭行

憶昔守宣時。白上一根髮。去之四五年。一化爲七八。今年客衡湘。黑髭已多黃。衆黃忽一白。驚見如陵陽。

白髮已爲常。白髭何足怪。歲月不可歇。雪霜日長大。世人競染緇。厭之固足嗤。誰服蘆菹湯。避老亦奚爲。少老如春秋。造物以爲儔。吾方樂吾天。樂天故不憂。

將母赴贛道西昌

重來鷗閣曉。帆影漲新晴。倚檻雲來去。閉簾花送迎。江湖春汗漫。歲月老崢嶸。手把忘憂草。夔夔繞太清。

快閣遇雨觀瀾

一笑登臨晚。江流接太虛。白漸雲出岫。爭訝雨隨車。慷慨十圍柳。周回千里魚。故園隄好在。夜夢繞吾廬。

題鬱孤臺

城郭春聲闕。樓臺晝影遲。並天浮雪界。蓋海出雲旗。風雨十年夢。江湖萬里思。倚闌時北顧。空翠濕朝曦。

予題鬱孤泉。筦五湖翁姚濂爲之和。翁官滿歸里。因韻贄別。并謝前辱。

巢龜君往好。涌翠我來遲。夜雨呼三韭。春風試一旗。飛花行客夢。芳草故人思。何日五湖上。同看浴海曦。

用韻謝前人

茲遊良邂逅。吾道未透遲。斗野橫雙劍。牛津直兩旗。此風應小住。明日便相思。輸與君家近。扶桑五色曦。

翠玉樓晚雨

晚樓一曲轉梅花。官事無多報放衙。林木蔽虧烟斷續。江流曲折雨橫斜。年華冉冉風前影。歲莫悠悠客

裏家一雁近從沙鷺落，更饒片雪入天涯。

翠玉樓觀雪

矯矯臨清泚，濛濛認翠微。絳春生客袖，鐵冷上戎衣。柳眼驚何老，梅花覺半肥。新來有公事，白戰破重圍。

翠玉樓和胡端逸韻

客影魚千里，年華柳十圍。白雲栖石密，黃鶴出烟微。江海秋風老，湖山晚日暉。鬱孤臺上望，野闊憤初肥。

翠玉樓

昏鴉何處落，野渡少人行。黃葉聲在地，青山影入城。江湖行客夢，風雨故鄉情。試問南來信，梅花三兩英。

合江樓

天上名鷄尾，人間說虎頭。春風千萬岫，秋水兩三洲。客晚驚黃葉，官閑笑白鷗。雙江日東下，我欲賦扁舟。

西楚驚鴻晚，東淮落木秋。蒸湘今石鼓，句宛古宣州。白日聊清賞，青山總舊遊。不知滄海水，何處接天流。

皂蓋樓

一水樓臺繞，半空圖書開。蝸涎行薜荔，雀影上苟苔。碧落人千載，青山酒一杯。晚烟看不盡，待月却歸來。

石樓

曉色重簾捲，春聲疊鼓催。長垣連草樹，遠水照樓臺。八境烟濃淡，六街人往來。平安消息好，看到嶺頭梅。

馬祖巖

曾將飛錫破苔痕。一片雲根鎖洞門。山外人家山下路。石頭心事付無言。

禪關

秋風吹日上禪關。路入松花第一彎。只願四時烟霧少。滿城樓閣見青山。

吸江

絕壁千尋俯雪湍。春花秋草有鬢鬢。當年誤著蒲團坐。惹得人稱馬祖巖。

塵外

半山風雨截江城。未脫人間總是塵。中夜起看衣上月。青天如水露華新。

雲端

半空夭矯起層臺。傳道劉安車馬來。山上自晴山下雨。倚闌平立看風雷。

清江何漢英再見於空同讀歐陽先生詩感慨爲賦

采芝雲滿山。采壁瀑垂澗。當年有清微。爲寄南來雁。雁去人已逝。歲月割云晏。流水失聲音。西河老憂患。往日志士悲。窮途行子慣。君爲梁宋遊。我復江漢宦。十年耿相逢。千里欠一盼。玄機寄糟粕。美疢墮芻豢。贈子歸東方。聊薦吳興苒。

送曹倅巖山官滿歸里

名大發
贛倅

春陵光霽落蒼苔。葛水神仙立翠槐。萬里雲霞麒麟路。三年風月鳳凰臺。與同老子復不淺。歌曰先生歸去來。庾嶺梅花開漸徧。一枝就與寄蓬萊。

和前人賦別

翠松三萬頃。松雪著神仙。柳院催金鑰。江花送玉鞭。曉巖雲壁立。晚棹浪規圓。未了醉翁事。重尋穎上田。當年童子見。今見二毛翁。海月三秋別。江雲一日同。鷗心馳舍北。龍尾曳天東。定有延和奏。南來寄一通。

贈明脈蕭信叔

枚乘擅七發。郭玉明四難。微言起沈痼。此道今漫漫。云何東海生。而乃緒真要。晝然以神遇。契彼鏡經妙。我欲炊彫胡。俯鑿菊水泉。壽彼方輿人。六氣何由讐。

贈林碧鑑相士

咸陽宮中四尺鏡。照人五臟何炯炯。桑田滄海千餘年。百鍊依然化爲鏞。君從何處得此物。鑄就雙瞳敵秋月。向未照心今照形。不事瀾翻三寸舌。遠衝風雪肯我過。看來猶未深知我。我方簞笠立釣磯。萬事浮雲都勘破。噫嘻吁。只今神目鬼眼紛道途。暗中許負應盧胡。試問何如林家老碧鑑。不知天津橋上復有龍鍾無。

送吉州陳守解任

美人策良馬，弭節螺江湄。歲年忽晚晚，桃李已成蹊。遙遙一水間，復復東與西。晴川夾脩楊，行舟何能維。朱鳳翔海山，層漢揚音徽。高岡有梧桐，駕言覽朝暉。贈君以白雲，白雲不我持。贈君以明月，明月不我携。白雲與明月，遠道相追隨。

贈蜀醫鍾正甫

炎皇覽衆草，異種多西州。爲君望岷岷，使我雙泪流。向來秦越人，朝洛夕邯鄲。子持鵲經來，自西亦徂南。江南有羈羽，豈不懷故營。何當同皇風，六氣和且平。

改題萬安縣凝祥觀

古道松花空翠香，風前鬢影照滄浪。飛泉半壁朝雲濕，啼鳥滿山春日長。須信神仙元有國，不知蠻觸是
何鄉。道人橫笛招歸鶴，坐到斜暉上壁璫。相如遊獵賦華璫壁璫注壁璫以玉爲椽頭

西昌倪氏有山谷書杜陵山水圖障歌作江山堂堂廢其後人以黃書求題跋感慨一絕

杜二已無黃九去，長歌大字落江山。百年風物今何似，春水晚烟飛白鷗。

山中再次胡德昭韻

不將顏色汗黃金，落得灞橋驢上吟。是處江山生酒興，滿天風雪得梅心。觥籌堂裏春聲沸，燈火林臯夜

色深。人世可能行樂耳。重游不用上晴陰。
人生柳絮鬪堅牢。過眼春光歎伯勞。蜀道謾傳千古險。廬山方許一人高。眼前見赤徒妨道。耳後生風未
當豪。明月盧花隨處有。扁舟自在不須篙。
曾見尊前此客哉。笑携麈尾拂莓苔。水邊飛雁年年見。湖上新亭日日來。醉菊醉餘披草坐。探梅吟罷帶
花回。北厓尙被剛風隔。笑按匆匆上馬杯。

山中泛舟觴客

便作乘槎客。蕭蕭骨髮清。尊前山月過。笛裏水風生。半夜魚龍沸。三秋河漢明。雪堂眠二客。夢與白鷗盟。

病中作

六月廿四夜。人間熱欲炊。病懷如酒困。倦睫似書癡。夢與千年接。心隨萬里馳。客來相問訊。寄語有新詩。

山中卽事

山中方雨笠。天外忽晴絲。夕釣江澄練。春行路布棋。乾坤供俯仰。歲月任差池。有酒如澆在。何妨日問奇。

挽巽齋先生歐陽大著

徘徊河西上。月落衆星稀。哲人萎中道。雨絕將安之。昔者麗鴻藻。玉振含清暉。名理軼晉魏。雅言襲軻思。
連駕覲馳道。並坐侍端闈。及門懷燕婉。升堂接逶迤。方期黃鵠翔。忽作朝露晞。黔婁不蓋體。延陵有遺悲。

層阿翳寒樹。平楚暖布微。帷幌衣廣柳。縞冠涕如糜。水從章江去。雲遶楚山飛。已矣如有聞。斯文不在茲。
送劉其發入蜀

秋風淒已寒。蜀道阻且長。虎狼伏原野。欲濟川無梁。客從何處來。云我之西方。蕭蕭駙驢鳴。熠熠湛盧光。
昔時榮華地。今爲爭戰場。將軍揚天戈。壯士發戎行。江南有羈鳥。悠悠懷故鄉。駕言與子遊。雲天何茫茫。
周蒼厓入吾山作圖詩贈之

三生石上結因緣。袍笏橫斜學米顛。漁父幾忘山下路。仙人時訪嶺頭船。鳥猿白鶴無根樹。淡月疎星一線天。爲我醉呼添濛濛。倦來平臥看雲烟。

題羅次說竹巖摘藁

游子西南來。出門道何悠。文章會有用。意氣輕身謀。紛紛食梁肉。藜藿當其憂。君看百川水。何處不東流。

挽劉知縣

名元高。字仲山。寶齊之子。

玉海淵源懿。金閨步武高。功名千載意。翰墨一時豪。天馬含風骨。秋鷹折羽毛。相逢俱白髮。流涕濕征袍。

古樂府

壽人母

珊瑚香點胭脂雪。芙蓉帳壓春雲熱。明朝早弄燈前月。漱澹九霞碧藕析。璇杓高聳婺女明。金波漾曉輝。郎星赤瓊曲裏長眉青。頭上更有經池君。六九五十四東風。西蟠桃花花未紅。鳴鸞鼓玉聲玲瓏。綠毛蒙

茸蓮水龜。爛爛五色人間稀。春多瑞葉不敢飛。冰壺光滿魚龍轉。笑中低舞玉釵燕。明年今日長秋殿。安輿入侍金桃宴。

齊天樂

慶湖北漕知鄂州李樓峯

南樓月轉銀河曙。玉簫又吹梅早。鸚鵡沙晴。蒲萄水暖。一縷燕香清裊。瑤池春透。想桃露霏霞。菊波沁曉。袍錦風流。御仙花帶瑞虹繞。玉關人正未老。喚磯頭黃鶴。岸巾談笑。劍拂淮清。藥橫楚黛。雨洗一川烟草。印黃似斗。看半硯薔薇。滿鞍楊柳。沙路歸來。金貂蟬翼小。

齊天樂

甲戌湘憲種德堂燈屏

夜來早得東風信。瀟湘一川新綠。柳色含晴。梅心沁暖。春淺千花如束。銀蟬乍浴。正沙雁將還。海鼈初蝨。雲擁旌旗。笑聲人在畫闌曲。星虹瑤樹縹緲。珮環鳴碧。落瑞籠華屋。露耿銅虬。冰翻鐵馬。簾幙光搖金粟。遲遲倚竹。更爲把瑤樽。滿斟醞醑。回首宮蓮。夜深歸院燭。

文山先生全集卷之三

對策

御試策一道有題

蓋聞道之大原出於天。超乎無極太極之妙。而實不離乎日用事物之常。根乎陰陽五行之蹟。而實不外乎仁義禮智。剛柔善惡之際。天以澄著地以靖謐。人極以昭明。何莫由斯道也。聖聖相傳。同此一道。由修身而治人。由致知而齊家。治國平天下。本之精神心術。達之禮樂刑政。其體甚微。其用則廣。歷千萬世而不可易。然功化有淺深。證效有遲速者。何歟。朕以寡昧。臨政願治。于茲歷年。志愈勤。道愈遠。宵乎其未朕也。朕心疑焉。子大夫明先聖之術。咸造在廷。必有切至之論。朕將虛己以聽。三墳而上。大道難名。五典以來。常道始著。日月星辰順乎上。鳥獸草木若於下。九功惟敘。四夷來王。百工熙熙。庶事康哉。非聖神功化之驗歟。然人心道心。寂寥片語。其危微精一之妙。不可以言。旣歟。誓何爲而畔。會何爲而疑。俗何以不若結繩。治何以不若畫像。以政凝民。以禮凝士。以天保采微。治內外。憂勤危懼。僅克有濟。何帝王勞逸之殊歟。抑隨時損益。道不同歟。及夫六典建官。蓋爲民極。則不過曰治。曰教。曰禮。曰政。曰刑。曰事而已。豈道之外。又有法歟。自時厥後。以理欲之消長。驗世道汗隆。陰濁之日常多。陽明之日常少。刑名雜霸。佛老異端。

無一毫幾乎道。駁乎無以議爲。然務德化者。不能無上郡鴈門之警。施仁義者。不能無末年輪臺之悔。甚而無積仁累德之素。紀綱制度。爲足維持憑藉者。又何歟。朕上嘉下樂。夙興夜寐。靡遑康寧。道久而未洽。化久而未成。天變洊臻。民生寡遂。人才乏而士習浮。國計殫而兵力弱。符澤未清。邊備孔棘。豈道不足以御世歟。抑化裁推行有未至歟。夫不息則久久則徵。今胡爲而未徵歟。變則通通則久。今其可以屢更歟。子大夫熟之復之。勿激勿泛。以副朕詳延之意。寶祐四年五月八日。

臣對。恭惟皇帝陛下。處常之久。當泰之交。以二帝三王之道。會諸心。將三紀于此矣。臣等鼓舞於鳶飛魚躍之天。皆道體流行中之一物。不自意得旅進于陛下之庭。而陛下且嘉之。論道道之不行也久矣。陛下之言及此。天地神人之福也。然臣所未解者。今日已當道久化成之時。道洽政治之候。而方歎焉有志。勤道遠之疑。豈望道而未之見耶。臣請泝太極動靜之根。推聖神功化之驗。就以聖問中不息一語。爲陛下勉。幸陛下試垂聽焉。臣聞天地與道同一不息。聖人之心與天地同一不息。上下四方之宇。往古來今之宙。其間百千萬變之消息盈虛。百千萬事之轉移闔闢。何莫非道。所謂道者。一不息而已矣。道之隱於渾淪。藏於未瑀。未琢之天。當是時。無極太極之體也。自太極分而陰陽。則陰陽不息。道亦不息。陰陽散而五行。則五行不息。道亦不息。自五行又散。而爲人心之仁義禮智。剛柔善惡。則乾道成男。坤道成女。穹壤間生生化化之不息。而道亦與之相爲不息。然則道一不息。天地亦一不息。天地之不息。固道之不息者爲

之。聖人出而爲天地立心。爲生民立命。爲往聖繼絕學。爲萬世開太平。亦不過以一不息之心充之。充之而修身治人。此一不息也。充之而致知。以至齊家治國平天下。此一不息也。充之而自精神心術。以至於禮樂刑政。亦此一不息也。自有三墳五典以來。以至於太平六典之世。帝之所以帝王之所以王。皆自其一念之不息者始。秦漢以降。而道始離。非道之離也。知道者之鮮也。雖然。其間英君諠辟。固有號爲稍稍知道矣。而又沮於行道之不力。知務德化矣。而不能不尼之以黃老。知施仁義矣。而不能不遏之以多欲。知四年行仁矣。而不能不畫之以近效。上下二三十年間。牽補過時。架漏度日。毋怙夫駁乎。無以議爲也。獨惟我朝。式克至于今日。休陛下傳列聖之心。以會藝祖之心。會藝祖之心。以參帝王之心。參天地之心。三十三年間。臣知陛下不貳以二。不參以三。茫乎天運。宵爾神化。此心之天。混兮關兮。其無窮也。然臨御浸又持循浸熟。而筭計見效。猶未有以大快聖心者。上而天變不能以盡無。下而民生不能以盡遂。人才士習之未甚純。國計兵力之未甚充。以至盜賊兵戈之警。所以貽宵旰之憂者。尤所不免。然則行道者。殆無驗也邪。臣則以爲道非無驗之物也。道之功化甚深也。而不可以爲迂。道之證效甚遲也。而不可以爲速。維天之命。於穆不已。天地之所以爲天地也。之德之純。純亦不已。聖人之所以爲聖人也。爲治願力行。何如耳。焉有行道於歲月之暫。而遽責其驗之爲迂且遠邪。臣之所望於陛下者。法天地之不息而已。姑以近事言。則責躬之言方發。而陰雨旋霽。是天變未嘗不以道而弭也。賑饑之典方舉。而都民歡呼。是民

生未嘗不以道而安也。論辯建明之詔一頒，而人才士習，稍稍渾厚。招填條具之旨一下，而國計兵力，稍稍充實。安吉慶元之小獲，維揚瀘水之雋功，無非憂勤於道之明驗也。然以道之極功論之，則此淺效耳。速效耳。指淺效速效，而遽以爲道之極功，則漢唐諸君之用心是也。陛下行帝而帝，行王而王，而肯襲漢唐事邪？此臣所以贊陛下之不息也。陛下儻自其不息者而充之，則與陰陽同其化，與五行同其運，與乾坤生生化化之理，同其無窮。雖充而爲三紀之風移俗易，可也。雖充而爲四十年固空刑措，可也。雖充而爲百年德洽於天下，可也。雖充而爲十世過曆億萬年敬天之休，可也。豈止如聖問八者之事，可徐就理而已哉？臣謹昧死上懇對。臣伏讀聖策曰：蓋聞道之大原出於天，超乎無極大極之妙，而實不離乎日用事物之常，根乎陰陽五行之蹟，而實不外仁義禮智剛柔善惡之際。天以澄著地以靖謐，人極以昭明，何莫由斯道也。聖聖相傳，同此一道。由修身而治人，由致知而齊家治國平天下。本之於精神心術，達之於禮樂刑政，其體甚微，其用則廣。歷千萬世而不可易。然功化有淺深，證效有遲速。何歟？朕以寡昧，臨政願治。于茲歷年，志愈勤，道愈遠，宵乎其未朕也。朕心疑焉。子大夫明先王之術，咸造在庭，必有切至之諭。朕將虛己以聽。臣有以見陛下遡道之本原，求道之功效，且疑而質之臣等也。臣聞聖人之心，天地之心也。天地之道，聖人之道也。分而言之，則道自道，天地自天地，聖人自聖人。合而言之，則道一不息也，天地一不息也，聖人亦一不息也。臣請遡其本原言之。茫茫堪輿，塊扎無垠，渾渾元氣，變化無端。人心仁義禮智。

之性未賦也。人心剛柔善惡之氣未稟也。當是時。未有人心。先有五行。未有五行。先有陰陽。未有陰陽。先有無極太極。未有無極太極。則太虛無形。沖漠無朕。而先有此道。未有物之先。而道具焉。道之體也。既有物之後。而道行焉。道之用也。其體則微。其用甚廣。卽人心而道在人心。卽五行而道在五行。卽陰陽而道在陰陽。卽無極太極。而道在無極太極。貫顯微。兼費隱。包小大。通物我。道何以若此哉。道之在天下。猶水之在地。地中無往而非水。天下無往而非道。水一不息之流也。道一不息之用也。天以澄著。則日月星辰循其經。地以靖謐。則山川草木順其常。人極以昭明。則君臣父子安其倫。流行古今。綱紀造化。何莫由斯道也。一日而道息焉。雖三才不能以自立。道之不息。功用固如此夫。聖人體天地之不息者也。天地以此道而不息。聖人亦以此道而不息。聖人立不息之體。則歛於修身。推不息之用。則散於治人。立不息之體。則寓於致知以下之工夫。推不息之用。則顯於齊家治國平天下之效驗。立不息之體。則本之精神心術之微。推不息之用。則達之禮樂刑政之著。聖人之所以爲聖人者。猶天地之所以爲天地也。道之在天地間者。常久而不息。聖人之於道。其可以頃刻息邪。言不息之理者。莫如大易。莫如中庸。大易之道。至於乾道變化。各正性命。保合太和。而聖人之論法天。乃歸之自強不息。中庸之道。至於溥博淵泉。上天之載。無聲無臭。而聖人之論配天地。乃歸之不息則久。豈非乾之所以剛健中正純粹精也者。一不息之道耳。是以法天者。亦以一不息。中庸之所以高明博厚悠久無疆者。一不息之道耳。是以配天地者。亦以一不

息以不息之心。行不息之道。聖人卽不息之天地也。陛下臨政願治于茲歷年。前此不息之歲月。猶日之自朝而午。今此不息之歲月。猶日之至午而中。此正勉強行道。大有功之日也。陛下勿謂數十年間。我之所以擔當宇宙。把握天地。未嘗不以此道。至于今日。而道之驗如此。其迂且遠矣。以臣觀之。道猶百里之途也。今日則適六七十之候也。進於道者。不可以中道而廢。游於途者。不可以中途而畫。孜孜矻矻。而不自已焉。則適六七十里者。固所以爲至百里之階也。不然。自止於六七十里之間。則百里雖近。焉能以一武到哉。道無淺功化。行道者何可以深爲迂。道無速證效。行道者何可以遲爲遠。惟不息。則能極道之功。惟不息。則能極道之證效。氣機動盪於三極之間。神采灌注於萬有之表。要自陛下此一心始。臣不暇遠舉。請以仁宗皇帝事爲陛下陳之。仁祖一不息之天地也。康定之詔曰。祇勤抑畏。慶曆之詔曰。不敢荒寧。皇祐之詔曰。緬念爲君之難。深惟履位之重。慶曆不息之心。卽康定不息之心也。皇祐不息之心。卽慶曆不息之心也。當時仁祖以道德感天心。以福祿勝人力。國家綏靜。邊鄙寧謐。若可以已矣。而猶未也。至和元年。仁祖之三十三年也。方且露立仰天。以畏天變。碎通天犀。以救民生。處賈黯吏銓之職。擢公弼殿柱之名。以厚人才。以昌士習。納景初減用之言。聽范鎮新兵之諫。以裕國計。以強兵力。以至講周禮。薄征緩刑。而拳拳以盜賊爲憂。選將帥。明紀律。而汲汲以西戎北虜爲慮。仁祖之心。至此而不息。則與天地同其悠久矣。陛下之心。仁祖之心也。范祖禹有言。欲法堯舜。惟法仁祖。臣亦曰。欲法帝王。惟法仁祖。法仁祖。

則可至天德。願加聖心焉。臣伏讀聖策曰：三墳以上云云。豈道之外又有法歟。臣有以見陛下慕帝王之
功化證效。而亦意其各有淺深遲速也。臣聞帝王行道之心。一不息而已矣。堯之兢兢。舜之業業。禹之孜孜。
湯之慄慄。文王之不已。武王之無貳。成王之無逸。皆是物也。三墳遠矣。五典猶有可論者。臣嘗以五典
所載之事推之。常是時。日月星辰之順。以道而順也。鳥獸草木之若。以道而若也。九功惟叙。以道而叙也。
四夷來王。以道而來王也。百工以道而熙。庶事以道而康。光天之下。至於海隅蒼生。蓋無一而不拜帝道
之賜矣。垂衣拱手。以自逸于土階巖廊之上。夫誰曰不可。而堯舜不然也。方且考績之法。重於三歲。無歲
而敢息也。授曆之命。嚴於四時。無月而敢息也。凜凜乎一日二日之戒。無日而敢息也。此猶可也。授受之
際。而堯之命舜。乃曰：允執厥中。夫謂之執者。戰兢保持而不敢少放之謂也。味斯語也。則堯之不息。可見
已。河圖出矣。洛書見矣。執中之說。未聞也。而堯獨言之。堯之言贅矣。而舜之命禹。乃復益之以人心惟危。
道心惟微。惟精惟一之。三言。夫致察於危微精一之間。則其戰兢保持之念。又有甚於堯者。舜之心。其不
息。又何如哉。是以堯之道化。不惟驗於七十年在位之日。舜之道化。不惟驗於五十年視阜之時。讀萬世
永賴之語。則唐虞而下。數千百年間。天得以爲天地。地得以爲地。人得以爲人者。皆堯舜之賜也。然則功化
抑何其深。證效抑何其遲歟。降是而王。非固勞於帝者也。太樸日散。風氣日開。人心之機械日益巧。世變
之乘除不息。而聖人之所以綱維世變者。亦與之相爲不息焉。俗非結繩之淳也。治非畫象之古也。師不

得不誓。侯不得不會。民不得不凝。之以政。士不得不凝。之以禮。內外異治。不得不以采薇天保之治治之。以至六典建官。其所以曰治。曰政。曰禮。曰教。曰刑。曰事者。亦無非扶世道而不使之窮耳。以勢而論之。則夏之治。不如唐虞。商之治。又不如夏。周之治。又不如商。帝之所以帝者。何其逸。王之所以王者。何其勞。慄慄危懼。不如非心黃屋者之爲適也。始於憂勤。不如恭己南面者之爲安也。然以心而觀。則舜之業業。卽堯之兢兢。禹之孜孜。卽舜之業業。湯之慄慄。卽禹之孜孜。文王之不已。武王之無貳。成王之無逸。何莫非兢兢業業。孜孜慄慄之推也。道之散於宇宙間者。無一日息。帝王之所以行道者。亦無一日息。帝王之心。天地之心也。尙可以帝者之爲逸。而王者之爲勞耶。臣願陛下求帝王之道。必求帝王之心。則今日之功利證效。或可與帝王一視矣。臣伏讀聖策曰。自時厥後云云。亦足以維持憑藉者。何歟。臣有以見陛下陋漢唐之功化證效。而且爲漢唐世道發一慨也。臣聞不息則天。息則人。不息則理。息則欲。不息則陽明。息則陰濁。漢唐諸君。天資敏。地位高。使稍有進道之心。則六五帝。四三王。亦未有難能者。奈何天不足以制人。而天反爲人所制。理不足以御欲。而理反爲欲所御。陽明不足以勝陰濁。而陽明反爲陰濁所勝。是以勇於進道者少。沮於求道者多。漢唐之所以不唐虞三代也歟。雖然是爲不知道者言也。其間亦有號爲知道者矣。漢之文帝。武帝。唐之太宗。亦不可謂非知道者。然而亦有議焉。先儒嘗論漢唐諸君。以公私義利分數多少爲治亂。三君之心。往往不純乎天。不純乎人。而出入於天人之間。不純乎理。不純乎欲。而出

入乎理欲之間。不純乎陽明。不純乎陰濁。而出入乎陽明陰濁之間。是以專務德化。雖足以陶後元泰和之風。然而尼之以黃老。則鴈門上郡之警不能無。外施仁義。雖足以致建元富庶之盛。然而遏之以多欲。則輪臺末年之悔不能免。四年行仁。雖足以開真觀升平之治。然而畫之以近效。則紀綱制度。曾不足爲再世之憑藉。蓋有一分之道心者。固足以就一分之武功。有一分之人心者。亦足以召一分之事變。世道汗隆之分數。亦係於理欲消長之分數而已。然臣嘗思之。漢唐以來。爲道之累者。其大有二。一曰雜伯。二曰異端。時君世主。有志於求道者。不陷於此。則陷於彼。姑就三君而言。則文帝之心。異端累之也。武帝太宗之心。雜伯累之也。武帝無得於道。憲章六經。統一聖真。不足以勝其神仙土木之私。干戈刑罰之慘。其心也荒。太宗全不知道。閹門之恥。將相之誇。末年遼東一行。終不能以克其血氣之暴。其心也驕。雜伯一念。憧憧往來。是固不足以語常久不息之事者。若文帝。稍有帝王之天資。稍有帝王之地步。一以君子長者之道待天下。而晁錯輩刑名之說。未嘗一動其心。是不累於雜伯矣。使其以二三十年恭儉之心。而移之以求道。則後元氣象。且將駸駸乎商周。進進乎唐虞。奈何帝之純心。又間於黃老之清淨。是以文帝僅得爲漢唐之令主。而不得一儕於帝王。嗚呼。武帝太宗。累於雜伯。君子固不敢以帝王事望之。文帝不爲雜伯所累。而不能不累於異端。是則重可惜已。臣願陛下監漢唐之跡。必監漢唐之心。則今日之功化證效。將超漢唐數等矣。臣伏讀聖策曰。朕上嘉下樂云云。抑化裁推行。有未至歟。臣有以見陛下念今日八

者之務。而甚有望乎爲道之驗也。臣聞天變之來。民怨招之也。人才之乏。士習蠹之也。兵力之弱。國計屈之也。虜寇之警。盜賊因之也。夫陛下以上嘉下樂之勤。夙興夜寐之勞。悵歲月之逾邁。亦欲以少見吾道之驗耳。俯視一世。未能差強人意。八者之弊。臣知陛下爲此不滿也。陛下分而以八事問。臣合而以四事對。請得以熟數之於前。何謂天變之來。民怨招之也。天視自我民視。天聽自我民聽。天明畏自我民威。人心之休戚。天心所因以爲喜怒者也。熙寧間大旱。是時河陝流民入京師。監門鄭俠畫流民圖以獻。且曰。陛下南征北伐。皆以勝捷之圖來上。料無一人以父母妻子遷移困頓。皇皇不給之狀爲圖以進者。覽臣之圖。行臣之言。十日不雨。乞正欺君之罪。上爲之罷新法十八事。京師大雨八日。天人之交。間不容髮。載在經史。此類甚多。陛下以爲今之民生何如邪。今之民生困矣。自瓊林大盈積於私貯。而民困。自建章通天。頻於營繕。而民困。自獻助疊見於豪家巨室。而民困。自和糴不問於閭閻下戶。而民困。自所至貪官暴吏。視吾民如家雞圈豕。惟所咀啖。而民困。嗚呼。東南民力竭矣。書曰。怨豈在明。不見是圖。今尙可謂之不見乎。書曰。怨不在大。亦不在小。今尙可謂之小乎。生斯世。爲斯民。仰事俯育。亦欲各遂其父母妻子之樂。而操斧斤。淬鋒鏑。日夜思所以斬伐其命脉者。滔滔皆是。然則臘雪靳瑞。蟄雷愆期。月犯於木。星殞爲石。以至土雨地震之變。無怪夫屢書不一書也。臣願陛下持不息之心。急求所以爲安民之道。則民生旣和。天變或於是而弭矣。何謂人才之乏。士習蠹之也。臣聞窮之所養。達之所施。幼之所學。壯之所行。今日

之修於家。他日之行於天子之庭者也。國初諸老。嘗以厚士習爲先務。寧收落韻之李迪。不取鑿說之賈邊。寧收直言之蘇轍。不取險怪之劉幾。建學校。則必欲崇經術。復鄉舉。則必欲參行藝。其後國子監。取湖學法。建經學。治道邊防。水利等齋。使學者因其名以求其實。當時如程頤。徐積。呂希哲。皆出其中。嗚呼。此元祐人物之所從出也。十習厚薄。最關人才。從古以來。其語如此。陛下以爲今之士習。何如邪。今之士大夫之家。有子而教之。方其幼也。則授其句讀。擇其不戾於時好。不震于有司者。俾熟復焉。及其長也。細書爲工。累牘爲富。持試於鄉校者。以是較藝於科舉者。以是取青紫而得車馬也。以是父兄之所教詔。師友之所講明。利而已矣。其能卓然自拔於流俗者。幾何人哉。心術旣壞於未仕之前。則氣節可想於旣仕之後。以之領郡邑。如之何責其爲卓茂黃霸。以之鎮一路。如之何責其爲蘇章何武。以之曳朝紳。如之何責其爲汲黯望之。奔競於勢要之路者。無怪也。趨附於權貴之門者。無怪也。牛維馬繫。狗苟蠅營。患得患失。無所不至者。無怪也。悠悠風塵。靡靡媮俗。清芬消歇。濁滓橫流。惟皇降衷。秉彝之懿萌。蘖於牛羊斧斤相尋之衝者。其有幾哉。厚今之人才。臣以爲變今之士習。而後可也。臣願陛下持不息之心。急求所以爲淑士之道。則士風一淳。人才或於是而可得矣。何謂兵力之弱。國計屈之也。謹按國史。治平間。遣使募京畿淮南兵。司馬光言。邊臣之請兵無窮。朝廷之募兵無已。倉庫之粟帛有限。百姓之膏血有涯。願罷招禁軍。訓練舊有之兵。自可備禦。臣聞古今天下。能免於弱者。必不能免於貧。能免於貧者。必不能免於弱。一

利之興。一害之伏。未有交受其害者。今之兵財。則交受其害矣。自東海城築。而調淮兵以防海。則兩淮之兵不足。自襄樊復歸。而併荆兵以城襄。則荆湖之兵不足。自腥氣染於漢水。冤血濺於寶峯。而正軍忠義。空於死徙者過半。則川蜀之兵又不足。江淮之兵。又抽而入蜀。又抽而實荆。則下流之兵。愈不足矣。荆湖之兵。又分而策應。分而鎮撫。則上流之兵。愈不足矣。夫國之所恃以自衛者。兵也。而今之兵。不足如此。國安得而不弱哉。扶其弱而歸之強。則招兵之策。今日直有所不得已者。然召募方新。調度轉急。問之大農。大農無財。問之版曹。版曹無財。問之餉司。餉司無財。自歲幣銀絹外。未聞有畫一策爲軍食計者。是則弱矣。而又未免於貧也。陛下自肝鬲。近又創一安邊太平庫。專一供軍。此藝祖積縑帛以易賊首之心也。仁宗皇帝。出錢帛以助兵革之心也。轉易之間。風采立異。前日之弱者。可強矣。然飛芻輓粟。給餉餽糧。費於兵者幾何。而琳宮梵宇。照耀湖山。土木之費。則漏卮也。列竈雲屯。樵蘇後爨。費於兵者幾何。而霓裳羽衣。靡金飾翠。宮庭之費。則尾閭也。生熟口券。月給衣糧。費於兵者幾何。而量珠輦玉。侍寵希恩。戚畹之費。則濫觴也。蓋天下之財。專以供軍。則財未有不足者。第重之以浮費。重之以冗費。則財始瓶罄而囁恥矣。如此。則雖欲足兵。其何以給兵耶。臣願陛下。持不息之心。急求所以爲節財之道。則財計以充。兵力或於是而可強矣。何謂虜寇之警。盜賊因之也。謹按國史。紹興間。楊么寇洞庭。連跨數郡。大將王瓌不能制。時僞齊挾虜使李成寇襄漢。么與交通。朝廷患之。始命岳飛。措置上流。已而逐李成。擒楊么。而荆湖平。臣聞外

之虜寇。不能爲中國患。而其來也。必待內之變。內之盜賊。亦不能爲中國患。而其起也。必將納外之侮。盜賊而至於通虜寇。則腹心之大患也已。今之所謂虜者。固可畏矣。然而逼我蜀。則蜀帥策瀘水之勳。窺我淮。則淮帥奏維揚之凱。狼子野心。固不可以一捷止之。然使之無得棄去。則中國之技。未爲盡出其下。彼亦猶畏中國之有其人也。獨惟舊海。在天一隅。逆雛穴之者。數年于茲。颶風瞬息。一葦可航。彼未必不朝夕爲趁浙計。然而未能焉。短於舟。踈於水。懼吾唐島之有李寶在耳。然洞庭之湖。烟水沉寂。而浙右之湖。濤瀾沸驚。區區妖孽。且謂有楊么之漸矣。得之京師之耆老。皆以爲此寇。出沒倏閃。往來翕霍。駕舟如飛。運柁如神。而我之舟師不及焉。夫東南之長技。莫如舟師。我之勝兀朮於金山者。以此。我之斃逆亮於采石者。以此。而今此曹反挾之以制我。不武甚矣。萬一或出於楊么之計。則前日李成之不得志於荊者。未必今日之不得志於浙也。曩聞山東荐饑。有司貪市權之利。空蘇湖根本以資之。廷紳猶謂互易。安知無爲其鄉道者。一夫登岸。萬事瓦裂。又聞魏村江灣。福山三寨。水軍興販鹽課。以資逆雛。廷紳猶謂是。以扞衛之師。爲商賈之事。以防拓之卒。開鄉道之門。憂時識治之見。往往如此。肘腋之蜂蟻。懷袖之蛇蝎。是其可以忽乎哉。陛下近者。命發運兼憲。合兵財而一其權。是將爲滅此朝食之圖矣。然屯海道者。非無軍。控海道者。非無將。徒有王瓊數年之勞。未聞岳飛八日之捷。子太叔平符澤之盜。恐不如此。長此不已。臣懼爲李成開道地也。臣願陛下持不息之心。求所以弭寇之道。則寇難一清。邊備或於是而可寬矣。臣伏讀

聖策曰。夫不息則久。久則徵。今胡爲而未徵歟。變則通。通則久。今其可以屢更歟。臣有以見陛下久於其道。而甚有感乎中庸大易之格言也。臣聞天久而不墜。也以運。地久而不隕。也以轉。水久而不腐。也以流。日月星辰而常新。也以行。天下之凡不息者。皆以久也。中庸之不息。卽所以爲大易之變通。大易之變通。所以驗中庸之不息。變通者之久。固肇於不息者之久也。蓋不息者其心。變通者其跡。其心不息。故其跡亦不息。游乎六合之內。而縱論乎六合之外。生乎百世之下。而追想乎百世之上。神化天造。天運無端。發微不可見。充周不可窮。天地之所以變通。固自其不息者爲之。聖人之久於其道。亦法天地而已矣。天地以不息而久。聖人亦以不息而久。外不息而言久焉。皆非所以久也。臣嘗讀無逸一書。見其享國之久者。有四君焉。而其中三君爲最久。臣求其所以久者。中宗之心。嚴恭寅畏也。高宗之心。不敢荒寧也。文王之心。無淫于逸。無遊于畋也。是三君者。皆無逸而已矣。彼之無逸。臣之所謂不息也。一無逸而其效如此。然則不息者。非所以久歟。陛下之行道。蓋非一朝一夕之暫矣。寶紹以來。則涵養此道。端平以來。則發揮此道。嘉熙以來。則把握此道。嘉熙而淳祐。淳祐而寶祐。十餘年間。無非持循此道之歲月。陛下處此也。庭燎未輝。臣知其宵衣以待。日中至昃。臣知其玉食弗遑。夜漏已下。臣知其丙枕無寐。聖人之運。亦可謂不息矣。然既往之不息者易。方來之不息者難。久而不息者易。愈久而愈不息者難。所臨大庭。而辟星布。陛下之心。此時固不息矣。暗室屋漏之隱。試一警省。則亦能不息否乎。日御經筵。學士雲集。陛下之心。此時固

不息矣。宦官女子之近。試一循察。則亦能不息否乎。不息於外者。固不能保其不息於內。不息於此者。固不能保其不息於彼。乍勤乍怠。乍作乍輟。則不息之純心間矣。如此。則陛下雖欲久。則證。臣知中庸九經之治。未可以朝夕見也。雖欲通則久。臣知繫辭十三卦之功。未可以歲月計也。淵螭夔濩之中。虛明應物之地。此全在陛下自斟酌。自執持。頃刻之力不繼。則懲久之功俱廢矣。可不戒哉。陛下之所以策臣者。悉矣。臣之所以忠於陛下者。亦既略陳於前矣。而陛下策之篇終復曰。子大夫熟之復之。勿激勿泛。以副朕詳延之意。臣伏讀聖策至此。陛下所謂詳延之意。蓋可識已。夫陛下自即位以來。未嘗以直言罪士。不惟不罪之以直言。而且導之以直言。臣等嘗恨無由以至天子之庭。以吐其素所蓄積。幸見錄於有司。得以借玉階方寸地。此正臣等披露肺腑之日也。方將明目張膽。審審諤諤。言天下事。陛下乃戒之以勿激勿泛。夫泛固不切矣。若夫激者。忠之所發也。陛下胡併與激者之言。而厭之邪。厭激者之言。則是將胥臣等而爲容容唯唯之歸邪。然則臣將爲激者歟。將爲泛者歟。抑將遷就陛下之說。而姑爲不激不泛者歟。雖然。奉對大庭。而不激不泛者。固有之矣。臣於漢得一人焉。曰董仲舒。方武帝之策仲舒也。慨然以欲聞大道之要爲問。帝之求道。其心蓋甚銳矣。然道以大言。帝將求之虛無渺冥之鄉也。使仲舒於此。過言之則激。淺言之則泛。仲舒不激不泛。得一說曰正心。武帝方將求之虛無渺冥之鄉。仲舒乃告之以真實淺近之理。茲陛下所謂切至之論也。奈何武帝自恃其區區英明之資。超偉之識。謂其自足以凌跨

六合籠駕八表。而顧如此語忽焉。仲舒以江都去。而武帝所與論道者。他有人矣。臣固嘗爲武帝惜也。堂天朝固非漢比。而臣之賢亦萬不及仲舒。然亦不敢激。不敢泛切於聖問之所謂道者。而得二說焉。以爲陛下獻。陛下試采覽焉。一曰重宰相。以開公道之門。臣聞公道在天地間。不可一日壅闕。所以昭蘇而滌決之者。宰相責也。然扶公道者。宰相之責。而主公道者。天子之事。天子而侵宰相之權。則公道已矣。三省樞密謂之朝廷。天子所與謀大政。出大令之地也。政令不出於中書。昔人謂之斜封墨勅。非盛世事。國初三省紀綱甚正。中書造命。門下審覆。尙書奉行。宮府之事。無一不統於宰相。是以李沆猶得以焚立妃之詔。王旦猶得以沮節度之除。韓琦猶得出空頭勅。以逐內侍。杜衍猶得封還內降。以裁僥倖。蓋宰相之權尊。則公道始有所依而立也。今陛下之所以爲公道計者。非不悉矣。以夤緣戒外戚。是以公道責外戚也。以裁制戒內司。是以公道責內司也。以舍法用例戒羣臣。是以公道責外廷也。雷霆發部。星日燭幽。天下於此咸服陛下之明。然或謂比年以來。大庭除授。於義有所未安。於法有所未便者。悉以聖旨行之。不惟諸司陞補。上瀆宸奎。而統帥躐級。開職超遷。亦以夤緣而得恩澤矣。不惟姦賊滿洗。上勞渙汗。而選人通籍。姦胥遁刑。亦以鑽刺而拜寵命矣。甚至閭閻瑣屑之鬪訟。皂隸猥賤之干求。悉達內庭。盡由中降。此何等蟻蝨事。而陛下以身親之。大臣幾於爲奉承風旨之官。三省幾於爲奉行文書之府。臣恐天下公道自此壅矣。景祐間。罷內降。凡詔令皆出中書樞密院。仁祖之所以主張公道者如此。今進言者。猶以事當

間出睿斷爲說。嗚呼。此亦韓絳告仁祖之辭也。朕固不憚自有處分。不如先盡大臣之慮而行之。仁祖之所以諭絳者。何說也。奈何復以絳之說啓人主。以奪中書之權。是何心哉。宣靖間。創御筆之令。蔡京坐東廊。專以奉行御筆爲職。其後童貫梁師成用事。而天地爲之分裂者數世。是可鑒矣。臣願陛下重宰相之權。正中書之體。凡內批。必經由中書樞密院。如先朝故事。則天下幸甚。宗社幸甚。二曰收君子。以壽直道之脈。臣聞直道在天地間。不可一日頽靡。所以光明而張主之者。君子責也。然扶直道者。君子之責。而主直道者。人君之事。人君而至於沮君子之氣。則直道已矣。夫不直。則道不見。君子者。直道之倡也。直道一倡於君子。昔人謂之鳳鳴朝陽。以爲清朝賀國朝。君子氣節大振。有魚頭參政。有鶴擊臺諫。有鐵面御史。軍國之事。無一不得言於君子。是以司馬光。猶得以殲守忠之姦。劉摯。猶得以折李憲之橫。范祖禹。猶得以罪宋用臣。張震。猶得以繫龍太淵。曾覲。蓋君子之氣伸。則直道始有所附而行也。今陛下之所以爲直道計者。非不至矣。月有供課。是以直道望諫官也。日有輪劄。是以直道望廷臣也。有轉對。有請對。有非時召對。是以直道望公卿百執事也。江海納汙。山藪藏疾。天下於此。咸服陛下之量。然或謂比年以來。外廷議論。於己有所未協。於情有所未忍者。悉以聖意斷之。不惟言及乘輿。且勤節貼。而小小予奪。小小廢置。亦且寢罷不報矣。不惟事關廊廟。上煩調停。而小小抨彈。小小糾劾。亦且宣諭不已矣。甚者。意涉區區之貂璫。論侵瑣瑣之姻婭。不恤公議。反出諫臣。此何等狐鼠輩。而陛下以身庇之。御史至於來和事之譏。臺

吏至於重訖了之報。臣恐天下之直道自此沮矣。康定間。歐陽脩以言事出。未幾即召以諫院。至和間。唐介以言事貶。未幾即除以諫官。仁祖之所以主直道者如此。今進言者。猶以臺諫之勢日橫爲疑。嗚呼。茲非富弼忠於仁祖之意也。弼傾身下士。寧以宰相受臺諫風旨。弼之自處何如也。奈何不知弼之意。反啓人君以厭君子之言。是何心哉。元符間。置看詳理訴所。而士大夫得罪者八百餘家。其後鄒浩陳瓘去國。無一人敢爲天下伸一喙者。是可鑒已。臣願陛下壯正人之氣。養公論之鋒。凡以直言去者。悉召之于霜臺。烏府中。如先朝故事。則天下幸甚。宗社幸甚。蓋大道之行。天下爲公。周道如砥。其直如矢。自古帝王行道者。無先於此也。臣來自山林。有懷欲吐。陛下悵然疑吾道之迂遠。且慨論乎古今功化之淺深。證效之遲速。而若有大不滿於今日者。臣則以爲非行道之罪也。公道不在中書。直道不在臺諫。是以陛下行道用力處。雖勞而未遽。食道之報耳。果使中書得以公道總政要。臺諫得以直道糾官邪。則陛下雖端冕凝旒於穆清之上。所謂功化證效。可以立見。何至積三十餘年之工力。而志勤道遠。渺焉未有際邪。臣始以不息二字爲陛下勉。終以公道直道爲陛下獻。陛下萬幾之暇。儻於是而加三思。則躋帝王。軼漢唐。由此其階也已。臣賦性疎愚。不識忌諱。握筆至此。不自知其言之過於激。亦不自知其言之過於泛。冒犯天威。罪在不赦。惟陛下留神。臣謹對。

廷試前兩日。先生苦河魚。且不能食。試之日。丑寅間強起乘籃輿。趨馳道外。幾不能支。吾至。所諸進士

趨麗正門之旁門。先生隨羣擁併而入。頂踵汗流。頓覺蘇醒。至殿廊。恭受御策題。就題命意。文思湧泉。運筆如飛。所對且萬言。未時已出矣。或謂有神物者。溢滌其中。以吐其奇。是豈偶然之故哉。道體堂謹書。

封事

己未上皇帝書

十一月吉日。勅賜進士及第臣文天祥。昧死百拜。謹奉詔獻書于皇帝陛下。臣一介疎賤。遭逢聖明。猥以庸愚。早膺親擢。世道悠悠。風塵流靡。臣於其間。蓋嘗感激奮發。以爲由今之道。無變今之俗。一日有關於天下國家之故。懼以無辱使令。杜門四年。讀禮之外。蓋未嘗一日不思以自效也。乃夏五。陛下臨軒策士。偶垂記憶。起臣於家居。進臣於仕籍。臣伏被宸命。感激不自勝。追惟蒙恩之初。阻於朝謝。北望天路。輒奉表以聞。伏蒙聖慈。許臣詣拜闕下。德至渥也。臣就道以來。不圖國事浸艱。邊烽頓迫。陛下引咎責躬。改過更始。召還舊德。斥去元姦。凡可以當天意。回人心者。無所不用其至。伏惟陛下。不自神聖。猶親灑宸翰。誕布詔書。庶幾中外臣庶。危言極論。以有補於今日之故。陛下悔悟之意。上通於天。天下於此感服。陛下之勇。臣甫及趨謝闕庭。兩讀綸音。爲之哽咽下泣。君臣之義。與天地並立。况臣蒙被厚恩。非衆人比。使於此時。泯泯默默。上負陛下。內負帝衷。尙何以飲食於載履間哉。是用不避斧鉞。輒奮愚衷。條其說以獻。惟陛

下幸裁。一曰簡文法以立事。夫貴爲天子。富有四海。垂衣拱手。以雍容於穆清之上。至尊之體也。不幸際時艱難。兵革四起。俯仰成敗。呼吸變故。此非用馬上治不濟。今國勢搶攘。固猶未至如馬上之急。然寇入腹心。事干宗社。陛下爲皇皇拯救之謀。不得不略倣馬上治之之意。今陛下焦勞於上。兩府大臣。黽勉於下。君臣之間。不可謂非日計軍實而申倣之者。然尊卑闊絕。禮節繁多。陛下平旦視朝。百官以次奉起居。宰相搢笏出奏。從容不踰時。軍國大事。此雖陛下日夜與宰相汲汲而圖之。猶懼不旣。謀王斷國之設施。尊主庇民之蘊蓄。豈能以頃刻交際。而究竟之哉。陛下退食之暇。雖時出內批。以與宰相商論。宰相又時有奏報。以出其建明。然天下事。得於面論者。利害常決於一言。筆墨所書。或反覆數百言而不足。事機交投。寸陰可惜。使宰相常有此等酬酢。則一事之末。固有費其日力者矣。其於機務。豈不有所妨哉。古者天子之於大臣。或賜坐。或賜食。或奏事至日昃。或論事至夜分。凡皆以通上下之情。爲國家至計也。賜茶之典。五代時猶有之。惟國初范質王溥。頗存形迹。此事遂廢。陛下莫若稍復古初。脫去邊幅。於禁中擇一去處。聚兩府大臣。日與議軍國大事。陛下賜之款密。親是非可否於其間。衆議惟允。則三省畫時施行。上下如一。都俞噓咈之間。必將有超然度外之舉。天下何事不可爲。何難不可濟。至於除授。尤有關繫。且如近者重臣建闡之事。方帥海門。隨邊建鄴。甫鎮建鄴。又進上饒。布置變換。如弈棋然。卯詔辰行。奔命不給。大者措畫之如此。小者遷徙之更多。人無定志。事無成謀。當此艱危。豈不誤事。繼自今始。陛下宜與大臣熟

議某人備某職。某人任某事。人物權衡當而後用。朝廷命令奠而後發。如此則觀聽者不至皇惑。驅馳者不至遲回。人知其令出惟行。則無輕朝廷之心。士大夫知其可以展布四體。則鞠躬盡瘁而無觀望。其於國事。厥非小補。又如用一人也。或出於陛下之拔擢。或出於宰相之啓擬。中書已費行移。後省方及書讀。或有不當。又至繳駁。比其不繳駁也。則書黃徑下。其人徑受命矣。臺諫始從而有所指陳。是致國論紛紜。而內外職守。遷移如傳舍。施之平時。雖有體統。用之今日。恐悞事機。臣愚以爲陛下宜倣唐諫官隨宰相入閣故事。令給舍臺諫。從兩府大臣。日入禁中聚議。其有不可。應時論難。不使退有後言。如此則國事無聚訟之譏。宸命無反汗之失。事會無濡滯蹉跌之悔。豈不簡便易行哉。若夫中書乃王政之所由出。宰相之重。又天子之所與論道經邦。而不屑其他者也。今宰相來於倉卒之中。而制千里之難。立於敗壞之後。而責一旦之功。此雖敏手。不能以大有爲。須是博采四方之謀。旁盡天下之慮。而後不償於事。側聞軍期文書。填委叢積。宰相以其開誠布公之歲月。弊弊焉於調遣科降之間。侍從近臣。且日不暇相接矣。諸葛亮以區區之蜀。抗衡天下十分之九。究其經濟大要。則曰集衆思。廣忠益。今衆思不暇集。忠益不暇廣。宰相不得已。竭其一心。役其兩耳目。日與文書期會。相尋於無窮。此豈其才之不逮哉。我朝三省之法。繁密細碎。其勢固至此也。柳宗元有言。失在於制。不在於政。爲今之計。惟有重六部之權。可以清中書之務。今六部所司。絕是簡省。其間長貳。常可缺員。莫若移尙書省六房。隸之六部。如吏部得受丞相除授之旨。而

行省劄兵部得稟樞密調遣之命而發符移其他事權一倣諸此而又多置兩府屬官如檢正都承之類使知蜀事者置一員知淮事者置一員知諸路事者置若干員兩府日與其屬劇切講畫以治此寇而文書行移不與焉如此則大臣有從容之暇可以日見百官以及四方賢俊酬應簡則聰明全心志壹則利害審塞禍亂之路開功名之門當自此始惟陛下思之二曰倣方鎮以建守今天天下大患在於無兵而無兵之患以郡縣之制弊也祖宗矯唐末五代方鎮之弊立爲郡縣繁密之法使兵財盡關於上而守令不得以自專昔之擅制數州挾其力以爭衡上國者至此各拱手趨約束捲甲而藏之傳世彌久而天下無變然國勢由此浸弱爲盜賊遂得恣睢於其間宣靖以來天下非無忠臣義士強兵猛將然各舉一州一縣之力以抗寇鋒是以折北不支而入於賊中興之臣識循環救弊之法蓋有建爲方鎮之議者矣失此不圖因循至今日削弱不振受病如前及今而不少變臣不知所以爲善後計矣今陛下命重臣建宣闡節制江東西諸州官民兵財盡從調遣廟謨淵深蓋已得方鎮大意矣然既有宣闡又有制司既有制置副使又有安撫副使事權俱重體統未明有如一項兵財宣闡方欲那移諸司又行差撥指揮之初各不相照承受之下將誰適從今日之事惟有略倣方鎮遺規分地立守爲可以紓禍且如江西一路九江興國隆興與鄂爲鄰朝廷旣傾國之力以赴之姑所不論惟寇之至湖南者已宿堂與此外八州其措置不容苟簡八州之中廬陵宜春最當衝要虜之爲兵其法常有所避避八桂則出清湘避長沙則出衡陽今

宜春見謂有兵。惟廬陵猶此無備。舍堅攻瑕。棄實擊虛。虜既以此爲得策。則夫避宜春而趨廬陵。其計將必出於此。州縣之事力有限。守令之權勢素微。虜至一城。則一城創殘。至一邑。則一邑蕩潰。事勢至此。非人之愆。若不別立規模。何由戡定禍亂。臣愚以爲莫若立一鎮於吉。而以建昌南安贛隸之。立一鎮於袁。而以臨江撫瑞隸之。擇今世知兵而有望者。各令以四州從事。其四州官吏。許以自辟。見在任者。或留或去。惟帥府所爲。去者。令注別路差遺。其四州財賦。許以自用。自交事一日始。其上供諸色窳名。盡予帥府。交事以前。見未解數目。亦許截留。其四州軍兵。見屬伍符者。必寡弱而不振。見行團結者。必分散而不齊。許於伍符團結之外。別出措置。收民丁以爲兵。彼一州之緊急者。得三州稍寬緩之力。以爲之助。三州之寬緩者。得一州當其緊急。而無後憂。不出二三月。如吉如袁。其氣勢當自不同。倣此而行之。江東廣東。無不可者。夫郡縣方鎮之法。其末皆有弊。所貴乎聖人者。惟能通變而推移之。故郡縣所以矯方鎮之偏重。方鎮所以救郡縣之積輕。今郡縣之輕甚矣。則夫立爲方鎮之法。以少變其委瑣不足恃之勢。真今日之第一義也。陛下一日出其度外之見。不次拔數人之沈鷲英果者。委以數鎮。俾各爲國家當一面。則郡縣之間。文移不至於太密。事權不至於太分。兵財得以自由。而不至於重遲而不易舉。旬月之間。天下雷動雲合。響應影從。驅寇出境外。雖以得志中原可也。尙何惴惴宗社之憂哉。三曰。就團結以抽兵。抽兵之說。臣前已開其端。而其節目未悉也。請再陳之。夫取兵於民。周井田唐府兵之遺法也。今使者四出。分行營

陣。俾各處團結。以自爲鄉井之衛。疾行之中。此亦庶幾善步者。然而無益也。近時朝廷。以保伍爲意。官府下其事。里胥爲里胥者。沿門而行。執筆以抄其戶口。曰。官命而各爲保伍也。已而上其藉於官。又從而壅通塗之壁。取其甲分五五而書。曰。保伍。如古所謂保伍者。如此而已。臣居廬陵。往往有寇警。則鄉里又起所謂義丁者。一日。隅總擊柝。以告其一方。曰。寇至。毋去。諸而等各以某日聚某所。習所以守望。至其日也。椎牛釀酒以待。隨其所衣。信其所持。從而類編爲之伍。一匝乎村墟井落之間。翕然而聚。忽然而散。則義丁者。又止如此而已。今朝廷命使以團結州縣奉旨而行。移計其規爲布置。當有加密於臣所言者。然某所若干人。某所又若干人。屬邑合狀。帳申郡府。郡府合狀。帳申朝廷。計其數目。當自不少。然其分也。散而不一。其合也。多而不精。故當其分。則鄉村無以通於鎮市。鎮市無以通於城郭。虜突如其來。彼一方者。力不敵。勢不支。老弱未及揀。教閱未及施。雖有金鼓旗幟之物。而未知坐作進退之節也。雖有城池山澤之險。而未知備禦攻守之方也。且民之聚也。使之自峙其糧。自備其飲食。則有所不能。仰於官。則無以給也。有以給。則又不能久也。臣故曰。無益也。夫前所謂或千人。或數百人。此隅總一日能辦也。今建言者。不察其聚之易。而用之難。增兵之有名。而拒寇之無實。乃欲視其團結之多寡。升降其官賞以爲勸。且意其一日之急。或者可驅而他之。賈誼有言。皆非事實。知治亂之體者也。陛下忱能委數州。立一方鎮。莫若俾爲帥者。就團結之中。凡二十家。取其一人。以備軍籍。一郡得二十萬家。則可以得一萬精卒。例而行之。諸州。

則一鎮新兵當不下二三萬。州郡見存之租賦，可以備兵食。見存之財利，可以備軍需。古人抽丁之法，或取之三家，或取之五家。今官收其米以就爲養，收其財以就爲生。既食其力，不常又重役其人。惟於二十家取其一，則衆輕而易舉。州縣號召之無難，數月之內，其事必集。爲帥者，教習以致其精，鼓舞以出其銳。山川其便習也，人情其稔熟也，出入死生之相爲命也，鋒鏑之交，貌相識而聲相應也。如此兵者，一鎮得二三萬人，當凜凜然不下一敵國。今諸路列鎮，則精兵雖十餘萬可有也。太祖皇帝南征北伐，所至如破竹，計其兵曾不滿二十萬。使吾於諸閩之外，別得十萬精兵，則何向而不可哉。或曰：國家經常皆用供億，州縣財賦各有窠名。今上流之兵未解，江淮之餽如故，使移此事力以給方鎮之兵，如諸閩何。嗚呼！擇害莫若輕，擇利莫若重。臣蓋籌之審矣。夫京湖之路既梗，則雖欲漕運而舟楫不能以前。江廣之備既虛，則雖有財賦而土地不能以自保。與其束手無措，以委輸於虜，孰若變通盡利，以庶幾虜之可逐也。且夫江廣既全，則吾之境內其惟正之供者尚多也。陛下撫此厄運，不得不勉自節縮，曲爲通融。多方以濟諸閩之急，支吾年時，寇必就盡。然後一正吾之郡縣，一復吾之經常，未晚也。不然，殆未知其所終。惟陛下深思亟圖之。四曰：破資格以用人。本朝用人，專守資格。祖宗之深意，將以習天下之才。世雖有賢明忠智之人，英偉奇傑之士，亦必踐躅之多，涉歷之熟，積勞持久，而後得至於高位。養成遠大之器，消弭僥倖之風。人才世道，胥有利賴。然其弊也，有才者常以無資格而不得遷，不肖者常以不礙資格法而至於大用。天下

卒有變。不肖者當之。而有才者拱手熟視。夫是以常遺國家之憂。臣嘗見數年以來。邊陲之間。偶缺一帥。陛下徬徨四顧。弄印莫屬。挨排應急。不得已。常取監司之風力者爲之。趙魏老不可以爲滕薛大夫。陛下非不知其然也。他人資格或有未及。而彼適可得之。雖其才具容有不逮。然猶意境外無事。以幸其不至於敗缺。比其敗缺。則倉皇變易。常至於失聲色而後已。嗚呼。此平世拘擥之弊也。今天下事勢潰決已甚。一有蹉跌。事關存亡。百夫不可輕擇將。一壘不可輕畀守。况其重者乎。今自朝郎以上。凡內之卿監侍從。外之監司郡守。紫朱其綬。唱喝車蓋而出者。不知幾人。使其中果有非常之才。堪任將帥。則是望實旣優。資格又稱。一日舉而置之。萬夫百將之上。誰曰不然。然臣意陛下之未有其人也。則夫宗社安危之機。不可輕決於庸人。而有資格者之手。世之能辦事者。固多矣。三辰不軌。拔士爲相。蠻夷猾夏。拔卒爲將。事固各論其時也。今何如時。尙拘拘子子於資格之末。臣觀州縣之間。凡寮底小官。馳騁於繁劇之會者。蓋甚有之。薦引之法。浸弊於私。而改官之格。率爲勢要者所據。孤寒之中。獨無可任大事者乎。三歲一貢士。碌碌成事者衆。而氣概才識。望於鄉里。曾不得一名薦書。抱膝隆中。杖策軍門。固皆縫掖章甫之流也。夫今日之士。他日之官也。今日之小官。他日之爲公卿者也。天下有事。凡能擔當開拓。排難解紛。惟其才耳。固有明知其人之有才。而拘於資格之所不可。則亦姑委棄之。此豪傑之士。所以痛心疾首於世變之會也。陛下如建立方鎮。收拾人才。臣願明詔有司。俾稍解繩墨。以進英豪於資格之外。重之以其任。而輕授以

官。俟其有功。則漸加其官。而無易其位。漢唐法度。陳闔。其一時人才。常僮僕不羈。本朝以道立國。以儒立政。則亦無取乎爾。然至於今日。事變叢生。人物落落。奈何不少變之哉。至如諸州之義甲。各有土豪。諸峒之壯丁。各有隅長。彼其人望。爲一州長雄。其間蓋有豪武特達之才。可以備總統之任。一日舉之。以爲百校之長。則將帥由是其選也。其穎異通敏者。引之於帷幄。樽俎之密。又從而拔其尤者。委之以人民社稷之重。則人才不可勝用也。至如山巖之氓。市井之靡。刑餘之流。盜賊之屬。其膽勇力絕。足以先登。其智辯機警。足以間謀。使貪使愚。使詐使勇。則羣策羣力。皆吾屈也。昔之方鎮。食其土地。用其人民。附循其士大夫。馳策其蹶弛之士。故雖以區區之地。常足以與天下爭雄。今雖未至於此。然陛下髣髴而行之。則吾規模意氣。固已一變前日之弱矣。惟陛下熟計之。幸甚。夫古之爲天下國家者。常有敵國相持之憂。然而立乎四戰之衝。雖將刃兵潰。屢起屢仆。而其國終不可動。由卓然有所立故也。今陛下奮發神斷。赫然悔悟。所以洗舊汗。更宿弊。如雷霆風雨。交馳並至。而不可禦。陛下亦求所以爲自立矣。而未得其方也。自立之方。臣前所獻之數條是已。雖然。臣意陛下未之能行。則有說也。何也。悔悟之意未明也。奸人當國。指天下能言之士。謂之好名譁競。使好名譁競者。常在朝廷。則清議之福。陛下必及受用。事應不至今日。惟浸潤膚受。爲毒已深。而後陛下之人才盡逐。陛下今旣悔悟矣。然鋒車所召。率未及前日擯棄流落之人。或謂陛下猶有畏其不靖共之意。夫今日之禍亂。靖共之報也。陛下猶有愛於貌爲靖共者邪。此悔悟未明之

一也。三數年前。縉紳之能出臆論事者。既爲奸人所屏。學校之士。猶叩關聲。不自已。奸人疾其爲害已也。託名學法。重致意於禁上書之一條。而後陛下之言路盡塞。陛下今既悔悟矣。然食肉之徒。未有能出一語。以救陵遲之禍。惟學校不憚懇懇。以爲言。彼其所陳。固有未盡切實者。陛下何不擇其善者而施行歟。此悔悟未明之一也。今有人焉。陷於酒色。淇濁而不自知。元氣日耗。蝕於內。客邪日衝。擊於外。四肢百骸。幾至解體。一日條大悔悟。自創其酒色之愆。而使爲朋友僕御者。各得以勤攻己之短。其爲身謀。幾晚矣。然知淇濁之爲病。而猶諱其所從來。則是病根固在也。人非不知愛身。彼諱病根而不肯決去者。說其小而忘其大也。陛下所以救社稷。重於救身。則夫病根所在。何所顧惜而不之去歟。高宗皇帝。以麥飯豆粥之苦。植立東南百四十年太平之基。陛下嗣無疆。大歷服。所以撫摩愛養。培億萬年丕天之休。加用力焉。不幸比者。中外怨叛。吾之赤子。自延寇入室。謀危國家。蓋至今日。遠近爲之荷擔。宗社幾於綴旒。天下之人。追咎其失。以爲聚斂之過。而聚斂之事。通國憤然怒罵。以爲倡於陛下左右之人。夫此一人者。竊弄威權。上累聖德。其凶讎威惡。蠱國害民者。臣不能具數。獨其攘臂聚斂。招集奸凶。爲陛下失民失土。以貽宗社不測之憂者。其罪莫甚焉。趙簡子命尹鐸爲晉陽。尹鐸曰。繭絲乎。保障乎。簡子曰。保障哉。古之爲天下計者。不屑於其小。而惟遠者是圖。不快於目前之求。而常恐其一朝之患。故雖簡子區區之大夫。尹鐸區區之小吏。其所規爲。猶及於此。國家之大。不可以田舍翁自爲也。後之人君。思以富雄天下。固有時出

其聚斂之術。然猶繭絲自繭絲。保障自保障。何物刑餘爲謀不臧。率天下以共向繭絲的。而保障之地。亦不得免焉。繭絲之毒不可忍。而後保障之禍不可爲。陛下問者。屢出內帑金帛。分給諸司。期有救於難。然調度方殷。兵革又不得息。前日聚繭絲之得未什伯。今日救保障之費。蓋千萬億秭而未有已也。嗚呼。誰生厲階。至今爲梗。向使此人者。不以聚斂斲伐祖宗涵洪寬大之仁。孟賊陛下神明英武之德。則必不妄籍民財。以入脩內司。必不豪奪民產。以實御莊。必不諧價西園。以布中外貪酣之寵。必不交通南牙。以開朝廷污濁之門。如此則奸人必不得竊據相位。徧置私人。如此則疆禦培克之流。必不得齒於縉紳。玷於節鉞。如此則各郡有賢守。各路有賢監司。必不侵漁以交結北司。剝割以應奉內獻。民心必無變。宗社必無危。今朝廷知江閩虐取漁舟。故吾人爲虜鄉導。以至於此。曾不知是數年間。外之監司郡守。求爲交結應奉。而一切不卹。以失吾民戴宋無二之心者。所在有之。江閩之事。偶著爾。今論者。追訟江閩之罪。死有餘責。則夫使士大夫貿貿焉爲聚斂。重失人心。激天下以各懷怨叛。如臣所指之人者。一死詎足道哉。且夫奸人之入相也。使非此人者。與之相爲表裏。以揜陛下之聰明。密爲游揚。以開陛下之信用。則賢者必不以好名中傷。言者必不以諱競逐去。學校之持公論者。必不以誼橫得禍。士大夫之秉直節者。必不以貪贓加罪。朝廷清一。言路光明。邪人何自而赫張。民摸何自而壅隔。人離而陛下何以不覺。寇至而陛下何以不知。彼其依憑陛下恩寵。以爲奸人與主。故顛倒宇宙。濁亂世界。而得以無忌憚。使陛下今日認

於天地負媿於祖宗。結怨於人民。受侮於夷狄。則豈獨一奸人爲之哉。原情定罪。莫重於奧主。而奸人次之。莊周曰。兵莫憐於志。鏌鋣爲下。言刺人而殺之。不在於手。而在於心。不在於鋒。而在所以用其鋒者。奸人則鏌鋣也。奧主則志也。方今國勢危疑。人心杌隉。陛下爲中國王。則當守中國。爲百姓父母。則當衛百姓。且夫三江五湖之險。尙無恙也。六軍百將之雄。非小弱也。陛下臥薪以厲其勤。斫案以奮其勇。天意悔禍。人心敵愾。寇逆死且在旦夕。或謂其人者。舖張驚憂。以沮陛下攘寇之志。處分脆弱。將誤陛下爲去邪之行。居前日。則曰我能爲君充府庫。以盜其權。居今日。則獻其小心。出其小有材。使陛下意其緩急。可恃以固其寵。向非陛下參酌國論。堅凝廟謨。爲效死不去之計。則一日嘗試其說。六師一動。變生無方。臣恐京畿爲血爲肉者。今已不可勝計矣。小人誤國之心。可勝誅哉。臣愚以爲今日之事急矣。不斬董宋臣。以謝宗廟神靈。以解中外怨怒。以明陛下悔悟之實。則中書之政。必有所撓而不得行。賢者之車。必有所忌而不敢至。都人之異議。何從而消。敵人之心膽。何從而破。將士忠義之氣。何自激昂。軍民感泣之淚。何自奮發。禍難之來。未有卒平之日也。千金之家。得一僮奴。稍足以稱其私。雖害于而家。未忍亟去。况其人給事之歲月已深。乞憐之懇款已熟。陛下性資仁厚。亦豈忍遽甘心焉。然宗社之事重。左右之恩輕。蠹民誤國之罪深。承顏順色之愛淺。伏惟陛下。以宗廟社稷之故。割去私愛。勉從公議。下臣此章。付之有司。暴其罪惡。明正典刑。傳首三軍。以徇如此。而天下不震動。人心不喜悅。將士不感泣。而思奮。虜寇不駭愕。而

謀遠。是人心天理。可磨滅也。是天經地義。可澌盡也。臣所不信。臣嘗讀諸葛亮出師表。輒捲卷哀憤。悲其用心。亮之言曰。宮中府中。俱爲一體。陟罰臧否。不宜異同。若有作姦犯科。及爲忠善者。宜付有司。論其刑賞。以昭平明之治。亮將獎率三軍。北定中原。攘除姦凶。興復漢室。其於宮府之政。宜若無與。而獨區區以此爲先者。良以社稷安危之權。國家存亡之故。不在於境外侵迫之寇。而內之陰邪。常執其機牙。此亮之所以深權內外本末之理。而先窒其禍亂之源也。今臣上自朝廷。下至州縣。所以分畫其規模。纖悉其經緯。以上助尊夏攘夷之一畫者。已略備矣。而臣獻其狂愚。於未猶有感於亮之所言。區區劣功。何敢引亮爲證。顧所以忠君愛國之心。則亮之爲也。臣非不知。踈遠之人。指陳無狀。干犯天誅。罪在不赦。且使幸赦之不誅。則左右之人。仇疾臣言。亦將不免。然臣所以不顧危亡。寧以身犯不測之鋒者。義命之際。臣固擇之精矣。方今社稷震動。君父驚虞。此所謂危急存亡之秋。臣委質爲臣。與國同休戚。親見外患。如火燎原。而內寇又復植根固。流波漫則禍難無涯。臣死亡正自無日。與怵迫於權勢之威。憂疑於一己之禍。噤口結舌。以坐待國家之難。而後死。孰若犯死一言。感悟天聽。如陛下以爲狂妄而誅之。臣固已自分一死。萬一陛下察臣之忠。行臣之言。以幸宗社。則臣與國家同享其休榮。等死之中。又有生路。此臣所以齎咨涕洟。望闕懇惻。而不能自己也。臣冒瀆天威。殞越震懼。謹席藁私室。以俟威命之下。臣無任瞻天望聖。激切屏營之至。不備。臣某昧死百拜上。

此先生開慶己未伏闕書也。先生丙辰狀元及第。乃穆陵親擢。舊例三魁唱名罷。賜袍笏。謝恩入幕。賜御饌。進謝恩詩。出賜席帽。於闕門外上馬。迎入期集所者。又名狀元局。官給錢物。供張皂隸等。於此所聚同年待賓客。刊題名小錄。賜聞喜宴。進謝宴詩。如此者一月。然後率榜下士詣闕門謝恩。謂之門謝。門謝後。命之初階。內狀元授承事郎。僉書某軍節度判官廳公事。至後一科放進士榜。則前一科狀元召入爲秘書省正字。名曰對花召。此舊例也。先生入期集所數日。嚴侍有疾。卽謁告還邸侍藥。未幾。乃有失怙之變。卽持服扶柩歸里。服除。閉門度日。後一科當對召日。始除僉書寧海軍節度判官廳公事。蓋先生未除官而卽持服。故除初階。先生上請未敢受官。乞行門謝禮。奉旨允。己未冬。造朝門謝。適有江上之警。應求言詔上此書。不報而歸。未幾。又除僉書鎮南軍節度判官廳公事。先生上請。乞奉宮觀香火。以安分守。除中管建昌軍仙都觀。未幾。除秘書省正字。誥辭云。倫魁登瀛故事也。然始進。大率以虛名。旣久。乃知其實踐。爾則異。是初以遠士。奉董生之對。繼以卑官。上梅福之書。天下誦其言。高其風。知爾素志。不在溫飽。麟臺之召。其來何遲。語有云。見大名難。又云。保晚節難。爾其厚養而審發之。使輿論翕然曰。朕所親擢。敢言之士。可陞校書郎。又陞著作佐郎。兼景獻太子府教授。值巨閹董宋臣再出用事。於是上章極論。遂出知瑞州。此章見于後。今略敘其概云。道體堂謹書。

七月吉日。具位臣文天祥。謹昧死百拜。獻書於皇帝陛下。臣賦畀末學。天賦樸忠。遭逢聖明。早塵親擢。已未之夏。陛下廷策多士。記憶微臣。俾佐京兆尹幕。時臣不敢拜恩。乞行進士門謝。旨令赴闕。其冬實來行禮。適值寇難方殷。江上勝負未決。而全永衡且破。于時京師之勢。危如綬旒。上下皇皇。傳誦遷幸。臣得之目擊。忱恐六師。以一朝而動。京杜之事。關係不細。采之公論。則謂寇禍。起於儉壬之聚斂。而儉壬用事。則主於董宋臣。至於遷幸一事。宋臣張皇處分。尤駭觀聽。事勢至此。死且無日。臣忠憤激發。叩關上疏。乞以宋臣尸諸市曹。以謝生靈荼毒之苦。指陳觸忤。自分誅斥。出關待罪。不報。亟歸山林。側聽聖裁。臣章雖不付出施行。而竟亦不坐臣以罪。非惟免於罪而已。改命洪幕。從欲與祠。又寵綏之。臣嘗以爲區區父母之身。旣委而狗國矣。陛下赦而不誅。臣之再有此身。是陛下賜之也。感激奮發。常恨未有一日。答天地之造。前冬誤辱收召。畀以館職。曾未幾時。進之以著庭。寵之以郎省。臣之取數於明時者。益以過多。共惟聖德日新。朝無闕事。臣得從事鉛槧。悉意科條。以無忘靖共爾位之訓。忱幸忱荷。茲者。倭讀報狀。宋臣復授內省職事。臣驚歎累日。不遑寧處。繼傳御批。游畀兼職。且使之主管景獻大子府。臣備員講授。實維斯邸。此人者。乃爲之提綱。當其覆出。臣自揆以義。且無面目以立朝。况可與之聯事乎。請命以去。臣之分也。然臣端居深念。託故而去。謂之潔身可也。陛下未嘗拒言者。言而當於可。陛下未嘗不行。臣不言而去。則於事陛下之道。爲有未盡。是用不敢愛於言。伏惟陛下鑒臣之衷。而幸聽焉。臣伏讀國史。竊見孝宗皇帝所以

待。御者終始之際。恩威甚明。臣嘗以爲自古人主。寬仁莫如孝宗。英斷亦莫如孝宗。方會觀龍大淵。輩用事。周必大言之。龔茂良言之。劉度言之。鄭鑑袁樞言之。言者日以盛。而孝宗假以恩寵。未嘗爲之少衰。孝宗豈嚅諫者哉。聖心寬仁。未忍驟有所加也。比其招權弄勢。日益翕赫。小心謹畏之態。昵昵於前者。迄不能掩其陰私傾險之迹。或以見踈死。或以坐罪廢。英斷如此。豈以寬仁而遂失之姑息哉。開國承家。小人勿用。聖子神孫。一守是法。共惟皇帝陛下。以聰明操制萬幾。以神武經緯六合。四十年間。凡經幾大禍亂。幾大驚危。紘重新整頓。功業逐日以新。聲名隨風而流。尙論聖德。三代以下之英主。未能或之先也。神明之下。侍御僕從。罔匪正人。旦夕承弼。厥辟固其所也。惟是宋臣兇驚慘毒。不可嚮邇。陛下曩以其小有才而假借之。小人不足大受。倚恃權勢。無所不至。戊午己未間。天下指目。共欲甘心。臣冒死先爲陛下言之。陛下於此時。猶有徘徊顧惜之意。未卽加罪也。而縉紳學校。交疏其惡。伏闕投匭。殆無虛日。陛下始豁然大悟。奪其大阿。屏置畿郡。中外鼓舞。歌誦盛德。臣妄謂陛下之寬仁。全似孝宗。陛下之英斷。亦全似孝宗。漢家自有制度。固應如是。詩云。維其有之。是以似之。雖然。陛下稟天地冲和之全氣。接帝王忠厚之上傳。寬仁英斷。雖並行而不相悖。二者分數。寬仁較多。是以如此人者。遂得以生全於覆載之內。尋醫之旨未幾。朝請之命復下。今者又使之內居要地。日覲宸光。惟至聖爲能寬裕有容。有如此者。然臣嘗聞之。惟仁者能好人。能惡人。蓋仁則無私。無私故能好能惡。聖人豈專以博愛爲仁哉。漢唐宦官之禍。其後至於

漚。腐。而。不。可。救。推。原。其。初。則。起。於。時。君。一。念。之。不。忍。是。故。古。人。之。防。微。杜。漸。不。敢。忽。也。語。曰。往。者。不。可。諫。來。者。猶。可。追。宋。臣。前。此。誤。國。之。罪。陛。下。既。赦。之。而。勿。問。矣。臣。何。敢。追。尤。往。事。上。瀆。聖。聰。獨。爲。方。來。計。則。竊。緯。之。憂。不。能。忘。情。焉。夫。以。陛。下。聖。明。在。上。孤。雛。腐。鼠。亦。何。敢。晝。舞。夜。號。少。作。喘。息。其。人。心。性。殘。忍。羣。不。肖。所。宗。竊。恐。復。用。之。後。勢。燄。肆。張。植。根。既。深。傳。種。益。廣。未。流。之。禍。莫。知。所。屆。近。者。陛。下。親。製。十。四。規。丕。哉。聖。謨。爲。萬。世。計。甚。悉。有。如。此。事。獨。可。以。爲。小。故。無。與。於。貽。謀。而。闕。略。之。哉。宋。臣。之。爲。人。臣。實。踈。遠。亦。安。能。以。盡。知。之。惟。是。天。下。之。惡。名。萃。諸。其。身。京。國。閭。巷。無。小。無。大。輒。以。董。閻。羅。呼。之。陛。下。之。左。右。使。令。亦。衆。矣。此。名。不。歸。之。他。人。而。惟。此。一。人。是。歸。則。豈。不。召。而。自。至。也。哉。陛。下。毋。以。其。退。然。謹。愿。而。謂。其。未。必。怙。威。生。事。也。毋。以。其。甘。言。卑。詞。而。謂。人。言。爲。已。甚。也。千。金。之。家。強。奴。悍。僕。恣。橫。閭。里。至。其。服。役。於。主。人。之。前。固。亦。未。嘗。不。小。廉。曲。謹。而。可。信。也。此。事。雖。小。可。以。喻。大。陛。下。儻。察。及。此。則。亦。何。愛。於。此。一。人。而。闕。惜。英。斷。以。重。遠。天。下。之。心。哉。伏。望。陛。下。稍。抑。聖。情。俯。從。公。議。縱。未。忍。論。其。平。生。之。惡。以。寘。之。罪。亦。宜。收。回。成。命。別。選。純。謹。者。而。改。畀。之。失。一。兵。得。一。兵。於。國。家。事。夫。亦。何。損。于。以。厭。人。心。之。公。于。以。示。來。世。之。法。于。以。防。天。下。之。禍。於。未。然。令。聞。令。望。施。于。無。疆。臣。子。之。願。莫。大。於。此。臣。實。何。人。輒。上。封。章。以。仰。及。於。萬。乘。之。所。親。信。蚍。蜉。撼。木。自。速。蠶。粉。可。謂。愚。甚。然。臣。方。備。位。中。朝。使。其。以。厚。祿。糊。口。坐。取。遷。擢。豈。不。得。計。而。臣。子。所。以。事。君。正。義。謂。何。世。道。升。降。之。大。幾。國。家。利。害。之。大。故。奈。何。坐。而。視。之。噤。不。發。一。語。上。負。天。子。下。負。所。學。貽。無。窮。羞。此。

臣所以不敢強顏以留。亦不敢詭辭以去。忘其嬰鱗不測之危。以冀陛下萬一聽而信之。臣言得行。宗社之利也。臣之榮也。如臣之積忱未足以仰動天聽。坐受斧鉞。九隕無悔。謹杜門席藁。以聽威命之下。臣無任望闕瞻天。激切屏營之至。不備。臣昧死百拜。

輪對劄子

臣早以書生。遭遇先皇帝親擢。事先皇帝垂十年。恨無涓埃。補報天地。陛下龍飛繼運。移忠以事聖明。永肩乃心。臨鑒在上。比者。臣來自外藩。待罪戎監。陛下親御宸筮。進之經筵。臣學殖凋蕪。循墻無路。自入侍。氈廈。切見天顏。碎穆。聖性謙虛。雖如草茅之愚。時賜訪問。臣感激殊遇。亦既得以悉數於前矣。猥當轉對。伏念臣職在講讀。今日聖學。關天下治忽。不細。輒因封事。畢吐其衷。臣聞聖人之作經也。本以該天下無窮之理。而常足以擬天下無窮之變。天地無倪。陰陽無始。人情無極。世故無涯。千萬世在後。聖人亦安能預窺逆觀。事事而計之。物物而察之。然後世興衰治亂之故。往往皆六經之所已有。凡六經垂監戒。以爲不可者。小犯之。則闕安危。大犯之。則決存亡。如赴水火之必斃。如食堇葛之必毒。是何哉。聖人知有理而已。合於理者昌。違於理者僇。所貴乎帝王之學。惟能不悖乎六經。無蹈乎其大戒而已。嗚呼。聖人所以爲萬世慮者。豈不甚智。所以爲萬世戒者。豈不甚仁矣哉。書曰。民可近。不可下。予視天下愚夫愚婦。一能勝予。而後世猶有以民爲黔首。以覆其宗。爲天下笑者。書曰。內作色荒。外作禽荒。詩曰。亂匪降自天。生自婦

人而後世猶自昭陽華清霓裳羽衣以階瀟陽之禍者。書曰：謹乃儉德，惟懷永圖。又曰：不作無益，害有益。不貴異物，賤用物。而後世猶有葡萄天馬，甲帳翠被，以致四海蕭然者。臣嘗歎夫自聖經以來，時君不聞大道之要，生人不被至治之澤。秦至五季，千數百年間，犯六經之顯戒者，相望史冊。聖人立爲大經大法，以幸萬世，藐然未有聞焉。豈不惜哉！惟皇上帝，畀矜斯文。孔孟微言，至我朝周程張朱，始大闡明。如滕斯發，先皇帝表章四書，尊禮儒先，爲往聖繼絕學，爲萬世開太平。穆考之廟，稱爲理宗。陛下親得精一之傳，而日就月將，緝熙於光明。斯道斯民，解后千載。先皇帝欲爲唐虞三代之治，始留與陛下使了此事。臣觀陛下自踐祚以來，畏天尊祖，親親仁民，敬大臣，體羣臣，尊其所聞，行其所知，何往非學。今朝廷清明，宮府齊一，大法小廉，罔越厥志，不可謂不治矣。然臣切怪去年寒燠失常，四方或以旱告。今年星文示變，雨雹見妖。近者積陰爲寒，皆名咎證。漢人縱閉之學，必謂一證主事，臣不能曉此，但卽其影而想其形，因其流而疑其源。豈人所不知，己所獨知之也。陛下猶有當反之六經者乎。陛下日御經筵，正道正言，嘗接于耳，而又內庭不廢觀書，傳曰：多識前言往行，以蓄其德。陛下蓋有之矣。臣愚更願陛下虛心體認，切己省察，每誦一義，善可以爲法，卽驗之身曰：吾嘗有是乎。無則勉之。每說一事，惡可以爲監，卽揣之心曰：吾嘗有是乎。有則改之。言則慮其所終，行則稽其所敝。豈惟制治於未亂，保邦於未危，充道學之用，經綸天下之大經，範圍天地之化而不過，行而帝，行而王，以卒先帝主張道統之事業。臣何幸身親見之哉。書曰：兢兢

業業一日二日萬幾。夫一日二日之間。亦未至卽有萬事。然一事不謹。則萬事之幾。自此而兆。故撥亂本。寡禍源。無一息不當用功。兢兢業業。所謂必有事焉者也。惟陛下留神。

內制

擬進御筆爲馬丞相趙汝

書上奏留平章。

書曰。三人占。則從二人之言。蓋占取其同。自二人之同。推之卿士庶民。無往不同者。師相欲去。二府以爲不可去。是千萬人皆以爲不可去矣。朕自師相有請。寢食不爲安。朕必不能違衆心。師相亦必不忍違朕心。嗚呼。尙鑒時忱。永綏在位。師相其聽之哉。所請宜不允。

又擬

周公相成王。終身未嘗歸國。孟子當齊世不合。故致爲臣。蓋常情以去就爲輕。惟大臣以安危爲重。苟利諸國。皇恤其身。若時元勳。爲我師相。先帝付託大義所存。太母留行。前言可覆。胡爲以疾。而欲告休。惟醫藥所以輔精神。惟安身所以保國家。古者之賜几杖。雖當七十。而不得引年。我朝之重辯章。雖過九旬。而尙使爲政。勉釐重務。勿困眇懷。所請宜不允。

此先生直翰林院時。代言一二也。留平章二批。已進呈御前。賈似道有聞。嫌所擬無過褒之辭。且怒不先呈。已飄諭別直院官。改作進呈。批出。竟不用先生所擬。先生卽引先朝楊大年。在翰林草詔。以一字

不合真宗聖意。明旦援唐故事。學士作文書。有所改爲不稱職。當罷。因亟求解職。丐祠引去。賈似道以漆木史作字。至先生勉留。大略云。直院援楊大年故事。豈非亦有大年性氣邪。如此者在先朝以爲異。後來皆以爲常。近日馮王二直院所擬。未嘗不反覆更定。旣曰天子私人。又豈不通商量。只如每年春帖。自有二等忌諱字面。上每令似道諭詞臣再三改定。諸公亦惟知謹承上意。直院特未知之耳。幸不必過爲突兀。而有遐心。至叩率幾台。照先生貼名。繳還來槧。又上第二章。力丐祠。束擔出國門。而臺疏罷命出矣。先生有詩曰。當年祗爲青山誤。直草君王一詔歸。是也。道體堂謹書。

擬册立皇太子文

皇帝若曰。朕弗克于德。嗣先人宅不后。三十有七年。夙興夜寐。怵惕惟厲。懼無以追配于前猷。自底不類。迺季秋將有事明堂。思惟皇天全付于有家。繼繼承承。於千萬年。祖宗在天。眷相惟茲。蔽自朕志。貽厥孫謀。于一人有辭。郊廟神祇。考將安樂之。皇帝曰猷。具官皇子某。爾忠孝豈弟。少如夙成。朕用䟽爾王封。衍爾賦畝。欽迺服命。克懋厥德。惟爾休昭。事有嚴。俾爾圭鬯。薄海內外。罔不咸一。其册爲皇太子。改名某。嗚呼。厥惟我前人。造天丕基。創守惟艱。哉。天難諶。命靡常。民罔常懷。懷于有仁。戒之哉。爾惟親正人。學于古訓。罔遊于盤。罔淫于逸。罔以非道孫志。罔以古之人無聞知。尊德崇道。由仁義行。乃若時守宗廟社稷。以爲祭主。天地神人。無疆惟休。朕不失爲知子。爾亦有令名。於戲。欽哉。

文山先生全集卷之四

表牋

門謝表

臣某言。伏準省劄。五月二十八日。三省同奉聖旨。文天祥添差簽書寧海軍節度判官廳公事。仍釐務。臣以賜第之初。未經門謝。未敢祇拜。劄命申乞指揮。續準省札。七月十一日。三省同奉聖旨。令朝謝訖之任。臣謹遵奉旨。揮詣闕庭。朝謝者。御大廷而發策。式廣旁招。奉清問以據忠。誤承親擢。尙阻紫宸之謝。遽叨黃紙之除。曠世遭逢。瞻天感激。臣切以賓興下詔。同天地宗祀之彝。科舉取人。代造化爵賢之柄。豈曰利。人才之進取。其間實天道之流行。肆萬乘之臨軒。受諸侯之貢士。占小善者。率以錄。咸造在廷。取一人焉。拔其尤。必有名世。豈應庸瑣。可在蒐羅。臣稟質既凡。聞道猶淺。才非洛陽之年少。偶玷薦書。學非廣川之大儒。遽塵舉首。自叨異數。亦既三年。回思臚唱之蒙恩。莫與鳧趨而奉表。有懷就日。無路賤天。方徬徨於丘園。乃寵綏其祿秩。輒請展爲臣之禮。幸許脩詣闕之恭。茲蓋伏遇皇帝陛下。德體乾行。道符常久。世更三紀。遠追成周。式化之風。歲啓後庚。近接藝祖。開基之運。凡際風雲之會。咸依日月之光。遂令一介之姓名。亦被九重之記錄。臣敢不誓堅素守。勉企前修。自揆讀書。非爲平生溫飽之計。願言竭節。用副上心。忠

孝之期。臣無任瞻天望聖。激切屏營之至。謹奉表陳謝以聞。

湖南提刑到任謝皇帝表

帝庭敷命。昭闢四門。天牧播刑。誤頒一節。申以過驅之旨。疇茲已試之庸。周隰載馳。漢條具布。伏念臣。本無_心。惟有孤忠。兩朝特達之知。游塵清要。十載行藏之跡。祇自悔尤。雲雷之義方屯。天地之心已復。當元日達聰之始。在皇華遣使之中。聖恩靡許於祝釐。臣職敢稽於行道。瞻蓋高而下耳。冀用譽於折肱。茲蓋恭遇皇帝陛下。道協重華。仁周四表。崇德廣業。合乾轉坤。翕之功。折獄致刑。得震動離明之用。遂令承乏。復忝司平。臣敢不祇若咨詢。對揚欽恤。陳時臬事。尚弘康乂之圖。受王嘉師。永迪明清之訓。

謝皇太后表

司平楚甸。命出嚴宸。告至周原。恩歸慈極。敢敷睿訓。仰謝徽音。伏念臣。一介寒微。兩朝知遇。傾葵向闕。初無補於使令。啜菽杜門。祇自深於觀省。當元日會同之始。拜公朝杖拭之仁。言遣使臣。往陳臬事。華省過頒於趣旨。叢祠竟祕於俞音。勉臣子之驅馳。見吏民而宣布。茲蓋恭遇壽和聖福。皇太后陛下。心起有極。道合無疆。長信怡愉。贊炎圖之昌運。大任肅穆。開蒼籙之隆平。宜擇攸司。俾敬爾獄。臣敢不丕承欽恤。誕布慈仁。又我黎民。尚想無刑之治。于其王母。敢忘介福之元。

謝皇后牋

君子審官道隆儷極。皇華遣使命出治朝。德意具宣。忱辭告至。伏念臣疎庸一介。遭遇兩朝。早綴班行。嘗忝金科之屬。繼乘使傳。復塵繡指之行。曲成每戴於釐明。退食難逃於吏議。不圖元會。復錫恩言。杖扶起家。往陳時臬。驅馳在道。寅奉天威。涖止攸司。欽哉乃職。茲蓋伏遇皇后殿下。德侔坤地。位正家人。關雎之化。既行。用之天下。象魏之法。使布。正自王宮。爰取踐更。載叨詳讞。臣敢不靈承。欽恤。祇若平反。無刑以乂。黎民。誕敷聖化。式敬以長。王國。永誦徽音。

皇太子生日賀皇帝表

大夏長嬴。坤二爻之紀季。千秋似續。震一索之揆初。瑞彩緣車。歡顏丹辰。恭惟皇帝陛下。德流芑水。業茂蘿圖。壽富多男。積善必有餘慶。本支百世。命吉在厥初生。記甲觀之瑞分。占乙祿之祚遠。臣縻身軫墊。戴目心星。誦億子之宜君。首歌周雅。祝萬年之爲父。更續唐詩。

賀皇太后表

福于王母。際南面之昌期。天以神孫。娛東朝之永日。畫堂瑞節。長樂歡聲。恭惟壽和聖福。皇太后性蘊冲和。仁培靜壽。思齊所以聖也。以御于邦。螽斯宜爾。孫兮克開。厥後。皇皇穆穆。繼繼承承。臣迹滯騏原。心馳鳳闕。本支百世。播絲飀之聲詩。怡愉萬年。衍含飴之福慶。

賀皇后牋

坤后廣生。式協二爻之月。震男揆度。載逢一索之期。慶衍羅圖。喜充椒掖。恭惟皇后殿下。道柔配地。德厚承天。以御于家。爲今京室之婦。則樂有子。如古周南之風。百世本支。萬年福祿。臣迹糜牲。轡心賀燕。謀占斯干之詩。已符吉夢。美思齊之德。益嗣徽音。

皇子進封左衛上將軍嘉國公賀皇帝表

乾父垂仁。茂積羅圖之慶。震男鍾美。肇基茅土之邦。百世可知。四方來賀。洪惟昭代。爰立親親。粵有舊章。禮優貴貴。昉祥符之七載。侈慶國之初封。綺仗分班。璪珪踰寵。庸表人倫之厚。遙觀王室之疆。式于今休。監于成憲。恭惟皇帝陛下。福培周厚。和緝堯雍。寶曆無疆。方萬年而受祜。金枝有煒。期億子以宜君。錫以嘉名。渙其大號。地營東井。詔爵五之最穹。天拱北辰。炳心三之相照。克昌厥後。長發其祥。臣有蹇牡。駢阻隨虎。拜祉歌子。施遙陳皇矣之詩。道盡君嚴。願贊家人之易。

賀皇太后表

東朝保艾。方隆堯母之仁。西國分茅。式篤文孫之慶。兩宮喜色。萬宇歡聲。恭惟壽和聖福。皇太后陛下。德厚慈元。神怡長樂。尊之至也。上承視膳之勤。宜爾繩兮。下適含飴之趣。瑤池日永。玉葉春濃。臣遠被繡衣。險瞻綵仗。于其王母。知介壽之來崇。佑我後人。願丕圖之有衍。

賀皇后牋

坤稱乎母。儼家服於椒塗。震索而男。赫龍光於茅土。長秋喜色。方夏歡聲。恭惟皇后殿下。含弘承天。博厚配地。祥鍾長發。熾商後於有娥。音繼思齊。培文昭於大妣。圭璩焜煌於綺仗。芾朱輝映於褱衣。臣遠驟華原。險瞻蕊殿。想宜君之穆穆。茂對王休。侈多子之繩繩。載歸后美。

皇女進封同壽公主賀皇帝表

乾見大人。道夙隆於乾體。巽爲長女。命爰寵於巽中。喜溢宮庭。歡騰海宇。竊惟興君之際。必有積善之餘。播在正風。則曰王姬之美。陳于小雅。是爲女子之祥。無非歌福祿之同。于以表國家之盛。恭惟皇帝陛下。和順而理。溫柔以容。苞體深仁。旣歲絲瓜之賦。岡陵厚積。復培穠李之華。始封爰遴於嘉名。遐祉永齊於聖壽。臣跡靡使事。身隔賀班。親愛如家。遙贊人倫之厚。肅雍迪教。遙觀王道之成。

賀皇太后表

周家福祿。積由任姒之仁。堯母聖神。親覩娥英之慶。宮闈盛典。海宇歡聲。恭惟壽和聖福皇太后陛下。極景光。東朝綦貴。有功寶祚。旣開聖子之傳。流澤銀潢。爰毓天孫之瑞。贊初封於沁水。同上壽於瑤池。臣遠玷皇華。險瞻長樂。怡愉太后。諒承婉婉之娛。雍肅王姬。益表儉慈之教。

賀皇后牋

坤萬物之資生。實蕃慶積。巽一索之謂長。昉對命申。喜氣宮闈。歡聲海宇。恭惟皇后殿下。關雎孝敬。芣苢

和平灼灼宜家。夙範華桃之懿。雍雍成德。茂鍾穰李之英。賁然錫沁水之封。展也同長。秋之壽。臣遠糜苞。杞遙睇塗椒。風以周南。仰化原之洵美。觀于堯女。願母道之浚明。

知贛州到任謝皇帝表

九重選牧。錫類天寬。千里承流。奉親地近。昉共侯度。丕戴王休。伏念臣某。才本空疎。分安孤苦。身逢盛代。夙自厲於丹心。家有重親。晚相依於白髮。頃叨漢傳。往卽楚封。何敬非刑。粗殫審克。不遑將母。私切懷歸。嘗懇懇以陳情。冀高高之欲從。適蒙異渥。特畀近麾。繼膺旨以趣征。已鞠躬而祇上。祿及一門之微賤。恩同大造之生成。茲蓋伏遇皇帝陛下。以堯舜之資。行曾閔之道。嗣寧王之大歷。茲我成功。奉太后之萬年。與天齊壽。遂使忝求芻之寄。亦獲共啜菽之歡。臣敢不老老及人。親親爲政。由家達國。期興遜以興仁。以子移臣。寓爲忠於爲孝。

謝皇太后表

東朝鴻慶。介壽無疆。南國虎符。便親有命。荷中宸之渙寵。望慈極以飯忱。伏念臣一介迂疎。兩朝遭遇。昔備殫於敬歷。無以逾人。頃間任於驅馳。不遑將母。惟內懷於烏哺。遂上徹於蟻忱。果分二水之糜。爰易三湘之節。惟壤地接。故可以供菽水之職。惟土風習。故可以盡芻牧之心。自省叨隸。若爲報稱。茲蓋恭遇壽和聖福。皇太后陛下。德光堯母。功配周姜。壽錫萬年。享怡愉之福。化流四海。推慈孝之仁。遂令下吏之僥

榮獲以邇封而就養。臣敢不祇承德意。誕布恩言。服膺錫類之詩。益崇美化。拜手牧民之訓。險贊徽音。

謝皇后牋

慈極承天。恩深錫類。廉車易地。職重分符。布聖德之中和。便親闈之溫清。伏念臣起繇孤遠。積有迂疎。骯髒半生。於事君而何補。驅馳近歲。以將母而未能。屬爲養以陳情。荷畀矜而從欲。三湘納節。二水授麾。回刺史之車。庶乎爲子。捧郡守之檄。專以爲親。僥冒實多。糜捐曷稱。茲蓋恭遇皇后殿下。道隆坤厚。德配乾仁。大雅思齊。媚周姜而穆穆。長秋備禮。奉漢母以愉愉。遂令疏遠之微臣。亦效旨甘於便壘。臣敢不恪恭候度。茂對王休。崇關雎卷耳之風。迪惟懿則。篤南陔白華之行。施及遐萌。

壽崇節本州賀皇帝表

天子有親。備四海九州之奉。封人祝聖。同萬年億載之期。凡屬照臨。舉同呼舞。恭惟皇帝陛下。剛建中正。緝熙光明。燭六合而耀八紘。功參天地。躋三皇而軼五帝。道御家邦。紹巍巍蕩蕩之勳。盡尊尊親親之養。怡愉誕節。光大前聞。臣獲布寬條。幸逢盛際。鸞鷲阻綴。莫旅賀於東朝。螻蟻傾忱。惟仰瞻於南極。

賀皇太后表

於萬斯年。慈宸有慶。誕彌厥月。祖佛同生。旒冕敬共。縉紳舞蹈。恭惟壽和聖福。皇太后陛下。道超太始。德厚重坤。關雎周南之風。夙陶美化。思齊文王之母。懋著徽音。衿衣初奏於薰絃。宮珮畢朝於慈辰。親下袞

龍之拜。載揚韶鳳之音。呼萬歲者三。歡騰朝野。等百世而上。福衍子孫。臣叨守魚符。莫陪鷲序。我百而爾九十。諒喜溢於舉觴。心一而臣三千。第神馳於拱極。

賀皇后牋

太姒之嗣。太任。星重慈極。長秋之朝。長樂。天介壽祺。流慶九霄。比隆千古。恭惟皇后殿下。明章德範。陶冶化風。大練厚繒。訓四方之節儉。宵衣旰食。侑五位之勤勞。肖似徽音。婉愉誕序。厚符坤地。吉萃家人。臣遯守遐邦。忻逢華旦。仰瞻帝闕。莫陪振鷺之班。下與邦民。同被關雎之化。

壽聖后兵馬鈐轄司賀皇帝表

天子盡敬事親。不昭瑞節。臣下歸美報上。同祝脩齡。覆載兩朝。頌歌四洽。恭惟皇帝陛下。克勤克儉。無怠無荒。堯以是傳。道莫高於虞舜。文所以聖。德益顯於大任。有開麗水之祥。適際瑤池之會。臣屬糜戎鍵。阻綴班聯。北面而朝。恍天威之尺五。南山之壽。效臣子之呼三。

賀皇太后表

金闕日長。尊處宸闈之極。王卮春滿。誕膺法駕之朝。凡在式圍。率均擊壤。恭惟壽和聖福。皇太后陛下。心遊恬淡。德著慈仁。隆周召之風。人倫既正。養黃老之性。母道獨尊。皇穹申方至之休。壽命衍無疆之算。臣猥分郡組。共貳戎韜。迹遠觚稜。帷幄陰瞻於長樂。忱同葵藿。笙璫第想於承華。

賀皇后牋

坐於少廣。慶慈極之誕彌。朝于寢門。助聖人之教愛。宮庭溢喜。宇宙同和。恭惟皇后殿下。瑞應倪天。光昭
迥日。正始基化。歌二南芣苢之詩。視膳問安。備六寢禪榆之禮。協朱明之律呂。鏘綵仗之珮環。驩奉玉卮。
禮同黼屨。臣濫紆州紱。通領兵符。聆舜樂之九成。遙瞻南面。效堯階之三祝。竊比華封。

乾會節本州賀皇帝表

一人天拱。適符龍御之亨。萬國雲從。共慶虹流之瑞。系隆宗社。福被寰瀛。恭惟皇帝陛下。曰睿曰聰。乃文
乃武。金甌有永。紹寧人大寶之休。翠蹕早朝。娛太后萬年之壽。當嵩呼之華旦。繼夢月之佳辰。兩宮同時。
千載盛事。臣猥叨分竹。彌切傾葵。奉玉卮之恭。阻綴班於北闕。通銀臺之奏。但申頌於西崑。

賀皇太后表

六龍御極。增光長發之詩。萬國同心。推本思齊之聖。驩騰宮壺。和塞堪輿。恭惟壽和聖福皇太后陛下。曰
希曰夷。爰清爰靜。以天下養。備百祿之熾昌。與元氣游。葆六根之純粹。海內樂唐虞之化。宮中頌任姒之
音。臣叨預承流。遙伸歸美。冬溫夏清。禮嚴東面之朝。日升月常。福等南山之祝。

賀皇后牋

黼屨端臨。交上華封之祝。椒塗內助。仰承京室之規。喜溢六宮。和薰八表。恭惟皇后殿下。靜專成性。徽懿

秉姿珥簪進庭燎之箴。雞鳴有度。弓鞬奉高禘之祀。燕翼發祥。際上帝生商之辰。懋塗山興夏之德。仰占七政。日月並明。俯鑒四方。岡陵齊壽。臣分符江右。化被周南。首贊乾亨。體天行之不息。更祈坤載。協地道之無疆。

乾會節鈴司賀皇帝表

龍首庶物。觀天德之照臨。虎拜萬年。對王休而蹈厲。堪輿協氣。海宇頌聲。恭惟皇帝陛下。神聖整齊。武文經緯。諸福畢至。一登再登三登。我武維揚。五伐六伐七伐。虹渚載臨於盛旦。鳳音遙想於明庭。臣通領鈴符。恪共官次。葵傾觀闕。阻陪就日之班。花覆簪紳。隄謝需雲之宴。

賀皇太后表

天下傳歸於子。降寶冊之鴻名。聖人教愛以親。上玉卮之曼壽。非常之慶。嘉頌攸同。恭惟壽和聖福。皇太后陛下。冲澹頤神。儉慈孚化。輔佐先帝。夙殫卷耳之勤。愉佚東朝。允著思齊之聖。昉前殿紀誕彌之旦。正羣方傾就望之忱。肆膺鳳輦之朝。親下龍綃之拜。臣屬縻戎鍵。阻綴班行。現五色之雲。知獻占於太史。舞兩階之羽。諒增喜於慈顏。

賀皇后牋

上萬歲之壽。咸頌聖人。形四方之風。實基王化。凡居持載。罔不驩呼。恭惟皇后殿下。生稟靜柔。安行雍肅。

躬河洲采苻之潔。列聖顧歆。冀寢門視膳之恭。慈顏和懌。合坤其順。迺日而明。欣聆嵩嶽之呼。並受華封之祝。臣俯共武服。仰贊壽觴。星之遠。天之高。陛莫瞻於九級。漢之廣。江之永。詩但誦於二南。

皇子賜名本州賀皇帝表

家有嚴君。托中興之昌歷。天以聖子。作大國之宗藩。喜溢宮闈。慶關宗社。恭惟皇帝陛下。懋昭聖德。厚正人倫。保天命以宜君。四方無侮。貽孫謀而翼子。百世可知。爰錫嘉名。載敷大號。敬載有土。肇基二水之邦。格于皇天。式應三星之曜。俾耆而艾。長發其祥。臣糜跡侯方。傾心魏闕。監王成憲。願垂謨烈之休。啓我後人。益壯本支之盛。

賀皇太后表

東朝介福。式彰母道之尊。南國分封。庸迪孫謀之吉。兩宮交慶。百世懽昌。恭惟壽和聖福。皇太后陛下。長樂怡愉。大庭游衍。養以天下。日永瑤池。正于家人。春生玉葉。贊直茅於浯水。壯緜臙於宗藩。臣遜在侯方。阻瞻宸仗。思齊所以聖。遙頌徽音。皇矣。若周。益隆世德。

賀皇后牋

母資坤德之生。椒塗襲慶。男正家人之吉。茅土分封。宗社延洪。宮闈闓懌。恭惟皇后殿下。承天光大。法地靜專。成美化於周南。言能逮下。嗣徽音於京室。于以御家。屬聖子之勝衣。贊嚴君之錫爵。臣遠縻外服。阻

造內班。正風俗以厚倫。永歌后德。輔皇王之維辟。丕俟孫謀。

皇子賜名鈐司賀皇帝表

天佑我家。篤生聖嗣。國有鉅典。肇建宗藩。社稷靈長。神人孚洽。恭惟皇帝陛下。禮行貴貴。愛立親親。撫寶曆之昌期。萬年福祿。演銀潢之慶澤。百世本支。爰重燕謀。載頒鴻號。于疆于理。地營浯水之邦。有翼有馮。星拱周廬之衛。克開厥後。俾熾而昌。臣遠繫戎韜。愉瞻文石。施于帝祉。德已動於監觀。保我後生。命更歌於壽考。

賀皇太后表

堯母怡愉。介于景福。湯孫歧嶷。錫以嘉名。慶衍宗枋。歡隆慈極。恭惟壽和聖福皇太后陛下。爰清爰靜。曰希曰夷。佐先帝之中興。鷄鳴有度。膺嗣王之孝養。燕翼成謀。爰鍾受於綠車。乃分符於赤社。臣恪恭武服。阻造王庭。以御于家。喻贊思齊之德。克開厥後。佇成皇武之功。

賀皇后牋

坤稱乎母。作德配天。震索而男。建邦有土。慶成宗社。喜溢宮庭。恭惟皇后殿下。茱萸和平。關雎孝敬。嗣母徽於京室。在廟在宮。明子道於家人。正內正外。歡動勝衣之拜。光昭燾社之封。臣共武有嚴。稱班云。述風以周南之化。隄贊螽斯。烝哉豐水之謀。遙觀燕翼。

皇帝登寶位本州賀皇帝表

天作之君。表冠倫之大聖。父傳於子。昭立嫡之至公。曆數維新。神人肯慶。恭惟皇帝陛下。以周元子。爲舜重華。大德生知。聰明以臨。齊莊以敬。一人有慶。進退可度。容止可觀。積累厚而孫謀深。謳歌同而神器定。無爲而治。有道之長。臣叨領虎符。險瞻龍御。建皇極而王天下。幸際昌期。開明堂而朝羣臣。聳觀初政。

賀太皇太后表

肇聖德之龍飛。連開昌曆。垂孫謀之燕翼。功出慈宸。九廟尊安。八紘抃蹈。恭惟壽和聖福太皇太后陛下。道光任姒。行邁塗莘。範肅東朝。性適含飴之樂。規重南而養親視膳之榮。光昭嫡統之傳。丕衍皇家之慶。臣叨紆守紱。阻造鸞班。頌皇帝之萬年。永言齊壽。佑寧人之大歷。尙克圖功。

賀皇太后表

震出麗天。重明繼序。伸稱正位。一統蒙休。基祚斯皇。幅員肯慶。恭惟皇太后陛下。輔佐先帝。憂勤王家。思媚周姜。履肅雍於京室。訓貽禹子。服勤勞於塗山。瑞昭南面之符。光疊東朝之矩。臣屬糜侯服。險企慈帷。嫡統無疆。已慶大橫之兆。嗣徽有秩。尙稽小愆之謀。

皇帝登寶位鈐司賀皇帝表

乘時御極。宣日月之重光。居嫡宅尊。大春秋之一統。幅員愛戴。宗社安強。恭惟皇帝陛下。仁孝生知。聰明

時又踐寧王之丕祚。大歷維新。奉文母之徽音。皇天有慶。宜首正飛龍之御。以上承翼燕之貽。無疆維休。有相之道。臣濫巾戎轄。阻造朝班。五百歲而生。幸親見聖。萬億年其永。不替惟王。

賀太皇太后表

兆協大橫。運在當會之聖。謀貽小毖。功歸太上之慈。嫡統延洪。皇圖鞏固。恭惟壽和聖福。太皇太后陛下。躬基美化。教闡徽音。彤管光華。配豐功於祖烈。練衣朴素。示懿訓於孫謀。聿新歷服之傳。式副簾帷之託。臣司戎共貳。望闕呼三。庶民近天子光。忻逢昌曆。太極爲元氣母。永迪初基。

賀皇太后表

處主宅尊。光紹寧王之命。坤元居正。適彰太妣之音。一統親傳。萬邦胥慶。恭惟皇太后陛下。功侔持載。德備含弘。風化二南。衍傳家之忠厚。本支百世。肇繼序之聖明。大春秋正嫡之書。應日月重光之運。臣屬兼鈐紱。阻造軒帷。在天利見大人。已孚文命。介福于其王母。長詠思齊。

謝皇帝登極赦文表

日月重離。開國家之休運。雷雨作解。溥天地之至仁。萬邦咸休。一人有慶。恭惟皇帝陛下。堯文光宅。舜德出寧。神聖爲君。不受皇天之命。春秋立嫡。聿昭正統之宗。爰肆青於端門。示湛恩於熙代。臣猥分銅虎。險企金雞。大人繼照四方。聳觀初政。皇極敷錫五福。第奉寬書。

太皇太后加尊號本州賀皇帝表

御丕圖於南面。順應天人。崇徽冊於東朝。重增宗社。億年緝典。萬國懽心。恭惟皇帝陛下。皇極之宗。人倫之至。性同符於堯舜。達孝升聞。訓一本於姜任。徽音有秩。紹寧王之明命。彰祖后之尊稱。臣分牧有嚴。承休胥抃。介福于王母。難名太上之功。肖德以神孫。願共無疆之號。

賀太皇太后表

鴻名揚厲。用彰重慶之尊。龍扈繼承。懋舉盡倫之制。明廷孚號。寰宇傾心。恭惟壽和聖福太皇太后陛下。德備儉慈。教脩愛敬。佐我烈祖。成天保之憂勤。訓于神孫。示思齊之雍肅。粹美翟禕之服。增華琬琰之章。臣屬守銅符。欣傳寶冊。同御延和之殿。誕頌前猷。尊居慈福之官。永言至養。

賀皇太后表

統繼堯天。重華協德。位隆文母。太姒嗣音。寰宇休明。內庭肅穆。恭惟皇太后陛下。行高配地。功大補天。輔先帝以重光。憂勤夙至。肇嗣王之丕緒。福祿方來。奉寶冊於重闈。壽皇圖於覆載。臣屬縻郡紱。阻造廷紳。咸曰太皇。已慶元和之壽。願言帝母。永肩長樂之名。

太皇太后加尊號鈐司賀皇帝表

皇圖嗣慶。著母道於重坤。鉅冊稱尊。告王庭而大渙。宮闈增重。宗社蒙休。恭惟皇帝陛下。德爲聖人。孝治

天下侍宣仁之聽斷。元祐同符。稟慈福之起居。紹熙儷美。播無爲之懿號。隆太上之德音。臣猥介戎鈐。聳觀國典。思齊文母。旣彰有德之雍雍。於赫湯孫。願共厥聲之穆穆。

賀太皇太后表

離日方升。光傳國寶。坤元重慶。肇建鴻名。福萃三宮。歡騰八表。恭惟壽和聖福。太皇太后陛下。佐佑皇祖。怡愉東朝。德配姜任。植丕基於蒼籙。功高馬鄧。扶洪業於炎圖。宜效美於思齊。大歸尊於長樂。臣偶叨戎轄。阻綴朝班。丕哉烈丕哉謨。共僭嗣王之政。得其名。得其壽。載揚太上之休。

賀皇太后表

晉大號於慈闈。位隆長樂。紹丕基於萬世。慶本慈元。命肅治朝。禮行廣內。恭惟皇太后陛下。隨神冲澹。履行靜專。美紹思齊。宜毓文王之聖。訓垂訪落。實開成后之謀。贊重慶於御籬。推有尊於臨制。臣猥分戎轄。險聽恩綸。望少廣之宸居。莫班獸舞。頌長秋之壽曆。同播鴻名。

皇太后加尊號本州賀皇帝表

嗣王受此丕基。光膺明命。文母介以繁祉。祇奉嘉名。典冊流輝。幅員有慶。恭惟皇帝陛下。一人出震。五位乘乾。玉質金相。嗣延洪之大曆。寶璋羽翟。奉雍肅之德音。光進瑤編。重增鼎祚。臣叨分虎壘。隴望龍墀。保佑恩深。已際大明之運。怡愉樂永。更揚齊壽之休。

賀太皇太后表

毓正神孫。方布應門之詔。位尊祖后。復隆京室之稱。重慶萬年。丕休四海。恭惟壽和聖福太皇太后陛下。性超太上。德應黃中。元祐太功。法宣仁之鞠育。紹熙新政。燕慈福之起居。宜旌坤極之嘉名。式趾太宸之芳躅。臣屬分侯服。欽誦王綸。天子必有所尊。已光載籍。聖德無加於孝。長戴兩宮。

賀皇太后表

坤稱正位。訓迪嗣王。渙號揚庭。尊歸文母。簾帷介福。社稷垂榮。恭惟皇太后陛下。德著憂勤。躬行慈儉。虞嬪觀于滂泖。密贊聖謨。后稷生於姜嫄。美鍾神胄。晉長信尊尊之號。嗣思齊秩秩之音。臣忝守藩維。阻越軒陛。得其名。得其壽。幸同萬國之歡。宜爾子。宜爾孫。永頌兩宮之慶。

皇太后加尊號鈐司賀皇帝表

重明以繼大人。瑤圖垂慶。介福而于王母。玉冊有光。瑞溢簾帷。重關宗佑。恭惟皇帝陛下。敬仁成性。曆數在躬。惟后綏猷。蹈堯舜之孝弟。因親教愛。奉任嬖之肅雍。宜申慈極之尊。式表聖倫之至。臣叨兼兵轄。隸企陛簾。贊信長之徽稱。已光漢制。頌塗山之丕訓。益大禹功。

賀太皇太后表

嗣皇奉冊。尊居長信之名。祖后宣猷。夙迪思齊之訓。萬年集慶。八表蒙休。恭惟壽和聖福太皇太后陛下。

德邁維莘。道高于汭。金車玉路。備三世之典章。寶翟珍褱。云六宮之法度。美慈宸之疊矩。揚大號以同符。臣兼領戎鈐。竦聆郵綽。德壽早朝之典。已慶淳熙。延和同御之功。益歌元祐。

賀皇太后表

文母克昌。厥後光紹皇圖。大德必得其名。慶隆寶冊。四方來賀。百志惟熙。恭惟皇太后陛下。陰教齊家。慈元正位。推爲美化。邁周召之二南。著在徽音。紹姜任之大雅。宜膺渙號。增重坤稱。臣適貳鞞鈐。聳聆綸綽。踐其位。行其禮。莫重尊親。求厥寧。觀厥成。邁追來孝。

大行皇帝升遐本州慰皇帝表

堯父宅尊。春秋鼎盛。祀天告墜。遠邇震驚。降割非常。銜哀罔極。恭以大行皇帝。神聖文武。濬哲溫恭。萬千歲。怡愉恪盡。東朝之養。十一年寅畏。適祗上帝之威。期壽考之惟休。俄憂勤而積疾。詎圖大漸。驟至遐征。望欲斷於遺弓。命忍傳於憑几。恭惟皇帝陛下。有仁有孝。盡制盡倫。克念先猷。根聖人之至性。誕承慈訓。服天下之通喪。願少抑於孝思。以永綏於神器。臣屬糜守紱。哀捧告書。莫伸奔問之恭。徒切攀號之痛。

慰太皇太后表

雞鳴問寢。方慈極之深居。龍去遺弓。忽皇輿之新陟。宮闈震悼。海宇摧傷。恭惟壽和聖福太皇太后陛下。德備周姜。道光堯母。東朝垂訓。曾不改於儉慈。南面積憂。遽忍違於溫清。驟罹國殃。諒切聖懷。少寬憑几。

之思式副御簾之託

慰皇太后表

皇靈新陟。變撫遺弓。儷極永懷。悲興捐玦。六宮哀痛。九宇摧傷。恭惟皇太后陛下。坤道宅中。家人位正。脫簪而諫。期共濟於中興。綴衣于庭。忍遽聞于末命。雖委裘之悲。至切而定鼎之託。方新願制。盡傷永綏。敷遺云云。

大行皇帝升遐鈴司慰皇帝表

王宜日中。方慶垂衣之治。父有天下。遽傳憑几之言。宗社憫凶。幅員哀痛。共以大行皇帝。王道正直。帝德簡寬。奉長樂之清溫。不昭仁孝。聽邇英之勸誦。遙紹文明。方嗣服於萬年。胡委裘於一旦。烏號罔極。龍御何追。共惟皇帝陛下。聖德升聞。孝思永慕。重華協帝。方遏密於八音。冢宰總官。將諒陰於三祀。願少紓於聖抱。以弘濟於皇圖。臣逃領戎昭。哀傳國疚。阻伸奔問。惟重摧傷。云云。

慰太皇太后表

嚴宸居正。痛晏駕之奄聞。慈極宅尊。悵早朝之遽隔。哀傳海宇。悲結簾帷。共惟壽和聖福。太皇太后陛下。德厚承天。恩深與子。夙行恭儉。聖方頌於思齊。晚享怡愉。變忍聞於顧命。諒聖情之結戀。鑒輿志之攀號。願抑慈懷。永謀孫翼。

慰皇太后表

變興梧野。九土烏號。悲結椒塗。六宮縞哭。宅憂罔極。降割何深。臣共惟皇太后陛下。志紹徽音。躬行美化。冬溫夏清。佐孝養於東朝。海潤星暉。演慶源於中壺。驟撫鼎湖之戚。奚堪輿極之哀。願抑慈懷。聿扶新政。云云。

百日慰皇帝表

烏號淩遠。九土同悲。駒隙易流。十旬如隔。撫時哀疚。易月徬徨。恭惟皇帝陛下。曆數有歸。羹牆如對。雖擗踊哭泣。曷勝父子之情。而朝覲謳歌。當慰臣民之望。願節宅憂之制。益成繼志之圖。臣承乏偏城。阻趨嚴陛。云云。

慰太皇太后表

烏號銜恤。悵再隔於月遊。龍寢闕朝。恍十周於日浹。流光何速。哀思欲摧。恭惟壽和聖福太皇太后陛下。宮壺宅尊。簾帷託重。雖道揚王命。不勝慈極之懷。然燕翼孫謀。當念皇圖之本。願體臣民之戴。少寬朝夕之思。云云。

慰皇太后表

雲升梧野。頓隔千秋。日短冥階。駕言十浹。委裘禍迫。捐袂哀深。恭惟皇太后陛下。教盡人倫。慶隆母道。雖

易月以日。難窮伉儷之悲。然薦子於天。正重攜持之託。願俯從於中制。用式副於羣情。云云。

期年慰皇帝表

追玉几之遺言。制嚴易月。服練冠於初祭。哀重感時。霜露深悲。乾坤罔極。恭惟皇帝陛下。孝治天下。統承先王。雖見堯於牆。克篤終身之慕。然纘禹之服。所期大器之安。願從禮制之宜。少副輿情之望。臣屬廢藩屏。阻造闕庭。云云。

慰太皇太后表

調子命汝。易月有嚴。練而慨然。周星何短。哀承遺制。痛結慈衷。恭惟壽和聖福。太皇太后陛下。德紹宣仁。功侔明肅。天經地義。扶嫡統於方新。日邁月征。悵宸旒之愈遠。願勉從於衆志。姑少抑於至情。云云。

慰皇太后表

悲捐玉玦。痛極呼天。祭服練冠。制嚴易月。乘雲浸遠。滯露何堪。恭惟皇太后陛下。德佐先猷。慶鍾神胃。雖徬徨虞泅。望欲斷於蒼梧。然婉孌周姜。任方隆於京室。願少寬於哀抱。用不贊於鴻圖。云云。

再期慰皇帝表

龍湖未遠。可傷易月之喪。駒隙幾何。已舉再期之制。羹牆如在。霜露孔哀。恭惟皇帝陛下。道盡人倫。位隆世嫡。雖終身慕父。難窮至性之悲。然億載怡親。方疊慈顏之養。願重承休之託。少寬追遠之懷。臣隄綴蕃

宣阻班軒陛。云云。

慰太皇太后表

終天巨釁。降割一朝。易月通喪。寓言再歲。仙遊未遠。慈抱難居。恭惟壽和聖福。太皇太后陛下。功在先朝。志勤內治。雖變生憑几。悵闕問於雞鳴。然寄重垂簾。方稽謀於燕翼。願抑無疆之恤。益昌有大之休。

慰皇太后表

望斷乘雲。悵龍驂之浸邈。制嚴易月。恍鳳曆之再周。几屬幃封。式同追慕。恭惟皇太后陛下。承天功大。與子仁深。雖悼舜陟方。不替蒼梧之望。然開周嗣歷。方隆豐芑之休。願少抑於哀悰。用永綏於神器。

禫祭慰皇帝表

龍御何之。方切綴衣之痛。駒陰未遠。已驚釋禫之期。易月從宜。感時增疚。恭惟皇帝陛下。恭默思道。愛敬事親。天作之君。當周艱而卽命。日致其孝。將舜慕以終身。願寬追遠之至情。不慰蒼生之顛望。臣濫承郡紱。阻綴朝班。云云。

慰太皇太后表

袞衣萬歲。痛隔終天。禫服一朝。權從易月。感時憂戀。率土靈傷。恭惟壽和聖福。太皇太后陛下。德著寶禕。功藏金匱。撫鼎湖之龍去。子保何追。懷豐水之燕貽。孫將有衍。願副普天之望。式紓慈極之悲。云云。

愬皇太后表

宮車輟駕。浸遠翠華。國典行權。恍終素蹕。託言釋禫。胡忍免喪。恭惟皇太后陛下。夙著脫簪。驟擢捐玦。雖梧雲不返。永爲禕翟之傷。然芑水方來。共徯簾帷之助。願釋居諸之感。俯從遐邇之情。云云。

賀皇帝聽政表

思皇烈考。誕受寶龜。於穆嗣王。甫效治象。慈簾保佑。熙政闡明。恭惟皇帝陛下。德實天生。動爲世則。入于翼室。稱元子以宅宗。出自應門。會諸侯而作誥。欽奉怡愉之訓。爰親兢業之幾。旣兩宮垂拱以無爲。宜四海謳歌而來覲。臣屬靡郡國。險懋闕庭。御延和殿之正朝。願光祖烈。奉紫雲樓之盟誓。第守藩條。

賀太皇太后同聽政表

綏壽而右文母。高拱慈宸。肖德而有神孫。共臨幾政。徽音洋溢。光訓昭宣。恭惟壽和聖福太皇太后陛下。功邁塗山。德高媯汭。施于帝社。已深慶錫之源。保我後生。益衍壽寧之福。章憲垂簾於天聖。宣仁稱制於延和。紹昔大猷。爲今懿範。臣屬靡守綏。欣聽俞綸。太易太始太初。莫測無爲之化。四門四聰四目。共觀有道之朝。

天瑞節本州賀皇帝表

龍德御天。重華于帝。虹書流渚。長發其祥。萬姓驩呼。三辰擁佑。恭惟皇帝陛下。聖德克肖。天性自成。光北

斗之樞。篤生黃帝。美南山之壽。誕命文王。節屆千秋。時維九月。臣縻身侯度。拜手王休。三千臣同心。永言華壽。五百年生聖。敬贊河清。

賀太皇太后表

聖王垂拱。萬年方開。燕翼太皇。怡愉億載。親見紅流。海宇春輝。宮闈日永。恭惟壽和聖福。太皇太后陛下。身基美化。德著慈元。正位而定家人。功高配祖。介福而來。王母慶積。貽孫律協。素商節書。金籙。臣濫膺藩屏。阻賀簾帷。假樂命之慶。春秋之鼎盛。思齊聖也。同日月之離明。

賀皇太后表

龍德方升。祥書載震。燕謀有慶。福萃重坤。旗翼光華。幅員熙洽。恭惟皇太后陛下。道侔博厚。德備仁明。虞汭來嬪。女子舜帝。周京作配。生此武王。方觀日上於扶桑。隨紀虹流於華渚。臣濫叨一障。險企千班。大域中王。既祝華封之壽。爲天下母。願齊西極之年。

天瑞節鈐司賀皇帝表

謳歌與子。方開捧日之祥。福祿宜王。初紀流虹之慶。光生宗社。歡溢域輿。恭惟皇帝陛下。天德生知。乾元首出。載震載夙。膺天地之珍符。繼聖繼明。正春秋之嫡統。當瑤光之瑞節。際金顛之昌辰。臣分虎有嚴。抃驚欲舞。呼玉卮之萬歲。險贊王休。進金鑑之千秋。嗣殫臣職。

賀太皇太后表

萬壽齊天。思齊以聖。千秋紀日。長發其祥。廣宇休揚。重闈慶洽。恭惟壽和聖福。太皇太后陛下。以女堯舜。爲今嬖任。有典有則之貽。輔于皇祖。立政立事之準。訓乃文孫。當月屆於素商。喜節書於華渚。臣猥塵戎轄。阻賀宸闈。請祝聖人。既效堯封之職。亦有文母。載賡周頌之章。

賀皇太后表

辛歲重光。昔符夢日。乾元首出。今紀流虹。歡溢華封。慶歸長信。恭惟皇太后陛下。徽音大雅。美化二南。德配重華。觀嬪于汭。祥開長發。立子生商。扶陽谷之初升。紀高禩之載誕。臣領鈐偏郡。銜表明廷。五百歲河清。既覩聖人之出。三千年桃實。願同王母之尊。

太行皇帝諡號本州慰皇帝表

祀以配天。致聖人之達孝。廟可觀德。彰烈考之隆名。典册十年。宗祧九鼎。恭以端文明武景孝皇帝。光宅天下。簡在帝心。敬直義方。煥經天而緯地。事名物應。昭脩政以攘夷。大德大功。立親立愛。自生民而未有。熙鴻號於無窮。恭惟皇帝陛下。離象重光。乾龍首出。聖盡倫。王盡制。始于家邦。宗有德。祖有功。行其典禮。式崇徽譽。昭對皇靈。臣叨領虎符。欽傳殿令。告神明。頌盛德。已觀國典之光。薦郊廟。揚洪休。尙述侯邦之職。

慰太皇太后表

居長樂之宮。興懷鶴駕。瞻顧成之廟。肇錫鴻名。大冊垂榮。慈衷悼往。恭惟壽和聖福。太皇太后陛下。以天下養。與元氣游。明肅臨朝。親立仁皇之策。宣仁在御。永懷神考之思。丕對皇靈。昭升熙號。臣屬靡侯。絀阻慰震。簾云云。

慰皇太后表

九疑陟遠。莫返皇靈。七廟升宗。聿彰世德。洪名有赫。哀抱彌深。恭惟皇太后陛下。位正家人。道隆坤母。躬葛覃之節儉。厥配有光。秉清廟之肅雍。于嬪增感。於惟大冊。肆對皇穹。臣跡繫分符。馳神望闕。云云。

大行皇帝諡號鈐司慰皇帝表

翼室宅宗。考先王之制禮。觚壇告帝。爲烈考以易名。大冊遙彰。皇靈昭假。共以端文明武。景孝皇帝。體元居正。持盈守成。端獨化之原。文經天地。明萬幾之理。武定邦家。景行有容。孝思無極。上可以配祖宗之德。下可以垂子孫之休。恭惟皇帝陛下。弼我不基。鑒于成憲。寧王克綏。受命篤業。忱辭嚴父。莫大配天。答揚光訓。奉徽稱於宗祀。昭緝典於明時。臣通領戎昭。竦承帝號。堯萬世如見。莫名巍蕩之功。周諸侯來朝。第贊肅雍之相。

慰太皇太后表

盛德之祀。百世肇建嘉名。太皇之壽。萬年興懷。緝典慈宸。惻楚穹覆。鑒觀恭惟。壽和望福。太皇太后陛下。懿範兩朝。仁恩四海。爲元氣母。克篤貽孫。育天下君。忍聞祈禱。哀時大號。對越皇靈。臣身貳戎。鈐心懷國。典云。

慰皇太后表

大德得名。尊歸昭考。嗣王謀廟。上奉徽音。宗禰休揚。宮闈愴極。恭惟皇太后陛下。儉昭練服。中協黃裳。嗣任德之肅雍。思齊以聖。名堯功之巍蕩。煥有其章。聿深羽翟之懷。於赫觚壇之告。臣猥兼戎轄。險贊邦彝。云云。

冬至節本州慰皇帝表

一陽來復。感駒隙之易流。三祀諒陰。悵烏號之浸邈。愴深履屨。悲著羹糲。恭惟皇帝陛下。清明在躬。恭默思道。水有源。木有本。方嚴祭祖之時。霜旣降。露旣濡。不替思親之念。少抑居諸之慟。仰膺付託之隆。臣逃守遐邦。阻班嚴陛。誦先王省方之戒。願謹起居。秉諸侯謀廟之忠。聿懷奔走。

慰太皇太后表

暖律吹噓。感一陽之初復。慈簾擁佑。訓三祀之通喪。痛在宮闈。情均海宇。恭惟壽和聖福。太皇太后陛下。德音慈福。懿範宣仁。履轍迎長。天休方至。冕旒問寢。子保奚追。願少抑於慈懷。以永綏於孫翼。臣屬縻侯。

服。險企御閣。云云。

慰皇太后表

復陽在地。氣應黃鐘。坤德承天。悲深素蹕。六宮增疚。萬宇永懷。恭惟皇太后陛下。長信宅尊。思齊繼美。手扶宮日。坐占千歲之長。目斷臺雲。尙想九疑之遠。願紆哀於儷極。以永翼於皇圖。臣遜守江城。險瞻禁闕。云云。

啓殯慰皇帝表

三年諒陰不言。悲深翼室。七月同軌畢至。告啓葺塗。遠日戒嚴。終天增慕。恭惟皇帝陛下。外勤謀廟。內奉臨朝。制爰舉於因山。龍輜將駕。情永懷於陟岵。鳳紼奚追。願寬劍舄之思。益重基圖之託。臣屬糜斗壘。阻慰宸庭。云云。

慰皇太后表

居長樂之漢宮。永懷鶴駕。卜會稽之禹穴。垂戒龍輜。悲結絃闈。痛均薄海。恭惟壽和聖福。太皇太后陛下。憂勤德備。擁佑功高。百世可知。首正貽孫之則。七月而葬。豈勝思子之懷。願東望以節哀。重外朝之同御。臣身糜乘障。跡阻趨班。云云。

慰皇太后表

龍湖言遠。椒掖永懷。鳳翼戒嚴。葳塗載闢。六宮雨泣。萬宇雷哀。恭惟皇太后陛下。儷極勳高。正家化撫。軒皇之劍鳥。耐賁橋山。奉舜帝之衣裳。思藏梧野。尙軫乾坤之記。願紆朝夕之思。臣身繫分符。神馳攀紼。云云。

發引慰皇帝表

鸞車既駕。陟岵哀深。龍匣畢塗。崇丘制舉。新宮永闕。翼室增傷。恭惟皇帝陛下。思道諒闢。送終哀戚。居喪讀葬禮。不愆復土之期。因山不起墳。尤切望陵之感。翼少寬於孺慕。以丕重於宗祧。臣靡跡侯藩。傾心宸陛。云云。

慰太皇太后表

日淪西極。悵鶴駕之長遊。天拱東朝。痛龍湖之永闕。重閭悲繫。九土慕思。恭惟太皇太后陛下。福備怡愉。功高擁佑。撫綴衣於翼室。億世貽孫。念加斧於畢塗。千秋望子。願抑思齊之感。益昌小恙之謀。臣叨領偏城。阻趨慈陛。云云。

慰皇太后表

國謹重喪。龍棺就殯。禮襄大事。鸞掖興懷。海宇同哀。山陵告備。恭惟皇太后陛下。憂勤孔夙。哀感謹終。媿納居諸。悵虞琴之已遠。會稽咫尺。望禹穴以奚追。願紆旣葬之悲。式相維新之治。臣承流有守。伸慰無從。

云云。

祈廟慰皇帝表

先帝之葬衣冠載虞神祐。嗣王之奉宗廟。丕祈皇靈。昭穆用休。典章備舉。恭惟皇帝陛下。以舜大孝。居商諒陰。如慕如疑。既畢因山之禮。以享以祀。聿嚴升禩之恭。勉承翼翼之容。深抑煢煢之感。臣屬糜牧訓。阻奉駿奔。云云。

慰太皇太后表

嗣王宅恤。奉先祐以升宗。聖母思齊。感皇靈而悼往。禮容有赫。祀事孔明。恭惟壽和聖福太皇太后陛下。壽考維祺。儉慈爲寶。佑我烈祖。有典則以貽子孫。保子冲人。脩宗廟以序昭穆。祈既行於永紹。哀少釋於慈元。臣叨綴蕃宣。阻班奔走。云云。

慰皇太后表

地隔丹洲。畢舉九虞之祭。天臨清廟。昭升七世之宗。壓主思皇。椒闈若惕。恭惟皇太后陛下。性鍾慈儉。德備憂勤。嬪虞帝以日欽。陟方浸邈。對文王之於穆。率祀惟恭。願紆坤極之思。益衍乾符之慶。臣屬糜民牧。莫效侯朝。云云。

正旦慰皇帝表

王正書月。景命維新。靈德在天。孝思罔極。運開曆數。哀動九筵。恭惟皇帝陛下。思道奉先。與時更始。王受同瓊。祭不替於元辰。帝見羹牆。禮益嚴於上日。願抑居諸之感。丕承擁佑之恩。臣屬守偏城。阻趨嚴陛。云。

慰太皇太后表

正月始和。律更太簇。昊天不弔。痛在思齊。曆數維新。官闈孔惻。恭惟壽和聖福太皇太后陛下。爲元氣母。與太極游。孟春而戒逾人。撫時其邁。上日而受文祖。擁治方新。願寬丕子之思。益重神孫之託。臣屬糜宣化。阻慰履端。云云。

慰皇太后表

羲日更新。治開泰象。虞雲浸遠。悲在乾元。駒隙易流。烏號何及。恭惟皇太后陛下。光輔先帝。敬授人時。元會衣冠。尙想熙明之政。月游劍鳥。忍聞永紹之名。願寬悼往之哀。悼。益撫履端之昌運。臣屬糜一障。阻慰三朝。云云。

改元賀皇帝表

春王會於三朝。慶開景運。皇天佑于一德。治紀初元。正朔肇新。乾坤有造。恭惟皇帝陛下。春秋正始。曆數在躬。仰則定陵。開三傳之丕祚。近稽哲祖。基七葉之昌期。攸鳳曆以改絃。衍馮圖而下鼎。臣親逢更化。適

纒承流。揚偉蹟。鋪闕休。恪共侯度。撫大平。應昌歷。謹授人時。

賀太皇太后表

天王一統爲元。載攸正朔。太皇萬年齊壽。同御邦家。日月重明。乾坤更始。恭惟壽和聖福。太皇太后陛下。遣符烈祖。功擁神孫。乾德太平。訓實承於昭憲。元祐盛際。政共聽於宣仁。洵開更瑟之休。實繫垂簾之盛。臣叨承侯服。丕奉慈宸。基正始之風。已新美化。播思齊之頌。永載徽音。

賀皇太后表

春秋以一爲元。曆開昌運。關雎之化正始。本在慈宸。正朔更新。國家胥慶。恭惟皇太后陛下。有娥長發。太妃思齊。齊壽以奉太皇。德惟子肖。受福而于王母。祐自天申。宜渙號以繫年。示同文而更始。臣猥乘一障。不戴三宮。當昌歷。應休期。已供侯服。綏眉壽。介繁祉。益贊母徽。

曆日謝皇帝表

乘龍御以紀年。一元正始。詔虎城而頌朔。千里承休。敬授人時。對揚王命。恭惟皇帝陛下。明哲作則。曆數在躬。欽若昊天。熙春夏秋冬之績。建用皇極。協雨暘寒燠之疇。乃誕布於成書。以昭垂於新治。臣蕃宣有恪。播告惟恭。錫厥庶民。順中星而平秩。佑于一德。歌化日之舒長。

謝太皇太后表

歲正孟陬。一元改紀。朝臨長樂。萬國頌正。春朔會同。神人和洽。恭惟壽和聖福太皇太后陛下。怡愉萬歲。擁佑一人。肖德而有神孫。光膺昌歷。受福而于王母。丕輯蕃釐。載頌協律之書。式重垂簾之政。臣欽承風紀。誕布侯藩。聽嘽竹之猷。誕敷和氣。獻蟠桃之頌。益贊壽眉。

謝皇太后表

鳳曆頒春。東朝介福。虎城告朔。北面承休。歲定四時。天佑一德。恭惟皇太后陛下。思齊肅穆。少廣怡愉。訓示塗山。曆開禹子。教行涓涖。紀協周王。春朔攸同。乾坤交泰。臣承流下障。奉令孟陬。協和萬邦。第贊定時之績。嚮用五福。益陳曰壽之休。

疏

壽崇節本州進功德疏

九龍吐水。當摩耶產佛之辰。萬歲呼嵩。上大母延年之請。敬憑二氏。仰贊千齡。壽和聖福皇太后陛下。恭願大安大榮。至憐至佚。慶雲五色。現南極之祥光。壽域八荒。衍西池之長算。

鈐司進功德疏

三寶曰慈。南極衍太皇之福。五兵不試。西江陶聖化之風。仗仙釋之殊因。贊宮闈之不慶。壽和聖福皇太后陛下。恭願位隆少廣。算等崑丘。仰大慈尊。誕節正同於盛旦。得無量壽。長生永協於先天。

乾會節本州進功德疏

聖瑞虹流。開半千之休運。官聯虎拜。瞻尺五之清光。謁玉翠之祥氛。哀緇黃之妙果。皇帝陛下。恭願駁擊。克廣龍德。方中地久。天長壽命。衍洪源之慶。河清海晏。皇圖鞏磐石之安。

鈐司進功德疏

天臨寶位。夙開繞電之符。地領王鈐。載罄呼嵩之祝。謹率兵戈之屬。處脩道梵之緣。皇帝陛下。恭願玉燭。四時金湯。萬里元龜。大貝梯航。來川岳之珍。歸馬放牛。旗蓋壯東南之運。

天瑞節本州進功德疏

飛龍在天。大橫有兆。流紅貫月。景命維新。演道梵之真詮。嵩聖明之瑞節。皇帝陛下。恭願維天其右。如日之升。五百歲而生。已開昌歷。億萬年其永。益鞏皇圖。

鈐司進功德疏

爲天下君。祥書帝武。祝聖人壽。歡動戎昭。闡二氏之真科。崇千秋之誕節。皇帝陛下。恭願泰元有相。長發申休。在辛歲曰重光。方升如日。以乾元正五位。多歷斯年。

大行皇帝升遐本州進功德疏

帝棄羣臣。忍傳末命。教宗二氏。恭薦殊因。慨極烏號。戀深蟻慕。大行皇帝。伏願游神極樂。觀化太虛。十四

聖之在天。皇靈陟降。億萬年之與子。不祚綿洪。

鈐司進功德疏

出宮駕晚。縞素興哀。望闕臺孤。緇黃嚴薦。恭哀冥福。遙相宸游。大行皇帝。伏願性悟真如。道超無極。成慶而垂萬世。聿齊九廟之靈。後天而彫三光。長作百神之主。

皇帝聖躬遠和保安諸廟疏

天子萬壽。詎期無妄之災。臣人一心。共徯有神之相。惟帝齡之悠久。實神貺之扶持。名山大川。尙鑒蘋蘩之意。普天率土。不勝葵藿之私。

本州宮寺保安疏

皇極九五福。合率土以傾心。帝壽千萬年。籲慈尊而請命。皇帝陛下。伏願寅畏享國。清明在躬。王受命無疆。惟休。誕迎和氣。天行健自強不息。丕享脩齡。

鈐司宮寺保安僧疏

惟聖宅尊。共祝一人之慶。以臣請命。敬皈三寶之慈。皇帝陛下。伏願歷數在躬。神明其德。九五福曰壽。丕享康寧。億萬載齊天。式臻永久。

道疏

率土傾心均願聖人之壽。籲天請命肅殫臣子之忱。同前

大行皇帝遺詔本州成服道疏

道揚末命。忍聞晏駕之音。瞻仰昊天。上訴遺弓之慟。脩崇冥果。攀慕遐征。大行皇帝。伏願返于混元。光我烈祖。洋洋而在上。俯察臣民。刻刻以揚靈。永綏宗社。

僧疏

捧九天之遺誥。帝馭何追。皈三寶之真乘。臣心欲割。

鈐司成服道疏

吳穹降割。悵宸馭之上賓。率土興悲。望帝庭而哀籲。虔資冥福。遙相仙遊。大行皇帝。伏願靈德昭回。皇明陟降。衣冠雖邈。會烈祖以在天。宗廟如存。朝百神而爲主。

僧疏

吳穹降割。慟玉仗之上賓。率土興哀。望金仙而仰籲。虔資冥福。遙相仙遊。

本州成服滿散疏

制嚴易月。痛君父之通喪。望極乘雲。薦人天之勝果。露香躑躅。釋經悲傷。大行皇帝。伏願堯性常在。舜明不隔。成慶而垂萬世。聿齊九廟之靈。後天而彫三光。長作百神之主。

鈐司成滿服散疏

捧易月之制書。萬邦哀痛。脩升遐之冥果。三寶證明。喪紀有嚴。孝思罔極。大行皇帝。伏願羹牆不遠。劍鳥如生。帝鄉而乘白雲。真游冲漠。孫謀之注豐水。遺澤深長。

大行皇帝本州追嚴道場疏

維新陟王。悵皇靈之日遠。演大乘法。資勝果於天游。悼痛深。薦言有俶。大行皇帝。伏願性超清淨。德邁圓通。生爲帝。沒爲神。豐功不泯。高配天。厚配地。明德無疆。

鈐司追嚴道場疏

皇靈冲舉。莫追汗漫之遊。淨業真如。式薦逍遙之果。終天哀痛。率土慕思。大行皇帝。伏願陟降太虛。超升無極。儼橋山之劍鳥。云云。

申省狀

辭免新除秘書省正字狀

具位文天祥照會。十月二十六日。伏準省劄。十月三日。三省同奉聖旨。文天祥除秘書省正字者。某猥以疏賤。叨被聖恩。望闕瞻天。莫知所措。伏念某。自叨親擢。未歷外庸。以讀書學從政之方。以奉祠爲書考之日。方竊山林之暇。敢圖臺省之登。負乘非宜。循牆無任。伏望公朝。特賜敷奏。令某滿足宮觀兩考日。祇被

新命。其於出處得宜。庶幾無負聖明拔擢之意。所有省劄。未敢祇受。除寄本州軍資庫外。須至申聞者。

再狀

具位文某照會。於去年十月二十六日。伏準省劄。十月二日。三省同奉聖旨。文某除秘書省正字者。某伏念一介庸賤。叨竊非宜。加以從仕以來。未有庸歷。輒具狀申控。乞候宮觀兩考滿日。祇被新命。十二月二十九日。伏準省劄。十二月九日。三省同奉聖旨。不允。某除已望闕謝恩。擇日前來供職外。須至申聞者。

辭免知寧國府狀

具位文某照會。伏準尚書省劄。子。四月十七日。三省同奉聖旨。文某差知寧國府。替朱應元缺者。起家超躡。望闕徘徊。伏念某實無他腸。粗有遠志。昔年憂國。冒當事任之難。數歲杜門。寧悔身謀之拙。屬明良之胥慶。念岳牧之疇庸。曾謂栖遲。遽叨選用。惟是某省愆已至。貶秩猶新。雖公論至久而愈明。而丹書未謂之無過。儻不量於出處。是自速於顛隤。欲望公朝。特賜敷奏。收回成命。改畀叢祠。使某得以讀書養親。安身寡過。他有驅馳之日。無非報效之年。所有省劄。已寄留吉州軍資庫。未敢祇受。須至申聞者。

文山先生全集卷之五

書

回胡僉判請交割除寧海軍節度判官廳公事日

某仰德襟期。比布之竿牘。顛飭謝言。茲不贅吐。首祈崇炯。某幸甚。區區此來。得忝交代。意者。天將開攀拊之緣。使之拉湊。一至於此。惟是天賦偏於愚戇。親見聖主。懇焉求言。意應詔者。必有中今日之故。側聽逾久。無能爲國家陳大計者。私念上悔悟勇決如此。而某蒙恩至厚。他人旣不言。則雖疎遠。豈容避其責。是以積忱累日。冒死投匭。以冀一感悟天聽。出關席藁以來。首領且不自保。況苟官職乎。高誼不薄。猶以同案爲情。連屈軒車。復畀翰墨。一吏至。又持公文以來。周旋曲折。無非眷愛。某感激不自勝。惟如前之義。則有不可孤長者之意。不敏謂何。某尙留此待旨。若數日後。威命不下。則是上憐其愚而寬宥之。某當歸且念咎矣。而非所敢望也。所有添差僉判廳公用。某一切不曾祇受。或郡府不以某爲不肖。他有情文。則恐吏輩爲欺。而亦某所不與知也。本須具狀申府。惟身爲罪人。不敢自擬於屬吏之列。得於畫諾之次。叙其衷情。則某之受賜甚厚也。臨風拳拳。

賀吳提舉西林己未

文山先生全集 卷之五

某自九月赴京師時。請叩門墻。蒙警策備至。妙語天然。式相行色。篋笥間至今耿耿有光氣。第某解舟至豐城。及聞新局肇更。鄰靡茂畀。細讀仕隱不同轍之句。則雲駛月運。舟行岸移。轉瞬之間。已成兩樣。雖然。此非爲明公榮也。纓冠裘裳。世道有賴焉。某來上下以防鄂。故爲之瀨洞。聞諸閩雲集。而敵正不多。以此爲不足慮。獨賜教時。則衡陽之事。明公蓋已及之。而中外未之信。某以十月晦至脩門。則聞聚毒已并流。波漫漫。秣陵荷擔之事。蓋凜凜已兩月。中間新相至。則又得月十日定帖耳。然我之緩急。往往視敵之起息爲之。則定帖者。未可保也。譬如一間屋。前人放火。已燒及旁舍。僅僅得全宅未動。卒急得一曉事人。率衆拯救。雖千百擔水。未足以頃刻沃滅。明公蓋防一大頭項也。今事莫如袁吉之急。袁以改畀明公。而鄉里又得平林爲重。時有明公。諸人必能一心同力。以障潰堤之衝。藉此無恐。帷內間則病根未去。履翁掣肘尙多。雖言路大開。而奸諛熏注之深。搢紳多不能自拔。徒聞應詔投醜。則學校與布衣而已。世變至此。可爲慨嘆。某不量其愚。輒上書論其事。區區以爲宗社有故。死亡亦在旦夕。不若犯危一言。有及於今日之難。其得禍與否。不計也。今出關待罪已三日。而上猶未見施行。未知後命如何。藉天之靈。祖宗之休。明公之庇。得全首領。而以周旋於義旅之後。不勝願也。而不敢望也。封事藁止於一本。付壁弟全錄。以呈似。其疏狂。知執事不笑且憐之否。其惟節鉞交錫。旌旗一新。誼當專狀爲慶。願世變至此。明公方任大責重。以與上下同憂患。某不敢作平世語也。惟明公亮之。引筆嚮風。拳拳不備。

回聶吉甫號心遠

某比道從鳴珂。幸甚獲下膺龍之拜。蒙眷愛稠渥。侍樽俎間者連夕。感激不自勝。別後凡百餘日。數千里行役。貿貿於一來一往之間。大可取笑。伏承寶墨。鐫教備至。今天下大勢。所以削弱不支。實坐於文物制度之密。區區直欲割去繚繞。使內外手輕脚便。如此而後。可以立國。中書言規模大槩。所以纖悉上下。其說則未也。朝廷若不鄙而行之。則台諭欲列置一帥。如古方伯連率者。又當再商量也。區區之心。既不足以行於國。退而欲爲一鄉一宗之謀。正將擇險以爲依。集衆以爲安。但事勢浩大。不量其綿力。而欲舉之。善後與否。視無所及。何如。某乍歸冗劇。使命日亟。返姑此治報。何當一日會晤。以請所未聞。

賀何尉名時字了翁

某頃揭揭入國時。江皋祖帳。爲意腆甚。感激之私。不自勝。別後。不圖世變。沄沄天下大事幾去。某始而駭。中而疑。繼而憂憤。又繼而大聲疾呼。以至於流涕出血。相去近百日。而展轉變化。以至若此。事變可畏矣。哉。某學無涵養。不能謹其所發。倉卒來歸。求爲杜門循省之計。藉慶雲在上。以此月七日。善達鄉國。甫入境。側聞一同桑梓。若君實庇蔭膏澤之。以廉革貪。以明易暗。以神奇變異懦。大冠縫掖。交以程吳歸焉。方謀奉狀至屏下。而紫氣煌煌。已移照鄰次。交臂相失。懷此悵快。當今事會方殷。人才不競。一杞二杞。國家常病之。今州縣之於執事。亦此類也。凋瘵瀕洞之餘。雖近於不可爲。而開繁被劇。如長才得以自見。可賀。

也。吉水之爲邑。得之朋友見謂。官錢無定額。賦無正籍。是以若此其竭澤也。平林以鄉人爲郡。念此至熟也。執事軍期之暇。爲之定制立數。求爲一定之經。惠幸茲邑。其庶幾乎。

上丞相除秘書省正字辭免不允。

正月吉日。具位文某。謹再拜奉書于某官。某昨蒙朝廷不以不肖。授秘書省正字職事。某自念非才。未有庸歷。輒具狀辭控。旣而省劄降不允之旨。鈞翰重促行之命。伏惟聖天子之所拔擢。大丞相之所提撕。德至渥也。某一介晚末。踰伏深密。所知不出田里。大丞相勒名鼎彝。紀功太常。坐于廟朝。進退百官。而佐天子出令。下士之人。求望其位貌。聽其警效。不可得也。惟聞弓旌紛於阿澗。東帛徧於巖野。元德碩望。麟游鳳集於省臺之上。想望風采。以爲不圖此生。獲見昇平如此。詎意今者。宸命收錄於草茅。鈞畫照耀於山谷。恩光所被。震悸不自持。僕惟此舉。不見於今世久矣。夫大君宗子。居天位者也。宗子之家相。理天職者也。自一命以上。所以輔贊大君。彌縫冢相者。皆將以分奉天之責者也。書曰。天工人其代之。又曰。欽哉惟時。亮天功。又曰。天命有德。天討有罪。天叙有典。天秩有禮。韓愈曰。天付人以賢知才能。豈使自有餘而已。忱畏天命。而悲人窮也。天命人事。常判然不相侔。而前言往傳。勳必以天爲訓者。人雖藐然。萬物備於我。苟爲凡民則已。大之爲聖賢。秀之爲士。天地民物。孰非一己之責。任重致遠。皆性命之當然也。由此觀之。用人者。非私於其人。爲人用者。非私於其用。近臣之得所爲主。皆所以事天也。此意不明。上之人。操其公

器大柄以自私。曰：吾能以富貴人下之人，失其靈龜，質質於勢利之途而不知返。是以上不知以代天理，物爲職，而無復有以貴下賤之風。下不知以畏天，悲人自任，而無復有比之自內之義。天地失位，人極不立。人物悖其性，往往由此者多矣。伏惟大丞相勳在王家，意在人物，方且以不滿假處功，以不驕吝處才。開忱布公，集思廣益，嘉與天下賢士大夫，以爲共理。如僕庸愚，亦得自列於兼收並蓄之下，顧僕不足以稱所舉爲大負，而由先生此心，天命之所流行，國家之幸，斯世之福也。謙之九三，勞謙君子有終吉。先生之用心以之，泰之九二，包荒用馮河，不遐遺。先生之用人以之，孟子曰：古之人所以大過人者，無他，善推其所爲而已矣。由是而言，自可比功於隆時，垂號於無窮矣。僕雖嵬瑣無足齒，其於明時，不敢自棄，求所以無負上帝之衷，仰承君相之惠，將盡心焉。某已於元日，祇被新命，謹別狀遵稟，惟是屬有私役，造闕之月日，尙此遲之，伏惟大丞相矜憫其情，而原其後至之罪，公爾忘私，國爾忘家，某之補報知遇，將有日也。下情不勝懇惻激切之至，謹奉書，不備。

通廟堂

溥論承心制事

某仰恃鈞慈，直布心腹。某昨歲四月，遇先人本生母之喪，以服制未定，請之朝廷，遂作假俟伺旨，揮後來此申未及下，而某得劾，某以義起禮，謂先人若存，則於所生母當申心喪，先人既已矣，則某照承重例，遂承心制，自謂仁之至，義之盡，莫如此矣。未幾，龍溪友議板行，天下謂某當有重服，匿而不行，一時聞者爲

之疑惑。後巽齋歐陽祕書守道爲或問。衢州曾添教鳳爲詳目。二先生發此精義。禮意昭然大明。某竊聞龍溪友議。印本以萬本。閩廣遐陬。莫不有之。旣不能家。至戶曉。須得朝廷討論墳典禮意。播之邸報。著以爲令。使天下知孝子慈孫之用心。而不至爲謗者所惑。是以拳拳致請。乞下太常討究一番。三月末旬。伏領鈞翰。特蒙先生照見曲折。謂其所遇在禮之變。所循爲禮之正。且如昨者。臬中已下禮寺。某以爲定禮典。正流俗。在此舉矣。四月三日。忽得承受人報。備至寺狀所申。乃引紹興休寧縣尉蔣永吉。與寶元集賢校理薛紳爲證。直指爲某合持齊衰三年。嘻。其誤矣。聖人制禮。自有隆殺。其隆殺本之人情。切詳蔣永吉之祖妾。直下只有蔣永吉。使蔣永吉而不服。則其祖妾爲若敖氏之鬼矣。所以爲孫者。須持齊衰。今先人之本生母。自改適劉氏之家。有劉氏子孫持重服。則主祀固是他姓矣。是以某體先人之心。則只當承心制也。況蔣永吉無祖母。今則某有正祖母在堂。何緣可爲劉母持齊衰乎。劉母之子。旣持齊衰。某又自姓文。何緣兩姓。俱有齊衰之服乎。又詳薛紳之母。旣稱爲祖母。萬壽縣太君王氏。則是嫡祖母也。當時朝廷止給假三日。只從孫之本服。所以薛紳再申。指爲先人所生母。謂服不可絕也。故有三年之制。此正是承重孫。又自與蔣永吉者不同也。禮者。不讀書。不講義。不明先王隆殺之意。往往只據吏人檢至故事。見有父所生母四字。便謂事體一般。鹵莽申上。更不曾子細致辨於同異之間。今日未須論某所得服如何。且只論先人之服。先人之母。改適劉氏。旣有劉氏子爲服。且先人係出繼別位。又非本位之比。先人只當有

心制不當有齊衰明矣。若先人有齊衰，則某當以齊衰。先人有心制，則某只合承心制，豈有先人本等，止有心制，而某乃有齊衰之服乎？朝廷所行，便作萬世不刊之典，毫釐之間，所當致辨。矧禮意粲然，非有嫌疑，又何難辨之有？某承心制已一年矣，今非畏有齊衰，不願承服，但可惜禮官如此討論，萬一誤朝廷備據行下，恐國朝會要上，又錯添一典故，不免貽將來朝廷無人之誚耳。今看來禮官未必解事，先生揆之本心，若以爲某見行之禮既安，徑乞從都省點對行，萬一已照寺狀施行，亦乞改命，庶不悖於人心天理之正，而古聖人制禮之意，得行於今。其於綱常，豈曰小補之哉。

後朝命下，許令承心制，仍著爲令，道體堂書。

通江參政古心

某卽時甘雨，共惟宮使大參相公先生。芝山清逸，珍館宴超，天相有道，鈞候動止多福。某昨歲獲走一介，詣舍人門下，伏蒙鈞念，勞苦有加，祇服訓辭。至今聲聲俯仰山林，感慨年歲。又若是其闊疏矣。某官百年幾見一代共宗，司馬居洛，而相天子活百姓，都人西其首而望，張紫巖杜門白首，而嗣皇嗟嘆用晚，倚之以向中原，先生今其人也。上方舉元祐故事，勤於夢卜，旦夕爰立，言人人同，先生不以此覲於當世，而當世以此祈於先生。惟先生重愛眠食，以幸世道。某屏伏田野，蒙賴鈞天之庇，守先人墳墓，幸無闕狀。追惟兩年間，口語橫出，先生進而廟堂，退而江湖，德於其人，如出一日。傳所謂生死肉骨之情也。報答已知，言

語抑末。傾竭犬馬。尙庶幾於門牆。專人上狀。百拜起居。哀烏皇皇。未遑納拜。心之云云。如此江水。仰乞鈞照。

通潭州安撫大使江丞相

某在門牆諸孫輩行中。而所以蒙鈞天造就。知愛綢繆。獨出乎諸生之右。然號爲登門。垂二十年。而至今庭下無愈之迹。古人負笈從師。不問道路之遠。某乃不能自拔如此。殆不可對人言也。茲者誠不自意。先生手提玉鉞。作鎮於重湖以南。而某適以臬事一節。奔走於賜履之內。昔者詹企台階。坐霄壤隔。今乃得以詣大府。受約束。有一日斂板之便。豈天殆爲小子計乎。某始以親老丐祠。旣趣旨下。再請則瀆。於是姑以單車出門。蓋馳驅數旬。又須乞便郡歸養耳。某四月八日。辭膝下。留廬陵城中。始聞先生拜乾會節於清江。亟亟追逐牙纛。度宜春醴陵間。所蹉跌片雲間耳。茲專布狀。重謝不敏。且致恭先之悃。參謁邇只。遡風距踊。

與李復卿

長弟初赴臨安府司戶日

某比者吉蠲子墨。祇詢涓房。留連踰浹。甫拜答灑。蒙不彼外。感荷感荷。茲專布區區之心。璧弟不穎。竊第奉常。受官京兆。初欲鞭策。向上工夫。故多求山林歲月。以自爲地。事不可料。欲緩得速。東行且有日矣。此弟雅欲致一朋友。相此遠役。大冠峨如。大裙襜如。服斯服者。不少也。而流俗薰蒸。靈龜磨蝕。區區所爲。例

指以爲迂。而他求所謂不迂者。抱膝長嘯。寡和奈何。執事氣貌餘子。言根古人。疇昔之日。幸接光塵。論議之末。共爲慨然。其誠有得於同然者。憑恃襟雅。僭欲屈致崇峻。以副前所期。此弟天資。每與義理合。喪本心以求外物。則自保其決無也。惟是閱深博邃之學。汪洋演迤之文。日力方來。正將從事。執事與之處。公餘得商略上下。交闡互發。他日此弟。其殆非吳下蒙乎。某敢不知。自交際之道。莫重乎其初。輒拜此紙。以將盟言。聘資不腆。別牋并致。不敏萬萬。控謝不遑。

與孫子載

季弟與從弟從學。

某聞古者。家有塾。黨有庠。士生其時。而爲師者。非其家之父兄。則其鄉之所與也。是以不獨屑屑於言語文字之末。而聖賢誠正脩齊之學。蓋皆在所法焉。小弟肩項相齊。學無以大相過。獨其性質之陋。而未有以開通氣習之浮。而未有以檢束。故脩業一事也。進德又一事也。某於古者父兄之教。既不克從事。則鄉評之峻卓。師範之尊嚴。是於執事乎歸焉。區區所以屈致之私。間嘗致稟千金之諾。敬聞命矣。交游之道。莫重乎其初。禮有聘。謹肅將以前。并令二學生。俯伏再拜。以立庭下。俾之有敬也。

與胡觀洲季從

某童而習之。授業解惑。有所自來。惟今父族母族。衿佩而立受道者。七人焉。將同堂合席。以私淑之。輒恃鉗鎚之舊。爲此數字。以北面請歲。以緡錢百上之隸人。禮有聘奉。芝楮二十千。明有初也。吾未嘗無誨焉。

惠徵福于夫子。謹謹奉狀。伏乞台照。

與楊學錄懋卿字景堯太學前廊

某比僕僕來京師。幸甚。得下騰龍之拜。辱賜之不鄙。軫顧稠厚。關外之別。江皋之餽。所以致繾綣者尤甚。感激不自勝。第恨匆匆聚會。不及爲頃刻之情。以慰滿連年契闊之雅。回首天上。瞻企拳拳。茲有稟事。朋友蕭文。名來新。新參之客也。此丈可人。且身事端正。無復頂冒異同之弊。揭揭而來。欲赴春參。鄉同舍。往往望白雲而歸。其歸然爲游學。瞻仰惟執事耳。其所參務本。適在德星躔次之側。特來展先達之敬。不揆適瀆。道其至前。得蒙與進。稍與之溫存。使不致落莫。區區之望也。

回祕書巽齋歐陽先生

某因朱月窗來。伏拜誨帖。辱問壁弟。意極拳拳。近僥倖受縣。一出師門。玉成之造。後生從政。未知嚮風。惟先生終教之耳。金盃在質庫。某處約之。甚恨未能自取之。乃勞先生厚費如此。山林中亦無用此物。先生儻乏支遣。不妨更質錢用。第常使可贖足矣。吉甫一去連旬。頗孤龍頭之約。時且向熱矣。奈何。因便介到城。伸紙行筆。嚮風馳情。

金盃。乃先生爲景獻太子府教授。講經徹章。上賜也。巽齋借而質之。故先生云然。道體堂書。

與前人

某尋常於術者少所許可。而江湖之人登門者日不絕。彼誠求飽暖於吾徒之一言。吾徒誠閱其衣食之。皇皇則來者必譽。是故不暇問其術之真何似也。先生之於應酬也亦然。今是書之作爲一星士。姓朱名元炳。字斗南。號月窗。則非前者之謂。是誠有取於其術矣。斗南。吉水文昌鄉人。去吾里三十起田間。談命高妙精絕。盡奄同袍。試以百十命。應對如流。而人品之大槩。皆不差。異哉。術也。問其所得何書。則嘗汗漫於十數家。而其末也。會歸於李吉甫林開之說。吉甫之書。人多有之。以其深而不能詰。若林開。則人未嘗得其本者也。斗南會二爲一。而又以所得於數十家者。間出而證之。斯其所以獨步也。某既與之訂正二書。又詩之以見意。其別也。欲詣門下求品題。某告之曰。先生品題甚易。至之日。爲先生請十數命。某也如此。某也如彼。爲先生鋪陳之。卽先生疊疊。豈惟品題。先生心肯轉相汲引。卽子命通矣。斗南曰。諾。探其中欣欣然。殊無憚色。他人泛泛得先生增重多矣。未有如斗南肯以術而取先生之知者也。是書也。某何爲而不作事出專白。故不他及。

與前人

某前月二十八日。因朱月窗來遠迓。草草一帖致起居。不知是日。正先生到家日也。後聞稍避訪客。住某寺久之。然恐訪者。卽所在相尋。亦未必能盡避也。某九月十三日。方及門。值鄉榜未揭。此一月。中相過者有數。近數日。漸漸增多。來者必數百里。或百里。不容不少款。閑居寒薄。殊不能支。而妄有干請者。紛然多。

不相亮。甚以爲苦。先生昔者。於應酬亦苦之。今猶苦此否。嘗蒙見示。每許人作一文。如置一針胸次。今某畏爲文詞。亦類此矣。習嬾亦是病。先生以爲如何。念久闊尊候。亟起援筆。請所以誨。朋友以某遠歸。間有以羊麪問勞之者。某不敢私。輒以一控一石。獻之庭下。某昨在宣州。不敢携木爪。宣州人相忘。近卻有以此爲意者。知先生嘗須此爲藥物。謹并奉四枚。一笑留頓。幸甚。

回劉架閣會孟

某伏蒙專劄。重示先夫人誌銘。伏讀。驚愴靡已。古心先生。藻發清言。垂光罔極。慈靈有知。含笑地下。若此。可以無媿人子矣。遠日倏至。柳絮載途。追送傾城。素車銜尾。某於夫人。契家子弟。以故不能攀望。引緋。負負幽明。不勝愧恨。謹成些章。少紀哀慄。以授挽者。伏想隨車號痛。涕如綆糜。孝在顯揚。願寬毀瘠。臨紙下情。淒切之至。

回衢教會鳳先生

字翰陽
號秀峯

某數月於師門極間闊。顧山水荒唐。不自知年歲之運運。闕禮多矣。尙庶幾先生。索之於形骸之外。別後。得二子丙寅。戊戌。庚戌。丙子。丁卯。壬寅。甲午。丙寅。命。不知孰勝。乍嚮風水。卽得三地。此須巨眼。以爲然則。然。向牛肉坑所結砌者。今知其大謬。爲棄屣矣。深之昨所問館成否。何所固必。新正詣清湖行禮。亦不見訪。往往泥哭。則不歌之意。非有他也。屋見說漸就緒。先生鼓舞倦矣。宜作意身事。悠悠何爲。行日可得聞。

否。春和景明。其間一造盤谷。亦可遍觀先生所謂寶者。更願撥剔而後來一來。須十日。乃可歸爾。悉俟而賦。此不能盡。

回李宮教應革 號肯堂

某頃以附伯昂令姪。書後未悉起居。深之令弟來。聞病目少寬。爲之喜幸。日欲專价。詳問飲食坐臥之節。塵盆因循。心甚愧之。昔人云。身在則有餘。舉天下紛紛藉藉。不如意事。屏置度外。專精神事醫藥。靡有不濟。恐吾目所受病。方將驅除。而又重以吾心之不寧。是滋予疾也。用敢於岐黃忠愛之外。輒奉清心一方。爲獻。願於大學第七章。加三思焉。偶壁弟有介歸。就有京書達左右。輒并遺前薄物。將忱。徒覺塵瀆。臨風馳泝。

與朱太博埴 號古平

某山中相望。數舍而遠。乃心精微。無往不通。僕十年受用順境過當。天道反覆。咻者旁午。七八月以來。此血肉軀。如立於砧几之上。齧粉毒手。直立而俟之耳。僕何所得罪於人。乃知剛介正潔。固取危之道。而僕不能變者。天也。僕誠不自意。乃於寒舍千步外。得一陂陀。溪山泉石。四妙畢具。委曲周遭。可十餘里。蓋其景趣兼盤谷環滁而有之。而其曠遠縹緲。或謂南樓劣焉。騎馬囊飯。朝往夕還。率以爲常。而山外事。一毫不接耳目矣。僕嘗羨君家山水之勝。幾欲作意植杖其間。而未能也。然自以爲旦夕必償所願。不知吾豈

天可以屈公一來乎。烟霞泉石，此不足與俗子說。處知音者自不同。正恐不問主人，徑造竹所。余月心來，拱被寶墨，惡乎而不用吾情。適凝祥觀蕭道士來訪，其別也。曰：吾將造古乎？爲之書以復命。且道予懷，而假道士爲郵焉。

某比及門，卽拜狀。開車騎在郊外，正欲嗣訊。韓星忽來，偉然朵雲之贈。故人渠渠，勞苦行役，諸兒那識此意。曉起入山，新流沒岸，棋聲未盡，石骨依然。人生往往如此，盈虛消息，道體流行。仁者謂仁，知者謂知，可超然一笑。承有訪，綱之約。上已前後，擬山行數日，須主人在竹所，方可乘輿分沙一席。已戒白鷗退避矣。呼燈走筆，馳意泐寥。某比及門，又一首。極有磊隗，欲從執事傾倒。一日雲山浩渺，渺焉余懷。忽拜義獻帖，宛然玉立之參前倚衡也。垂諭前城李氏事，讀之甚駭。近有假爲黃節幹者，騙寫其家田莊鄉廩，旣見之發覺，昭其迹於牆壁間矣。曾鑑何人，又肆無狀，欺愚嚇聾。一至此耶？某平生所立，謂何豈有退居林麓，省咎敬威。我自爲我，而青蠅紛紛，每使惡聲至耳。莫爲而爲，莫致而致，非命也耶？勢不得不榜，謹納一紙，幸轉之李氏，以破姦猾者之爲，使人日爲此等救過之事，不勝浩歎。某向者因及執事出處，常誦伐木之詩。今書所云，猶若未悟。稟答之次，臨紙惘惘。

回鄧縣尉中甫

某入山愈深，於所尊敬，嘻其闊矣。前年足下以書議禮，得一往復。最後賜誨，迄今不能報論其形跡。何前之恭而後之倨歟。彼云：人情重往復，不報生禍根。后山云：一詩已經年，知子不我怨。人之度量，固有相遠。

執事知我。宜可無前日之事。今通國識其用心。由其未定。而言辭之不可以已也如是。自其定者而觀之。輕重銖兩。固皆當然。言語文字。幾乎閤矣。昨書皆精義所發。卷爲一通。謹而藏諸。後有作者。將爲此興起。客從巽齋來。能言執事日從翁樂甚。因款客坐。亟亟援筆寫此。悵結授客。以轉之左右。學之不加。感慨年歲。山澤雖遠。尙惠一言。臨風拳拳。

與顏縣尉復古

某自春末。得一夕承顏色。接話言。外此皆瞻仰之日。追憶是數年來。書筒無虛月。分袂亦不太久。未有如今之疏者也。然私竊自解。則曰。此其迹爲然。不足深計。知足下得我同然與否。茲者。恭承少迂蓬山之步。暫爲梅屋之游。脂車有嚴。滌篆伊邇。豈勝贊慶。執事自此開張清途。摩拂碧落。固其分也。顧微富貴利達。以自致其身。貴且重者。崇論宏議所鄙者也。不當薦是爲賀。惟邑於民社爲最親。惟少府於邑爲最要。平生學問。藉是得以展布。潘輿康寧。千里迎奉。調熊嗜苦。式慰茲願。是二事。深足爲年丈賀也。某雅聞說者。以某日戒途。懷是惓惓。將祖帳道周。杯酒爲壽。屬有牽制。不能來。謹上狀。并致泊禮。以昭區區。惟容頓是幸。川平陸夷。行者有相。惟秋深殘暑未央。更乞頤輔崇重。以前三接九遷之寵。隨軒德輯。伏想喜氣。方來錫羨山。則別後或有鄉邦驅策。敢不下拜。

某歲杪得承便駛。遺以瓌灑。故人千里之情。藹然可掬。感鏤其如之何。茲得嗣書於令弟來歸之便。尤見

崇篤喜審議論於帷幄之親。出入於錢穀之會。蒲腔磊隗。庶其有以自試矣。來教自咎。以爲浸淪汨於俗吏之歸。此意固超人一等。孟子論仁賢。而必望其有政事財用之效。蓋積用聲猷。不可相戾。本末一致焉。得就此以遺彼。自賢者徒以清浮爲高。而無益於實。然後小人得以事功自詭。今日挽回君心。轉移世道。吾輩正不得不自力。尙可以俗爲尤乎。伏惟尊同年。其懋勉之。頃承刊委比於敬巖之前。亦屢說項。非某私於所親。名德如許。區區欲自默。本心齷齪。自有所不肯。此老亦既有所許矣。坐席未溫。遽爲林麓之歸。一場說話。又付畫餅。雖然。長松在林。利錐處囊。翹翹傑傑。旦夕諸公爭羅致不暇。瑣瑣愛助。何足爲說。某奉祠侍親。頗於讀書有一日之樂。朝市紛紜。怨謗之府。某雅欲退藏。以遠罪咎。賜教極得同然之真。或政事有足爲庸陋矜式。毋惜刊曉一二。因以具報。情悃非筆可旣。專規嗣布。

與聶吉甫

某於斯文契闊。數年於此。載酒問奇。豈非夙心。而相望百里。離羣索居。甚負此愧。以其傾嚮。輒私布之先人。季子生二十年矣。號曰學文。實未知方。有從第一人。同堂而習。年相若而學相似也。閣下沛然古作。藉甚時名。所欲北面而從事者衆。區區欲使二子者私造化焉。問者疑其不可。諗之朋友。固以爲請。不圖閣下不鄙夷而許之。敢專書以聞。閣下屑與之盟。豈惟二子得以受教。僕也不敏。實嘉君子之賜。援筆荒蕪。

臨風切切。

回王國智

某歲前作稟字。輒致松栽之請。專夫十餘。虬孫載道。一日塞破吾屋。卽乘天時。遍布滿山矣。異時車馬相過。山神欣然迎拜。必曰。此吾東道主云。擾甚。布答膚率。別作謝狀。

與劉司戶三異號古桂

某自別。不獲奉起居。忽聞小爽調攝。昨見當風輒睡。不禁生冷。嘗憂其必爾。看來衛生之書。誠不可忽也。心遠云。來時及拜問。已幸勿藥。極以爲善。暑天將理。正未易。某欲助數藥。而不知當用何品。謾遣芝楮百千爲意。且宜深自愛護。候其可出。見訪未爲晚也。南史正本。遂可得否。便中謾得介意爲荷。詞候草草。他規嗣布。

與胡端逸

自別後。日在山間。搜奇剔怪。得二所。曰閔微。曰上下四方之宇。幽閑曠逸。超偉軒張。其奇又在中磯兩峯之間之上。君再來。足以抵掌大笑。翠晚又改曰浮嵐暖翠。釣雪改曰六月雪。特立改曰至大至剛。以直我非好怪。地適足以當之。君謂如何。新昌弟一介至門。館穀之議。諧矣。專人導其來庭下。請君蒞盟。江南春小。天和景明。山靈川后。畢獻萬狀。欣然有應接佳客之意。不遠二百里。杖屨容與乎其間。不亦可乎。凌遽信筆。未究欲言。

與黃主簿景登 名瀛

某輒有所請。鄉州有俊傑士曰胡君。名天牖。端逸其字也。十年前。學校定交。意其旦夕獵獵乘青雲而上。尙遲決科。蓋其命然。心甚敬且念之。來山中。聚首半月。且留度重陽。問其館穀。則未有所嚮也。此君有能賦聲。於應用更高。好自脩飭。不爲流俗。足下若與處。日從三益。豈曰小補之哉。其家事自好。而嚴君主之。端逸歲得百千上下。則從人泰然矣。萬一賓廡無虛席。則明年君創員以料理之。費以取友。美德也。端逸留山中。若蒙雅報見及。相其受幣而歸。是所至願。

與劉正伯 知端州日

某江滸分攜。流光如駛。每荒城雲合。笛韻沉沉。吾故人之思。未嘗不往來于懷也。秃筆鉗書。曾無暇晷。東風順翼。乃有飛牋。如之何不喜。執事垂光。虹蜺濯髮。雲漢少須暇之。駕秋濤而湘春錦矣。燒尾光芒。薦靈角尺。山中猿鶴。先侈光榮。某癡事未了。誤渥徵行。三辭弗俞。旨且俟代。持其觚落不敏者。如之何而任劇哉。託愛宿昔。不同他人。何以教之。因風馳泝。

某久不交訊。坐積尊仰。忽蒙專价。惠報寇事。桑梓驚動。南望惻然。正具復間。得鄉里信來。乃聞十六日破玉山。次日破新安。吾鄉必不免矣。財物所未論。屋廬所未論。不知一鄉人命。是時得脫與否。未有嗣音。爲之哽咽。已作書控倉使。乞兵剿滅。某卽日交臬事。當以滅寇爲第一事。毋慮尊公朝議。近況想安適。謹附

拜一忱。郎君新功日富。次者且聯翩而上矣。可慶可慶。草草修染。愧甚。膚帥。

回鍾叔玉三帖

某杜門避影久矣。出山一事。不到夢寐間。聞命誤節。湘羅笑人。方循墻丐祠。以安半菽。倘拜俞音。春書花陰。猿鶴飽臥。亦五雲之密蔭也。袞袞渠渠。餼禮郁郁。固不敢當。亦不得不拜。草此稟酬。尙規喬謝。某昨承令嗣子京相過。眉目森秀。真可喜也。承以至德觀牌爲諭。便筆偶已染就。今謹封納。切希視至。伏拜寶翰。寵有臺餽。塗抹無羊之詩。珍重來牟之意。我之懷矣。我之懷矣。親戚往來。本無所不可受。獨其名曰。前日嘗爲某事也。若然。敢不重拜以辭。吾黨相與。誼如一家。緩急相赴。情之所有。而足言謝哉。非曰不恭。其所操挾如此。薄言稟報。未旣由衷。仰幾台亮。

與隆興黎節判立武

探花

某自大名震盪以來。吾江西一佛出世。引領願拜。實不知前此固嘗坐下風而揖餘光也。去年汗漫一出。道過清豐。邂逅捧檄。歸省江臬。草草相見。道舊恍然。驚喜過望。至洪甚恨匆匆。郵亭晤語外。無從嗣集。蹤跡展轉。重見黃花。所思天一方。令人回首。某特氣類之同。輒以士薦。漕闈新貢。元劉君子俊。吾鄉清淑之英也。所居門巷相接。文學卓然。可稱遠器。今年以登仕。得舉士者以爲晚。旦夕詣星臺下。謂一世龍門。以未執鞭爲恥。敢告賓榮。許其漫刺。見所未見。劉君歸可以語人矣。西雨南雲。臨筆馳泝。

與劉民章子俊

某自湘花別後。其人如玉。夜夢見之。名網猶兔。且然不足。以得橫天之翼。每爲咄咄三嘆。空同上得書。乃知猶爲脩門客。何留滯周南之甚耶。詩云。京洛多風塵。素衣化爲緇。又云。棲鳥戀舊林。池魚思故淵。青山屋上流水屋。下歸來自有樂地。乃欲以外物之盈虛。爲面顏之有無。爲執事者左計也。乘輿而返。萬里足下。可以遠道爲諉乎。某昨報舍弟。令贊千騎之歸。爲奉薄贖。想已稟達。歸哉歸哉。臨紙引領。

與梅制幹

自去年滄浪使者歸。米氏真帖又三四。往往多從景明便雁來也。洞門窈深。雲山千里。騎黃鶴。跨白鶴。恨不得一日共君其間。風雅比興。韶鈞交作。長軸大冊。一再寄意而不倦。鬼神闕吾山數千百年。今而後衣被雲錦。草木澤澤。光價益倍。章之三十二詩。四時朝暮之變。皆有其象。獨以一詩當一境。則有不相似者。混萬顆珠璣。作一片圖畫。而江山無異辭矣。謹頓首謝。頓首謝。子秀別三年。漸成六考。通籍金闈。止爭浮圖一穎。近書謂赴吏部銓。將取一闕。人豪如此。猶落骰子選。豈非朋友之責哉。歲月易老。功業宜壯。早改官去。卽伏壓建節無滯礙。男兒事庶幾哉。某當年間。亦大參差。江西代者。激爲波濤。使人彈指剝剝。賴君之庇。天日皦然。今可以適吾山水之陶陶矣。比詩云。日日騎馬來山中。歸時明月長在地。但願山人一百年。一年三百餘番醉。君念我。悉度欲知我近況。不敢不白。某惓惓故人之意。豈一飯而忘。願數百日内。不

能專一价。附書殷郵。又不敢信。以是契闊詹仰。充塞懷抱。而未有以發也。李彪請假歸。道出琵琶亭下。率然伸紙。意之所至。不擇言語。臨書神爽飛動。

與杜教授抑之

字伯揚。號帶溪。崇仁人。李梅亭高弟。

辱早春第一帖。遠佩意甚真。每一念吾弟。輒思老成。吾弟一出。幸無他。微執事教訓。何以臻此。不知菖蒲前後。書琴得至山中否。近來心思稍清。頗得專意研討。亦時不廢吟。向嘗令吾弟訪問南史正本。與晚唐百家詩。想亦可得。如未也。執事試致意焉。古桂留館中。日得誦習毛詩。因知求選於選。止可爲選之子孫。求選於三百五篇。則選之兄弟可進也。相見當爲執事傾倒之。偶遣一价。信筆布露。馳泝雲表。

回謝教授愛山四帖

雖塊坐深山。於時高人韻士。鼎鑪獨無耳乎。載酒問奇。道之云遠。徒有是心。而未之能也。不圖五鹽道院。屈居仙客。階蘭砌玉。與亭芝相照映。每思吾仲。取友必端。未嘗不自歎獨學之陋。手書寵貽。清揚流動。雖未見。猶旣見矣。何時簪盍。慰此忡悒。臨風馳報。書不盡言。

寒簷積雨。抖擻無惊。得書而讀之。昏眼爲拭。某落落白雲間。一疇春綠。自飯吾犢。浮世榮辱事。付之山外。褒惜所蒙。君言過矣。然醴露醲郁。波及溝斷。企瑞芝而遐眺。佩金蘭之永好也。美人一方。書琴自適。爲誦停雲三過。

日於仲氏便价得書。振衣快讀。恍焉眉宇之迫吾睫。可人不來。蒼苔滿徑。得無忘把酒看山時約耶。西風逼人。桂香浮動。天池鯤化。搏扶搖而上之。捨愛山其誰屬。魁卷紙一幅。納之文房。衣被琳琅。騰翥光景。褚生輩亦將侈其逢矣。薄言占復。掛一漏萬。山中度日如年。落葉蕭蕭。涼月墮砌。起視寥泬。安得知己。握手長吟。寫胸中之耿耿。以相慰藉耶。杪秋餘熱猶壯。二賢者雖相戲。而不吾虐。子亦從其所爲。倉扁輩未嘗屑屑然也。久之。不覺脫然去體。是又不治之治。有勝於劑餌者。寵貽手札。問勞渠渠。故道其所以然。而以復于執事。

與廬陵劉知縣庭薦

采山釣水。飲食於大夫之境。三年于茲。門無公事。得至於百里之室。幾於魚游江湖而忘江湖矣。伏諗解印西歸。揚舟東下。昔者河陽之李。今茲南國之棠。諸父兄弟。服習長者教訓。恨不留鎮此土。雖然。此一縣之望也。縣私士子。人無所不治。是中都索包。總有相道焉。行矣。僕將大其所觀。某山深閉門。杏無城郭。信風傳令。尹新舊之交。未及馳慶。乃承上書。顯走告別。江頭折柳。奈何不敏爲之。漸對將命。四壁空寒。一無可爲。載月助者。知心天遠。解后何年。詹沂風帆。江空渺渺。

與廬陵李知縣說孫

某邑人也。聞令尹之來。不能隨父兄子弟。迓千騎於郊外。敢自訟以書。惟高明察之。某茲審承命九天。漉

封百里。初條甫下。闔境爭驩。諒爲慶愜。某官氣宇鴻明。風猷駿厲。脩程步武。空萬馬以無前。清水鋒芒。解千牛而不頓。吾廬號壯哉縣。詞訟雖繁。而詩書之家衆。版籍雖廣。而期會之事省。約之以清淨。捷之以平易。以公之才。恢乎有餘地矣。會成美錦。適趣溫綸。某骭髀一世之沈浮人也。所占籍處。在治所之南。三舍而遠。雞豚可千戶。民淳俗厚。僕也相忘於漁樵。而今而後。其得一廛之託矣。僕實何者。首辱賤函。以此事當路之尊貴。則有矣。區區何足以當之。輒裁賤賀上。并鍾鼎大名。歸璧涓吏。伏楮卷卷。

與廬陵陳知縣堯舉

昨歲京華。天作解后。每念晏公在陳。歐公在穎。一宋二蘇。千里往訪。竟日從容。以某不才。受知場屋。且二十年。良覲乃僅如此。視子瞻子京諸公。不知何地著愧。匆匆汰去。過荷遠將。一日江空。暮雲如水。渭濱之首。寧爲他人回哉。茲者。伏審肅持鳳檢。出宰螺山。車馬實來。旄倪胥舞。伏惟驩慶先生。聞多而學廣。事熟而心精。筆力千鈞。捕龍蛇而獲虎豹。雲衢萬仞。騎麒麟而翳鳳凰。未秣馬於天津。乃著鞭於雷邑。竹松林裏。不妨簡編之尋。桃李蹊邊。細數枝柯之長。小紆盤錯。便起扶搖。某閉門山中。傳來邸報。忽覩先生。爲吾邦一來。古人重師友。至有塗竄片言隻字。以冀萬分益者。鳴絃千室中。有老門生在焉。知公不能用其恕然矣。惟素性疎嬾。無城市蹤跡。謹避聲利。不沾借於公私。自今以往。陰陽和風雨時。曉猿夜鶴。左花右竹。吾君吾相之恩。亦吾座主之惠也。剡聞前茅在郊。謹具劄子候迎。臨風馳往。

回樂安唐知縣元齡

深山中俯仰漁釣。久闊時牋。使者忽來。計一往一返。殆幾千里。君之厚我。感無有極。他人作縣。驚惴若不可以一日。先生爲之。優游政聲。洋洋乎盈耳。難易殊絕。蓋必有爲之本者。旦夕細滿。綸綍在道。璧弟以斯文受知。僥倖通政。書來謂注邑當在春季。繼此望洋方新。尙賴教誨。庶幾自淑。刊曉寺記。微獎予不及此。惟平生於浮屠無所見。非敢有所攘闕。於其家數。全不曾從事耳。恃愛直布。尙寬方命之誅。嘉貺頓拜。薄物非所以爲報。臨風悚仄。

回劉運使應龍 號實齋

比承一介使人。陟我山麓。問外自梅外來。執事惠綏一日之好。其與人也重以周。則旣感激所蒙。致其多謝之私矣。未數日。從驛吏取近報。伏審升班西閣。移節南昌。提封不隔於故家。父老相誇於盛事。仰惟慶愜。某官楊休山立。玉潤金相。方其爲御史也。風采所撼。聞者凜栗。及其將指於楚越也。滿腔惻隱。人所不滿之處。入羶入細之規模。可以概見。歸來麟閣。還本等地位。已竊遲之。江西涸鮪。延首福星。誰爲朕行。弄印未決。公未至闕下。就道相屬。亦曰。此公鄉里。煩公歲月。又將出少府節。召公歸矣。其嚮者得節。亦曰。鄉部。後來召駕。數月而不休。嘗試思之。近年如宏翁矩翁。未嘗不漕本路。而二老之所以鎮壓羣動者。年德位望。自是過人。而持斧之役。旁午豪譁。又非計使比也。今執事繼二老芳躅。仁聲賢聞之著於人久矣。萬

無不及。惟有過之。此所以宜賀。而僕之所以亟拜此書也。前茅出嶺。聞已多日。勢必馳上巽書。歸釣山以俟命。上方屬意賢英。亟疾其驅。惠我江國。臨書不勝瞻依之至。宏翁包宏齊名恢矩翁曾矩堂名穎茂。

耕釣山澤。飯疏飲水。不自知歲年之運運也。使者維何云。自南浦。飛雲五朶。居然下之寒谷陰崖。水霜積沍。春風不擇地而至。有如此者。某官天和粹穆。地望高深。夜占天文。福星直斗牛之分。薄蓬萊。厭承明。爲桑梓此來。釣山之下。雲露噴薄。油霖甘露。流注乎大江之西部。人歡呼。吾父吾母。帝曰勞止。歸遂相子。僕何幸身親見之。某山人也。其於當路。厥有等威。不敢屑屑竿牘。致歲時之敬。謙尊而光。禮出倒置。德盛仁熟。悚然稽首。落霞孤鶩。水天茫茫。旣不克偃僂。請拜檠戟之下。心之精微。寄此函尺。永言歸嚮。江流知之。

與袁守雷侍郎宜中號省身。

某前年赴宣州。道滕王閣下。望山川英氣。稽首人物。欲擁篲造門。而舟車異趣。僅能拜書。問花竹平安而已。亡何蹤跡展轉。不遑嗣音。歸臥蒼苔。益以疎闊。其戀戀門牆之心。固如水之必東也。某比者。伏閤邸報。竊審小紆紫綬。近擁銀符。吏竦旌旗。人傳襦袴。共惟驩慶。欽以某官。抱經濟之祕。稱磊落之豪。青天白日。鳳凰百年。美瑞高山。深林龍虎。一代傑魁。上方寤寐側席。圖致太平。甘泉舊臣。不當越在遠服。名藩歇馬。姑曰起家。徑執事樞。旦夕有詔。某庚午一出。殊與戊辰相似。去住匆匆。取笑當世。杜門深念。益求寡過。未知所以稱塞於知己之道。君子不棄。尙惠教之。某久聞紫馬赴鎮。空山不能專介申賀。適逢過客。輒寫其

私以自附於大廈燕雀之後。相望一方。馳泝切切。

與中書祭酒知贛州翁丹山

名合

晨起冠帶。輸寫積誠。世俗竿牘。曾是足爲有道者言。惟高明索之形骸之外。某責原白鷺書生耳。童子何知。乍習句讀。凡先生之精神意氣。粲然於言語文字。公之天下。以淑後學。某皆嘗得以朝斯夕斯焉。衣被遺餘。曾不自意。早以名知於人。有我師焉。生同吾世。驅馳四方。乃不得解后。某日夜興起。謂當何時。而後得免於常人也。流年堂堂。實勞我心。共惟某官。孕光岳之精。參天地之運。大忠大雅。萊公文正之心。不倚不偏。伊洛考亭之學。斯文落落。上帝惠顧。天門夜下。龍虎章授。公以柄。轆轤璇璣。經緯星辰。公從兩制。稍發蓄積。然後坐之廟堂。爲天子興建禮樂。洗千載房杜之陋。太平之期。適當今日。某退歸以來。有泉石十里。足以爲適。浮空變態。日過其前。飯疏飲水。自求吾志。竊伏思念。空同鬱孤。如在屋角。平生惜結。云如之何。輒因此時。以姓名通之門下。一言終身。尙庶幾焉。園丘慶成。上方親事。少府出節。必以公歸。迎拜東帆。螺江之游。以其時可矣。山斗高明。臨風切切。

某伏自空同玉節。順江而東。獲從中流。迎候鷓首。雄文鉅冊間。想象變化。如高山深林。龍虎不測。不圖解后。遂拜堂堂。風流雲散。一別如雨。金聲玉色。夢寐以之。自先生振衣登朝。手提文印。以照四海。國家誥令。典冊燁然。先秦西漢之上。學校之士。莫不從風興起。彬彬郁郁。爭自磨濯。以正法眼。作大宗師。世無歐陽。

不當在弟子之列。某知稽首矣。主上尊德樂道。師用賢哲。論思獻納。日聞正言。孔孟不得用於周。光禹竟無益於漢。才與誠合。學與位偶。儒者之遇。未有榮於此時者也。大學之功用。至治之福澤。何幸身親見之。某疏脫之蹤。分安山澤。起家誤渥。忽畀龍藩。聞命彷徨。莫知所自。如聞天上聲光。假借非一意。若可與從事斯文者。自古聖賢之佐。英豪之輔。莫不垂意人物。薦進拔擢。變天功。經人極。罔不在此。共惟盛心卓犖。度越流俗。而某則非其人也。夜瞻紫微。徒有頓首。脩門懸隔。久曠音題。屬請事祠官。冒馳一介。輒鳴忭懽。未卽趨樞。願言玉持金護。爲世道自力。臨風切切。

賀翁丹山兼憲

某熟視一世。靡然風塵。刀筆。何從縱橫。旁午。架漏於士民之上。而世之言人材者。率如是而已。安得結輩落落參錯。布滿天下。使萬物吐氣。僕嘗擊節於斯言。悠悠空山。誰與語此。茲者喜審肅將繡節。通洩銀符。山川不改於空同。風采一新於江右。共惟某官。淵源接乎諸老。氣概聞於當時。人物眇然。真中流之巨屏。文章偉甚。稱南渡之當家。輩行諸公。鈞樞十九。夜半一劄。趣歸蓬萊。以其時則晚矣。上方式敬由獄。乃眷西顧。非有志念。不足以洗冤澤物。非有力量。不足以懲暴詰姦。故予環之寧遲。而乘傳之若屑。太平之責。正在方來。以公歸兮。政枋焉往。某碌碌不如人。獨有愚戇。不能改其素。追記前年。冒乘君子之器。他不足道。惟姦宄豪橫。稍稍鋤擊。淺之爲日月。雖未得盡行吾志。庶幾無失職之恨。人情卑淺。憚繩檢而樂姑息。

矧猶未免鄉人譁訛。朋與以要。其得罪於小人也。果矣。伏惟先生。昨者不賜鄙夷。心聲往來。藹然氣類之意。某誠不知何日。得以執鞭下風。勿觀除綸。心目開朗。我輩從事。俗吏奪氣。豈惟爲一道賀。實足自壯。謹專人上狀。頓稽庭下。少伸門墻燕雀之悃。蘋藻薄羞。別紙惴悚。

賀江東憲方逢辰

號蛟峯

某當公在螭坳時。嘗奉一紙書。至于閣下。書上未幾。而公歸蛟峯矣。譬諸草木。臭味實同。詹望雲山。臨風切切。某茲者。恭審升撰祕丘。宣威直指。西臺與政。蓋嘗識穎濱之文。東路洗冤。亦以行濂溪之志。六絲初駕。一佛歡傳。共惟某官。色正而芒寒。揚休而山立。言語妙天下。材稱一代之奇。出處重本朝。望在諸公之右。自夾侍玉皇香案。等而上之。胡不均弘。俾執事樞。國家重更迭之制。江湖一節。煩公驅馳。式敬由獄。以長我王國。公所學在此。歸哉歸哉。中詔在道。某山林之下。靜觀世故。其於君子進退。安得不致其卷卷。以山父老。迎擁星輅。以時考之。可矣。輒馳一介。自附於門下燕雀。江水東西。心期天遠。臨紙欲飛。

賀前人除江西漕

某東書歸隱。有釣遊之所。曰盤中。兩山對峙。間以小溪。日步溪上。極目滔汨。輒自以爲晝夜不舍。此溪水會有達鍾陵時。而某愧守漁樵。則曾此水不若耳。昨孟君陞從番陽。遣介來。嘗爲書附申起居。相望千里。亦不知上徹果何如時也。某茲者。伏審班仍寶殿。節峻冰臺。貫索沉沉。方轉芝山之曉。使星冉冉。又回南

浦之春。一水東西。二天今昔。伏惟歡慶。欽以某官。寒芒五緯。絕岸孤峯。生漢子陵之鄉。雲山一日。派唐處士之譜。風雅百年。雖已跨海而望蓬萊。猶肯濡絲而陬原隰。濂溪道脉。雙井詩香。流馬木牛。旣無媿於千古。落霞孤鶩。應可對於二公。所謂旂常。特吾懷袖。某律兀抱虛。真無所用於世。曩六轡使江之左。每依餘光。以自映帶。今也一畝之宮。環堵之室。困德宇而處。自茲以往。夜月如水。猿鶴不驚。田夫芸子。各適所適。則何啻如天之福。郵傳所至。不勝燕雀私情。卽日謹奉書爲賀。臨風馳泝。

回許祕丞自號果齋

某火龍之歲。從集英門。綴行而出。風流雲散。回首參差。不自意去年待罪闕下。獲接英游。心事流行。日星垂而河漢流也。湖陰送客。風露滿衣。移語崇朝。英槩齊聲。歸去來山中。至今夜夢見之。新昌小弟。夙被獎知。嘗察之情。始終一日。俾來遞示五雲。光怪照室。此豈四海九州無情人耶。鄉風九頓首。尊年丈山立時。行日光玉潔。長樂鼓鍾。西清帷幄。終當著身。風日不到處。轆轤雲漢。經緯星辰。爲天下開文明太平之運。某被服光潤。實與有焉。某旣還里閭。入山讀書。杳不知山外事。天上故人。重相顧念。適逢便武。輒謝所蒙。餘祈爲斯文珍重。慰此引領。

賀倪提舉普號警齋

某寄跡提封。某水某丘。童子所釣遊。君侯實照臨之。報政將一年矣。某猶未能以民禮見。自盤谷西南而

望城郭在焉。相對五雲輒移時不能去。某茲審宸綽鼎來。庾臺肇建。讀皇甫記。已蘇今日之疲民。傳紫陽心。又舉向來之荒政。風行新令。雷動歡聲。欽以某官神驅五兵。才入八面。作真御史。以直道而事君。稱明監司。行本心而澤物。公來青原。父母其人。屬時常平。弄印六服。牧伯無以踰公者。西江涸轍。久煩公拯活。歲月少府出節。中詔又冉冉出建章矣。某自聽除綸。即欲自附於門下燕雀。側聞雅志。引卻甚真。上方倚賢者以共理。烏乎能從。臺治一新。境內爲動。某甫及拂紙行墨。以贊東注之盛。嘻其晏矣。世俗所以事尊責以鱗番從事。公有道人也。某不敢出此。臨風飛動。

與新知太平州趙月山

名日起。英殿脩撰。川人。

某去年待罪闕下。幸甚得一再交書。幅巾獨樂。近在吳門。入秋正擬專介。候猿鶴起居。會去國不果。黃強立自竹所來。相見於六和塔下。遠蒙寄聲。多謝故人厚意。自是而入山愈深。杜門掃軌。無復南來雁足矣。壁弟學製新昌。新年見告。三月遣人詣門。墻通問。輒寄所思。寫之竹筒。旣行。伏祝除日。欣審仍班內撰。領權東藩。一札起家。千乘載道。共惟驩慶。執事青天白日之質。望之知爲正人。千兵萬馬之胸。識者推爲豪傑。六合悠悠。風埃滿目。所謂江左管夷吾。公其人也。偃薄起伏。如神龍天馬。不可羈。牛渚天門。一瞬萬里。亦足以發其中之所存矣。天下事方有賴於公。時來爲之。孰之能禦。某夙昔荷相知。出人一等。以此不敢自菲薄。一別十年。浮雲進退。何足爲達者道。而學不加長。每每自憐。久不見叔度。鄙吝固宜。自今得聞一

言三日後刮目。未知於吳下蒙何如也。偶遇新昌便。意其介尙或未行。輒附賀狀。并寫戀嫫萬分之一。相望沈寥。臨紙馳泝。

某風雪殘年中。使者以餽歲至。嘗草草拜狀。竟未知果達籤房與否。過年百二十日。是問何限傾倒。毛穎輩不任事。姑寄一歎。比審放纜長江。休鞍盤谷。執事自宦遊以來。數歷中外。垂三十年。曾無一日得從五畝花竹之樂。金山鷗鷺。甫此尋盟。如負者之息其肩。行者之休于樹。一時瀟灑。比軒冕束縛。瞠乎遠矣。浮雲滿山。任其往來。太虛真體。皦然萬古。某歸來兩年。處積毀震撼之餘。差幸天者之小定。自有溪山。足以遊釣。漫不問其他。有詩云。日日騎馬來山中。歸時明月長在地。但願山人一百年。一年三百餘番醉。欲知近況。此其凡矣。念人間清福。莫如一閑。幸而吾二人。皆可以自適。獨相去遼絕。無從合并。江東暮雲。長長在眼。輒專人奉問。潭府居處之概。卽辰夏氣方深。共惟靜養。淳和坐消熱惱。神明護持。式衍方來。川至之福。臨紙耿耿。

與知吉州江提舉萬頃 號古崖

某兩年乎山中。春猿秋鶴。木食澗飲。蓋頽然世味之外者。五雲繽紛。麾節夾招。搖歷勾陳而下。青原白鷺。浩有生意。某甫與溪倪谷芑。額手蒙幸。乃大化驅之。出東書就道。脩民禮公堂下。俎豆春風。簫韶夜月。藉之以詩書禮樂之光。多矣。明公以洞庭五老之胸。時雨一路。曾未數月。春旗霜艘。風采軒豁。所謂動搖山

岳細事耳。少須暇之。棣萼棠陰。先後醴郁。夢寐五采。衣被八紘。持國弟兄盛事。再見大江以西之父老子弟。豈得以私我公哉。某自解維江潯。風濤回薄。抵昭亭下。是爲子月丙寅。大壞積枵。觸手病敗。雖日夜爬梳。會肯繁然。盲豎浸淫。非非劑可藥。肘後龍靈。公不我靳。則宜殆庶幾乎。惟故山松菊。沐浴瑞露。而隴蜀之望。復切切微疇。昔不至此。某日墮倥傯。神馳檠戟。甫奉陟釐。則已魯臬。籍獨不愧于心乎。歲將新矣。願言滿頰盤椒。對揚綈絲。此豈無委。嚴立下風。

某伏蒙公劄。下問勸分。仰見豈弟父母。救民水火之盛心。實共邦人。額手大賜。某所居里。凡千餘家。常年家中散米一日。不收錢。諸大家以次接續賑糶。可及三十日。隔一日糶。可當兩月。此方儘可無飢。他時不待勸率。自是舉行。明年係緊要年分。或須使榜一申嚴之。至期。卻當取粟。但四境委有可憂。蓋吾州從來。以早稻充民食。以晚稻充官租。今年晚稻半虧。顆粒並是入官之數。早稻不過二三分。則是民食十減七八。此其所以皇皇也。近見多有趨龍泉永新運糶者。覺彼二處。米亦有限。縣大夫各私其土。不肯透泄。亦其不得已者。此須使司示以意嚮。使之斟酌放行。庶彼此可以均濟。最急莫如通贛州之米。近同年李守惠書。自謂年穀中熟。米價日低。某嘗答書云。廬陵一歉。異於常年。田里憔悴。不堪舉目。惟章貢素無糶事。而得歲又偏。鄉人顛頓者。往往相率而趨治國。民食關係。苟可通融。兼愛秦晉。公之惠也。蓋贛浮橋泄米之令素嚴。田吉號產米。而贛多山少田。故爲贛計。不容旁及鄰邦。今歲事既相反。又當通變。此須古崖

一書與李守通情。俟得其要領。然後大榜境內。許人赴贛收糴。此亦權宜之一策也。區區管見。姑復仁明。後有利便。又須陸續申控。

某自聞琴鶴言歸。卽戒筭車。擬送別於吉水新淦間。初十日。始得初八日申時寶翰。則知去期甚速。始意不可得。遂卽抖擻作詩。馳詣使館。意必可相及。僕自城還。則知解維已三日。臨風悵惋如失。廬陵四竟皇皇。流離入贛。過吾鄉者無虛日。豈弟父母。又拂衣去之。細民嗷嗷。皆謂曷不留我公。撫我妻兒婦女。一無異辭。此卽公論在人心。不可磨滅處。吾輩仕宦得如此。卽無愧漢循吏傳。浮雲得喪。何足較也。某念受廩兩年。當使君之行。不得往送。詩又不達。歎負爲何如。亟亟元詩。并拜此紙。從新昌壁弟處。借一兵走詣潭府。不知紫燕在芝山。或在廬山邪。引筆馳泝之至。大丞相古心老師。某不敢容易上問鈞履。丐爲轉道。詹依卷卷。

賀知吉州黃提舉器之名請

某密依使天。冰雪深山。與猿鶴臥送流年。緡故牘於左泉右石間。非賜邪。每飯牛頃。必矯首畫戟下。茲密郡揚帝鑿。節畀天困。千里光華。一道鼓舞。伏惟驩忭。歛惟某官。眼空四海。胸著千年。振代直聲。鼓雷霆而潤風雨。鎮浮定力。載華岳而繫星辰。衣冠紫囊之神仙。氣類青原之忠節。旌麾一頓。草木交輝。地私二千石之陽和。天溥十一州之福澤。璀璨六絲之遺。礪礪五袴之歌。卽賜召環。遂高聽履。某受廩幸矣。公朝念

其久廢。誤節湘行。顛倒繡衣。不堪重著。陳情丐祠。以反菽水之奉。尙微均弘。俞音旦夕下。俾得醉泉飽蕨。水之北。山之南。地主之賜也。於馳賀之次。仰布其私。干瀆峻清。臨楮悚悚。

與前人

某日者。釋耒山中。僕僕湘役。走公堂。脩民禮。具申假道之敬。蒙主進吏。位之堂上。再三祖帳殷勤。臺餽絡繹。視塵氓且絕等。至於開心見誠。憂愛疊疊。一洗世俗崖岸。某鄙吝久矣。微大雅無以發此意。殆未許諸兒覺也。小隊出郊。追送作遠。自遠森戟。雲樹渺然。連日欲作書。道歸戀之概。征塵在衣。筆硯爲廢。偶宿分宜七里。殘日入戶。輒寫綱繆。風濤滔滔。嫫緯忘食。金護玉持。世道將有嘉賴。歸雁草草。尙謀裔嬖。

賀楊提刑允恭 號高峯

某昔者。望七十二峯於洞庭之南。以爲嵩恆岱華。類不可易見。五峯三市之近。皇華臨之。遂得以相望。下風未見。猶旣見矣。迺今使帆凌空。泝贛石而上。僕家去大江濱。可四十里。天其予之。以一日迎見之。慰此平生。云胡不喜。某茲者。伏審庾政告功。刑臺建節。褰帷而問風俗。猶昔四封。持斧而行東南。于今三命。旌旗初動。約束一新。仰惟某官。識透萬微。才當八面。陽道州撫字之政。所謂吏師。元刺史參錯之奇。可布天下。天子以公篤於倫紀。使得以便綵衣堂上之奉。乃眷西顧。如此江水。一節常平。二節繡斧。式敬由獄。以長我王國。平反一笑。庶其在此。公歸廟朝。卽典風化。一家仁。一國興仁。尙觀大學之顯效。某杜門掃軌。

知事常後。忽里巷父老。驩傳明使者將至。伏櫪之驚。躍躍鉦鼓。往事如夢。不足細陳。某所深自幸賀者。三間風雨。託諸提封。小人有母。繼自今得安於其子之養。是則君子錫類之賜。服之無斃。堂堂在目。卽聽匪伊。輒以書先精神孤往。

與吉州繆知府元德

某昔侍同朝。自詭相好。茲不得又以繁縟爲疎遠。惟公勿深訝。某行吟孤嶼。回首吳山。烟雨中。書郵往來。時從泓穎叙尊仰。汰歸深密。姓字不到。雲霞外分。正如此。非於名門有所簡也。階符在望。徒有稽首。某茲者。伏審朱幡春動。紫馬星移。民樂耕桑。簡靜方安於晉國。州稱富庶。勤強更屬於張公。兩地送迎。二天今昔。恭惟懽慶。欽以某官。霜明月滿。玉潔冰清。端嚴有大臣風。澄不清而撓不濁。循良入漢。吏傳寬有斷而愛有威。小停權於天津。頻合符於江國。歲之不易。民胡以生。將甦青社之飢。遂易淮陽之臥。竟上爭杜衍。雖去住之良難。席前問賈生。恐傳呼之已迅。自天子所以我公歸。某茅屋三間。在萬山深處。借書沽酒外。一毫不以爲公私撓。獨蒔松百畝。日騎牛叩角其間。天惠仁侯。自此吏不打門。犬不夜吠。猿曉鶴嘯。各適其適。則某受賜侈矣。候迎之初。不勝依倚。謹具劄子。自陳燕雀之私。何當嗣狀。

某屏居一廛。耳目塗塞。忽蒙公牘。錄示省札。竊諗朝廷。爲李祕丞諸公有請。待發諸項椿積。賑我廬陵。而賢太守敬共其事。日夜講行之。仰惟施仁發政。朝廷甚盛惠也。救災恤患。鄉曲諸公甚盛舉也。承流宣化。

切切然惟恐一夫不被其澤。君侯甚盛心也。某嘉與鄉邦父老人士同一贊歎。伏承不鄙。特有下問。以某之庸愚。不足及此。細玩諸公所陳。如隨縣閼狹。分撥米數。如發糶之直。只依元糶價錢。皆旨揮之所已許。而使府已遵而行之。甚善。至於戶口之多寡。編排之虛實。此則各都各保之事。所在都保。委有奸欺。然物之不齊。物之情也。若以太守屑屑爲此計較。恐末流必至多事。此惟當嚴責之。八縣宰。宰若親民。若其以實惠及人爲意。必能周思熟慮。以求稱察。明指傳所謂心誠求之。雖不中不遠是也。一縣各有一縣風俗。一鄉各有一鄉事體。諸宰申請。惟各從其便。不患寡而患不均。彼必自能斟酌通融。而爲之說。惟吾行所無事。自然所濟不細。但縣之於郡。往往勢分隔絕。若專靠公文行移。必有展轉遲滯之患。若使府明諭諸宰。此事今作一項措置。不比公事常程。每縣各給以數紫袋。置循環曆其中。使諸宰有所申明。只於曆中絡繹稟請。從書表司。往達君侯。隨手應答。如回朋友書信。使爲宰者得依時稟承。其中便減吏奸八九分。且閭里細微。得嘗達於黃堂之前。物來事至。無不曲當。是則布宣德意之一大捷法也。某不當出位僭越。承問不敢不對。或者千慮一得。惟君侯矜其愚而勿罪之。某繼此若有管見。馮恃寬貫。又得稟陳。

回吉州西倅竇檢閱全器

某昨歲待罪闕下。明公騎鸞騰鳳。下我青原。相望寥廓。不能以時。刷翎振喙。從燕雀來。不圖天孫雲錦。飛墮几格。金聲玉色。參前倚衡。固不以旣見未見爲間然也。某官歛岳翠以爲神氣。卷湘水以爲波瀾。駕蓮

葉而味玉書。仙芳纏纏。擷芙蓉而弄斗柄。道運堂堂。長樂鼓鍾。西清帷幄。穆羈星辰。經緯雲漢。固其分也。風月神螺。小此盤礴。綠綈方底。王曰邁歸。某旦旦爲斯文屬目。昨承使者之來。卽從脩門。作意馳謝。會匆去國。出處殊科。歸臥悠悠。書尺盡廢。光陰不堪把玩。歲年如許。念厚意久不報。矍然薰沐。祇對主書。耕釣一塵。五雲在上。臨風詹沂之至。

回江州李都承與

號南窗
關四人

某頃風颿回薄。自湖人江。目穿高牙。恨臂不羽。一棹從湓浦來。五雲絢爛。照映清越。對桑落而飲古人之酒。擊中流而聞夜覺之雞。至今使人意氣激昂。借力下風。飽我滿腹。乃以丙寅視象。菱舍下塵埃抖擻。未繇面謝。軍將扣門。斜封三道。突入眼角。臺餽使蕃。綈袍之私。何以持報。共惟某官。關洛耆俊。韓范聲名。參并鉞旗。聯寶奎之錯落。江淮草木。被玉節之昭回。吟嘯庾樓。梅花噴薄。老熊當道。貉子不敢越一步。夷猶岸幘。蠡管莫涯。方面。誅不敢辭。圭錫以須。勒此堂堂。燕然石在。某漫浪出山。落身枵瓠。問官官靡。問吏吏荒。而民氣則憤憤未醒。絲棼莫理。如之何其淑後也。明公惠念疇昔。肘後丹訣。其肯爲某愛邪。臨風切切。亟拂吏盆。具酬潦約。歲晚寒驕。願言金玉體府。壽此宗廟社稷之身。宜豈無愆。彼者三肅以請。某去年在宣州。一江上下。幸甚數數相聞。然所甚恨者。過湖口時。不能轉江西四十里。拜屏下。共登琵琶亭。以庶幾英豪之下風也。未幾召去。又未幾汰歸。一出一處。爲天下笑。知心千里外。當亦謂何。某比者伏

番晉承密旨。升直淵圖。詔璽申褒。鋒車交趣。共惟驩慶。某官關西遺老。江表偉人。崎嶇諸葛之兵間。氣吞河渭。假蓬元規之坐處。目盡江淮。天方祚宋。襄戎解嚴。公歸本朝。坐帷幄。老成謀國。處置得宜。使姦雄伐謀。兵端不開。將社稷實受其福。某娶緯小心。一飯三禱。屏伏深山。幸不見棄於君子。專使遠來。持書問勞。將意孔厚。猿鶴爲驚。區區拜高誼。而杜門齷齪。未知所以爲報也。九江未除人。想當宁急賢。應不俟代。某嘉與海內。延頸大用。倘得衣被餘光。遂爲太平安民。公賜大矣。江空如許。執筆茫然。相望一方。精神馳往。

回潘檢閱

某伏以歲華晚晚。春事權輿。共惟某官。鑠玉晶瑩。凝旒簡注。神之相之。台侯動止。萬福。某濃薰鵲尾。酬敬腆施。曩從集英殿門。吾榜得人。以執事重。海臺沙合。雲月相輝。至今斗牛。猶有光氣。顧山林僻左。繫雁悠悠。天際碧雲。明發不寐。千里眉目。忽照宛陵。爲之登然以喜。欽以某官。斂崑崙以爲神氣。捲溟渤以爲波濤。玉質金相。宛乎無自眩之色。泉清松茂。浩然有難進之風。乃今紉石室之祕藏。爲籀書而出色。視周六典。作宋一經。南豐以史學稱。進裁大典。安定非他人比。宜在經筵。某鶴夢正醒。起廢出坎。循墻弗獲。被命于征。郡枵然虛。真山凋水瘵處也。敏手爬梳。猶懼不旣。況不穎之尤者乎。不規而頌。非所敢望於同年也。稟酬崖經。寧不嗣音。願言努力明德。對揚王休。有昭亭委戒。其敢不肅。

某曉汲凍清。以贄萬一之謝。首于穹勺。某兩年中。風月晃朗。望太乙光氣九霄。吾書無翰。不能時一飛到。梅花月影。忽疑是君。而米家第二帖至矣。施稠報眇。自省欲如。尊執事以黼黻雲漢之胸。試金玉典墳之手。駕輕就重。拾級升高。此逢掖之至榮。而搢紳之交羨。曾子固晉裁大典。爲史學優。胡康侯宜在經筵。非他人比。某鶴夢正寒。大化驅之出。自湖涉江。風帆回薄。四十程乃抵宣。山澗水療。眇兮愁予。敏手爬梳。猶懼不旤。況不穎之尤者乎。高明局外之見。何以教之。滿硯冰澌。濡毫如帚。尙規嗣音。以寫繾綣。

回吳制帥革號恕齋

某林慚澗愧。賀賀此來。幸甚。在玉節照臨之末。九華山下。蹉跌望塵。拜手雙魚。分隔雲漢。敢圖下士盛心。超越昭代。襄報鄭重。闕位貌於不有。方驚喜未定間。五雲寵靈。自玉麟堂翩然賁之。所施所蒙。非敵己以下所得。道德之味。流注翰墨。使人之意也。消。恕齋先生。允文允武之才。有體有用之學。以王謝之衣冠。而接風流於江左。以朱程之講貫。而窺闕奧於魯東。顧今吏道便熟。袂帷成雲。崇詩書而抑刀筆。坐俎豆而行甲兵。鐵壁東南。公其天人也耶。經制西事。當在朝廷。錫命師中。不如歸袞。某敢誦所聞。某生也。晚於一世。封胡羯末之勝。幸甚。皆得下拜。而於恕齋識獨早。眷尤厚。癸亥之望神皋。戊辰之陪紫雲。又其後來事也。今則以列郡而事崇垣。何敢仰綴宿昔食芹之美。豈無是心。非所得僭。詎謂臺餽駢羅。光照下國。自上而施之。足以爲德。某敢不三肅使人。恭承嘉貺。若夫以往復爲禮。則誼之所不敢出也。謹三熏三沐。祇

酬主書。干瀆清嚴。臨風愧悚。

回宣州洪倅

某馳想芝山屹立。如鸞坡鳳閣。代有英妙。不自意天惠宛陵。朱絨斯皇。乃肯共堂下探梅清致。亭亭雲月。邀我敬山。不後不先。未有如斯之巧者也。伏惟執事。日光玉潔之襟。繩直準平之度。車堅御良之材。真所謂喬木百圍。秀色干霄。望清都太微之垣。維尺有咫。課丹峴緹屏之最。當階而升。胡尚縮於緋魚。來同看於黃鶴。意者康沂之歌。愈出愈偉。有相之道。實畀之以藥石。枵然郡政之闕者乎。思昔潁水霄立其間。而正獻以賢行佐理。至今談者。猶播舌不下。某於鄉之典刑。無能爲役。而吾執事。則真其人也。前茅在道。旛旄舒舒。願疾其驅。降此未見。至於乘珠委貺。鄭甚於先施。覺光氣炯炯。衝貫斗牛矣。懼弗敢當。亟鍾鼎而歸於瑤華之側。區區甫此滌篆。排冗占酬。崖略是惡。

回吳直閣覆齋之子

某少之時。聞東南二石筍。玉立九霄。陵陽蒼實。爲綠野午橋佳處。鸞鶴神清。縹緲何許。老成遠矣。尙有典刑。仰惟某官。揚休山立之韻。日光玉潔之襟。文獻堂堂。代有英妙。未旣見只。神爽一方。某臥青原山中。驅馳良倦。上恩俾郡。越在鳴珂。循走彷徨。連符趣赴。不量此來。未知所以。淑後喬木婆娑。五雲絢畫。尙祈雍誨。俾就玉成。某遠奉瑤音。緘貺駢錦。先施倒置。曾是爲容。旣什襲巾衍。輒鍾鼎以歸。太乙之府。望履非遙。

臨風羣羣。

與游提刑汝

某以良月之望。舉棹東下。江空見底。乃章貢源頭。諸水怒長。未幾。光燄五朵。與空同雲俱來。往颿順風航。波瀾之澎湃。灑石鍾之清越。寵靈張王。迄抵雙溪。子月丙寅。俯抵賤役。瓣香西望。敬謝所蒙。明公卷其十二峯之神氣。軒軒磊磊。昭耀東南。以宰相才。學宰相事。天下久望其爲家。擅出色轡絲。周道肯復倭遲。惠露漉漉。江之民幸矣。如溥寰何。會有溫綸四輩馳下。某不善爲斲。得郡復枵。至之日。視官官靡。視吏吏荒。民氣憤憤如也。爬剔莽絲。顧氣力所至。終覺五技易窮。肘後神奇。不敢以望之他人。惟故山松菊。衣被綵雲。亦已過數。矧茲隴蜀。徼惠未涯。微疇昔不及此。相望二千里外。明月此心。懇懇側釐。掛一漏萬。惟青陽時動。綈絲光華。式金式玉。以副前禱。此豈無斲。辱戒爲榮。

與趙知郡孟邁號菊山

某頃從南浦亭邊。抖擻殷函。道所蒙荷。且矯首于太乙之府。穹林冥坐。縹緲絳霄。江塗漫漫。勞我宵榻。執事以玉雪界之精神。臨睨八極。朝闥風夕玄圃。識者猶竊遲之。錦衣照道。繫淦橫舟。蕩漾柳風。噓吸竹露。澗阿樂矣。如顛顛望歲者何。建章夜半尺一堂。堂畫省紅雲。著公高處。惟日望之。某不善爲斲。得郡復枵。以子月丙寅。視篆昭亭下。視官官靡。視吏吏荒。洗垢爬痒。亦曰視吾氣力所至。然山澗水瘵。非刀圭可療。

肘後神奇。惠徼大福。某不敢以望他人也。焚蕤淪雪。西鄉奉書。以謝以祈。鼎珍履絢。願言金護玉持。對揚王休。臨風悃結。

賀前人得盱守

某昨在宣州拜書。亡何客攜琳琅來京師。欣浣如對。匆匆去國。不成報襄。歸里以來。杜門深念。又無從嗣音爲謝。徒有清夢。夜遶金峯。忽讀邸狀。欣審丹鳳揚綸。銀菟擁鎮。八百國封爵。莫如同姓之親。二千石起家。共讚惟良之牧。先聲載道。闔境爲春。伏深歡忭。欽以某官。景緯光華。仙潢清潤。淮南桂樹。了無貴介之風。李白桃園。綽有神仙之韻。軒陛宜當於三錫。轅和肯洩於十同。睠惟東盱。實介南服。紅泉碧澗。髣髴丹丘。白玉紫烟。參差繡陌。聊商羊於朱紱。供衍燕於青香。大宗維翰。价人維藩。不動袴襦之喜。九卿執羔。三公執璧。言觀衰鳥之歸。某辱在眷知。助喜百倍。既不能振翎刷喙。從燕雀來。謹奉書寄。便申慶迓。兵當已在道。不知開藩。涓卜何日。某尙當屢賀。不一。臨風馳泝。

與趙監丞淇

號平遠

某乃歲之秋。緹騎來山中。嶽翠蒼寒。琳琅照映。章不成報。內有欲然。寧不嗣音。僻左之以世道如許。風起雲飛。中夜人物之思。爲此耿耿。上念井絡。丹詔起家。峽月棧雲。先聲浩蕩。蓋有望木牛流馬。再立武侯之事業。又壁窺萬一意。必與南山。洎予秀諸公。上下雲龍。共此光明俊偉之舉。縮袖問臨。睨天半。此其大

本領大經綸。政不易涯之。野水橫舟。蒼虬縹緲。山君川后。日有疏附。卽日恭惟台候萬福。某漁隈半席。自分小休。誤渥自天。俾尋庾謝舊盟。意此是拭筇之陋耳。三辟弗可。乃以陽月之望。束書出山。涉重湖。越大江。整整四十日。抵戍。以是月丙寅。抵賤事。凋城敗屋。枵然大瓠耳。搔首踟躕。望洋氣縮。維宣距鄴。僅隔一雲。東望熏香。奉尺書候起處。惠徽藥石。立我沈痼。梅花晴昊。拄笏神馳。

慰前人

某昔讀檀弓。文子之喪。旣除喪。而後越人來弔。其居使之然也。伏惟先太傅大丞相冀國公之喪。旣有日矣。地不千里。不能往弔。一介奉禮。今也而後能來。死罪死罪。嗚呼。皇天祚宋。國有元老。數百年宗社之靈長。千萬里風寒之險要。蛟龍在淵。虎豹在山。屹然長城。爲此突兀。天乎不使愬遺。遽奪之去。主上震悼。傾動朝野。伏想生平翹館之英俊。舊日麾下之將士。與夫三邊之百姓。四塞之英豪。見碑而淚。望城而悲者。不能已已。矧夫家門之奇禍。父子之至情。攀擗奈何。嗚呼。痛哉。某生也晚。當公佩天下安危。分不得勇往。執鞭。今而追恨。則已無及。獨念袖有瓣香。歸依平生。亦旣不克爲公壽。惟有爲天下慟哭。敢西望靈輜。揮淚。白拜。叩獻之。公而可作。向其找許。嗚呼。悲哉。親喪所目。盡也。抑先王制禮之意。是有節文。士君子爲孝之道。在於顯揚。伏惟執事。重致意焉。卽日孝履支持。某頓首奉狀起居。臨紙哽塞。

回安福趙宰與搭號勿齋

某追記疇昔。同到蓬萊。慈恩之題。杏園之宴。吾以故不與焉。然同年之情。豈以四海九州爲藐然哉。王孫乃龍鍾世有籀雲鱗。今不遡紫清。上峩嶢。顧得百里之地而君之。簾陰晝寂。千室鳴絃。實鄰吾父母國人。誦子產。今其時乎。某私獨念。今天下豈有可爲之縣。縣不可爲。而可爲者人。如君者。以可而臨不可。於是知材具之超常流百倍矣。長書下貽。燁然春華。溜若清風。與我之厚。昭切至情。多言不足以殫謝意也。某守郡無補。誤渥爲郎。縮縮循墻。行且歸里。當觀棠陰。以與邦人共談政化之微。亟推吏塵。具報記室。揆諸來施。不敏流汗。

此一馬二僮。日在泉石深處。聞山外塵埃。亦頗作惡。坐對浮雲。亦開口笑不自己耳。君解墨綬去。意紅光紫氣。冉冉帝側。乃猶廬陵客。琅晝至前。矍然起仰。黃柑紅袖。二美并貺。杏苑論情。我之懷矣。冬江雪涸。萬里安流。目送征鴻。知有順帆。天際如駛。伏楮拳拳。中書不中書。復字蕪穎。併希錫祭。

回寧國交代孟兵部之縉

某去國之前一二日。宣州弛征之命下。某旣爲桐鄉百姓頓足起舞。卽拜書望雙溪疊嶂。爲賢主人賀。吾輩讀書臨民。正爲今日行志。凡此者各盡其分。固非相與爲賜也。旣汰斥歸里。卽閉門不與人事。山巔水涯。儵然獨往。而使者忽持五雲來。君子之有情於人也。卽勞問之。將以厚禮。復申其綢繆焉。某誠不自知其何以得此也。宣人歌舞賢侯之德。教冠冕像。設祝廣成。千二百年。令公二十四考。蓋人心之天也。某何

人斯。偶以一日出位言語。乃得因見大夫。以自附於去思之義。某微德以堪。回首碧落山川。鬼神猶有餘。愧宣敗壞至矣。弛之則期會散。繩之則撫字虧。公折回蟻封。從容不迫。期年而變。古語不誣。方今論選表。無出潁川右者。曷不均弘。俾執事樞。某一飯三禱。使者之歸也。謹東望熏祓。身心致敬。陵峯堂下。有日延見。父老尙願道山林不忘之私。與其所以不敢當之意。進之惟命。退之惟命。某臨書不勝拳拳。

文山先生全集卷之六

書

回寧國陳節推容

去年闕下拜書。稍得數數。未幾聞捧檄校文。不知陶鑄何處人物。某自是卽汰斥去。閉門深山。遂無復鱗鴻。一日之便。忽使者來山中。欣得妙帖。見示小錄。方知昨者。衡鑑所嚮。近思想歸舟蕩漾。彭蠡。吾知心正在香爐峯白雲下耳。宣之弛征。執事首從吏之幸。而集事。僅足了吾輩之責。非相與爲賜也。書來。乃知宣人以此爲多。祠之以識其不忘之意。恍惕於孺子之入井。豈爲內交要譽設。抑桐鄉父老此意。亦能使人感激耳。宣爲郡凋劇。極力扶持。幕畫間。想見勞苦。盤錯糾結。以試利器。天下事正有賴於方來耳。某前冬一出。去秋一歸。進退行藏。惟其所遇。而無心焉。則今奉親課子。彈琴讀書。流水青山。悠然獨往。不煩故人江雲渭樹之思也。史記見貺。家藏本皆不及。尙當朝夕以稱所蒙。明善錄一部。謾侑歸牋。臨墨馳泝之至。

與吳提刑觀

某頃待罪闕下。薄奉函書。僕被來歸。嗣音杳邈。上下人物。感念世道。未嘗不與門牆拳拳也。某比者。伏讀邸報。欣審玉陛出綸。繡衣移節。夜醉長沙。曉行湘水。已著平反。風酣章貢。日麗崆峒。更煩輕熟。江湖相望。

原隰增輝。某官宣慈而惠和。高明而正直。義豐授受。孔孟氏之淵源。江左聲名。王謝家之門第。蚤立登於闔閭。邇坐厭於蓬萊。竹馬相呼。春生襦袴。星輅所至。雨叶桁楊。茲涪捧於英函。乃肯臨於梓部。刺史故人。按事飲酒。情法相當。忠臣孝子。畏道驅車。君親交盡。靡需席暖。已趣詔溫。某杜門深山。去城郭甚遠。而於太和差近。初謂旦夕使輿。泝贛石而前。可於快閣上下。迎候一拜。忽傳英籟。小駐青原。某揆之始望。則蹉跌矣。瞻睇行臺。輒易奉狀。代敝燕雀之萬一。若夫揚清激濁。洗冤澤物。閭閻欣欣。無所患苦。使屏退之蹤。亦得從猷畝以自放適。是則某之所自賀者也。臨楮切切。

與湖南陳提舉合說 中山

某猶記乙丑之夏。從江西提幹。得往來行書。江闊雲空。斗光如水。每懷世道上下人物。未嘗不中夜耿耿。某茲者。恭審奉少府節。駕常平車。衝嶽連雲。遠挹海山之秀。天囿麗漢。近垂楚分之光。原隰春深。旌旗風動。伏惟歡慶。某前年與公同除郎。去年與公同除節。不才安得追附名勝。自分卻立下風。猶幸時論不磨。得公輩落落參錯。使民物吐氣。國庶幾耳。相望千里。北斗在天。何時執鞭。寫此冲懷。

回林學士希逸號竹溪

某夙有幸。獲與介弟爲寅恭。因之有以詢居處著作之萬一。不戚戚得喪。而言語文章。足以詔今傳後。竹溪先生何憾哉。一日之赫赫者多矣。千載而赫赫者幾人。爲一日計者。無千載也。決矣。

回贛守李宗丞雷應號樓峯。

某偃薄林阿。不虞使者之涉吾境也。迺自空同來。顧我猿鶴。米家書畫。光怪滿山。此豈四海九州同年無情者邪。僕家青原深處。實與君侯黃童白叟接畛而處。自下車以來。但見年穀獨登。黽黽屏息。不需數月。報政赫然。茲豈千里能事。環君侯四境。鷄鳴犬吠。晝夜相聞。實共受賜。僕也彈琴讀書於其間。其賜多矣。敢圖高誼。厚鎮撫之。委貺盈箱。非所當得。睇瞻霄立。頓首知歸。吾鄉宰邑於使天之下者。三人焉。其一爲陳行夫。若羅子遠。蔡濟甫。皆曲江齊盟者。奉令承教。必有可觀。廬陵一歉。異於常年。田里憔悴。不堪舉目。惟章貢素無糴事。而得歲又偏。鄉人顛頓者。往往相率而趨治國。民食關繫。苟可通融兼愛。秦晉公之惠也。謹復書。空山白雲。無足持報。薄言采藻。臨風如馳。

回交代湖南憲新除湖北漕李宗丞

某旣專鱗幅奉起居。猶有腹心。不嫌裔孽。某屏計寬閑。無復山外想。公朝念其流落。畀節起家。使之繼明。公印綬之後。聞命慙然。不知所爲。堂有重設。蓋年耄矣。湘行且千里。舟車迎侍。不堪顛頓。是以懇悃丐祠。冀使私養。天高聽邈。促旨且頒。叱馭回車。進退維谷。將從鶴髮而來耶。則非養志。將又以香火請耶。是何爲者。而爲是瀆也。謀之乃心。稟之親老。旦夕姑以旨甘屬弟輩。單車將指。以明不敢自棄於明時。而復以不得將母。重告之造命。俟驅馳數旬。卽乞身以歸。爲臣子稍盡幾分耳。某於門牆知己。論交非一日。天又

開之以奉令承教之機。是其與四海九州之同年。其有情益倍倫等。誠不圖解后及此。古之君子。其爲人也。謀之必忠。愛其人也。惟恐其不入於德。故敢疊疊陳出處之槩。惟執事啓誨而圖利之言不盡意。臨風如馳。

與江西黃提刑震

某幸托年盟。夙依塵部。竊跡萬山底。衣被末光。飲墜露。餐落英。粗安半菽。公之餘也。久疎晤寫。滿目春雲。一水盈盈。迢詹河漢。某茲者。共審出綸鳳闕。移節虎城。春信初傳。立變桁楊之舊。天光下照。重瞻禮樂之新。依然故部之江山。籍甚先庚之號令。伏惟驩慶某官。剛不吐而柔不茹。寬有斷而愛有威。發爲文章。正諧韶濩。勁沮金石。凜然節槩。光垂虹霓。聲揚紫微。早分潁川二千石之符。就秉天囿十三星之節。據案叱吏。笑比黃河清。開門賑飢。功過中書考。上久簡孟博登車之志。公遂爲勝之持斧之行。春風遍地。而猩猩虛。夜月當天。而鼉鼉伏。載馳載驅。維驥維駱。靡憚周咨。來游來歌。如圭如璋。言觀肆覲。某避影杜門久矣。不作山外想。不圖元會之日。上恩覃及流落。畀相識於珠玉之側。虎鼠同器。猿鶴笑人。云云。

回林司業應炎

某夢想巍巍堂堂。於朝花院柳間。追隨猶作日事也。玉烟劍氣。鞦韆崢嶸。杳然在碧雲崔嵬之外。江月流水。實照沅沅。某官以冰輪金井之心胸。發黼黻火龍之光燄。而又慥慥乎言行。皦皦乎進退。若汲長孺。若

陸敬輿若慶曆元祐諸賢。充公之爲。表裏庶幾其無愧。領袖斯文。旗翼元命。天下以此望公者。殆人人同。願玉立以需之。某自歸來乎山中。俯仰半菽。不復得與四方書牘從事。比從戶曹黃文得誨函。草木同味。玉雪照心。欣懌之餘。感慨係之。某蹇踔之蹤。何可爲者。大化驅之一節。誤落湘雲。避走陳情。俞音竟闕。單車徊徨。且此首涂。行復求返。吾屠羊而已。渺渺天一方。重此懸泝。專容陸續貢獻。

回信豐羅宰子遠名椅號澗谷

某去年聞雙鳧南上。落落空山。不如燕雀之爲有情也。大化驅人。作江東客數月。爬梳枵瓠。未見端倪。會誤恩召環。滂班過當。亡何狼狽而去。蓋疎闊以來。居多道路之日。出處乖方。滋可爲笑。杜門息影中。高情厚鎮撫之。專介持書勞苦。臨風馳感。可人天一方。信豐山水邑。見謂讀書松竹。晝影滿簾。著吟人其中。所謂予方有公事。此豈錢穀吏比耶。勿需終更。西清有詔。璧弟何爲者。赴新昌且百日。商鉅馳河。未知攸濟。惠徼如天之福。寡過多取數矣。贛瑞皆佳邑。藹藹吉人。鼎立空同。真一時之盛。當路或令舉所知。某幸甚。有以藉手。薄言修布。小附芹心。非敢謂報。倚筆詹沂。

與前人

某臘前函書往來。庶幾契闊之意。年光冉冉。驚見雙壁。蓋曾兄季困專紀綱實來。仰惟同年長者。所以惠綏荒寒。皆可感也。某雲臥深山。世意落落。一起一仆。非人爲之。上天蓋高。匪怒伊教。敬威念咎。安得不力。

執事昔爲之助喜。今亦有以救其不逮乎。敢請季。因值儒者之窮。執事以氣類遇合。所以位置之者。寵甚。萬間塞土。公將溥其施於一時。所謂兆足以行矣。某爲之歛衽。新年喜雨。燈前報命。馳想一方。臨紙悵悵。

回羅子遠就賀除京權

某俯仰歲年。甚知聞問。頃知捲旆來歸。衣錦有爛。且趣舍人裝。于于然東矣。亟欲擘牋所思。雲頽鶴倦。不可拈拾。竟墮夢寐外。時一動寥廓。想江邊鷗鷺爲之悵然。忽得手書。賁我空谷。華袞流離。辟易久之。共審帝闕出綸。天京司轄。姑養篋鴛之望。佇博峨豸之音。伏惟驩慶。明公契古胸襟。吞雲夢者八九。外物瑣瑣。遲速何心。積之厚發之弘。宇宙間華軌清貫。將次第而取之。以其時考之。則過矣。某風雨深山。避影卻走。乃元會之日。公朝以一節起其流落。回首三湘。驚心蕉夢。請隸香火。旨更趣行。慈親以遠役爲憚。進退維谷。莫甚此時。旦夕黽勉拜命。姑單騎之戍。驅馳數旬。乞身歸臥綿上。同年有情。不隔四海九州之遠。毋金玉爾音。冀一語以自壯。拂拭過情。非所敢當也。占對梗槩。尙猷嗣牋。

某一之日。旣端拜敬謝芳題。并報信豐薄攝零之槩。二之日。謹遣介馳諸席間。寅奉起居。不敢繁敍。首祈委鑒。某臨歲入湘後。墮身徽纒中。詹沂宇下。闕焉嗣音。繼聞趣戒朝裝。榮司京權。某念欲牋忱賀慶。以申風雲發軔之慶。一春屑屑行路。浸墮因循。旣抵空同後。潼川趙同年來爲縣。實在河陽舊桃李處。鴻沙指瓜。猶記東西。所以告新者甚厚。因得切諗。修門近况。大帶深衣。長身玉立。道德福澤。方來而未艾也。吾鄉

諸老行輩落落。歸然靈光。惟今澗谷先生。依星辰。傍日月。一日騎麟翳鳳。朝閭風。夕玄圃。勢正順耳。某祇陰杏集。素辱心期。慕王陽之回車。學毛義之捧檄。得郡山深。俯仰半菽。君師天地之造。知已錫類之餘也。惟是求牧力綿。未知攸淑。回首蔽芾。我愛桐鄉。豈無一言。益其故人。并寄父老。因風東向。頓首以請。

與汪安撫立信號紫源

某仰惟曠度絕人。不作邊幅。僕安得以書生刀尺從事。高明幸察之。某昨者爲高安受容。受察於玉斧之下。公不以衆人畜我。我實德公。未幾公去之。而僕亦以憂患。連年臥山中。蹤跡跋扈。不足爲知心道也。撫念江流人物如此。未嘗不中夜耿耿。某茲者。伏審揚綸九陛。建纛三湘。人無異辭。國有生氣。共惟慶愜。欽以某官名高九牧。氣蓋羣公。江左管夷吾。足係英雄之望。軍中范老子。能寒寇賊之心。往者金湯中流。忠績簡在上方。以南事爲慮。詔公方面。隱然長城。一代數人。百年幾見。公不得不力紀勳旂。常歸袞廊廟。自此等而上之。某退在漁樵。未忘葵緯。聞公此來。爲世道擊節。偶逢黃君強立。長沙便介。率然上狀。仰闕賀床。強立名至道。某昨嘗薦至館下。強立每謂公以意氣動人。能使人不愛其軀。其感激知己可見。今茲適在冀府。從諸公遊。公不以生客視強立。強立奉筆墨以佐大闢。豈直一日之長而已。憑筆僭越。向風如馳。

回前人

某望五雲多處。以鷲劣下乘。幸甚自託於禮樂之下風。旣奉儷函。布親牘。修大闢府之敬。迺不我後先。使

者銜命。卽之於深山中。翰墨陸離。光動蔀屋。拜而後敢讀。讀已而亟拜。居今天下論人物。一方一曲之士。隨世以就功名。謂之無益於成敗之數可也。當大方面。建大將旗鼓。使國有龍虎。馬不敢南向。其周公瑾。祖士雅之流乎。天子召拜。樞近脩勞。還故事少府。且出節付以西北。煩公辦此。金戈凱馳。歸袞廟堂。作太平六典。四海以此望公。亦公志也。某少也。驅馳嘗有意事功。鷄鳴奮發。壯懷固在。然而亦少衰矣。被旨行湘。顛倒繡衣。豈堪重著。惟宿昔於門牆。辱知己厚惠。徵字下。恃此敢求適三月。移卜先塋。有山間之役。受印之期。尚在夏五。竊聞四輩在道。車馬有行色。天殆嗇其一見之機乎。何爲屢得之而屢失之也。退憶前年。自直廬汰歸。公以書存問。推許不薄。海內時流。得此於名公者。正恐無幾。今承獎翰。益佩卷卷。江濤渺然。事會何極。何時執鞭。寫此傾蓋。某臨風無任馳泝之至。

與胡都丞穎號石壁

某已端具儷。積候敬籤房。心之精微。敢嗣陳之。某於當代知名。夙有取履結韉之願。寄書梅外。嘗寫我心。遠道報襄。如見顏色。伏自牙纛卷零雨而還。雁闊湘深。馳泝寥廓。伏惟以任重道遠爲心。以難進易退爲節。巍巍堂堂。卓然佩安危而繫輕重。乃今聖哲。馳驚上下。焦然金城。圖出師表。微公孰與於斯。追鋒在道。不俟駕行矣。某家畏壘山下。麋鹿之與羣。而猿狖之爲曹也。公朝起其流落。山衣易繡。舊夢恍然。一節走趨。幸在通德里。九轉寵靈。疊疊肘後。某行當掃門以請。拜狀梗槩。臨風卷卷。

某一節出山。指碧雲崔嵬。入風吹不動處。知爲神龍臥洛所也。前者幸甚。脫屣堂下。進瞻芒寒。適子之館。授子之粲。胸中經綸之奇。傾倒敷露。中夜慷慨。音落九霄。使人驚且喜。今而後知宇宙間。未嘗無劉玄德輩。某持以去。岫屨襟袖。尚有萬丈光。此殆未可與俗人言也。某以疎決。故一簞下長沙。初約先拜見。而後往帥垣下。偶有牽制。稍違息壤之舊。今茲回棹潭濱。將由便道單車。負荆門屏之外。輒遣一介。先道其私。幸豫戒猿鶴。勿以俗駕爲拒。率然馳控。倚卜而敘。

慰饒州胡通判石壁之姪

某茲者不圖先令叔某官石壁先生。遽捐里館。風馳上征。哲人云亡。邦國殄瘁。執事者骨肉至慟。爲國受弔。撫孤大誼。定力如山。足可以對岳雲之崔嵬矣。顧惟某落落後出。辱二阮之知。乃在一日之間。老仙用意慷慨。與之上下古今。撫念人物。袖中瓣香。僅僅拈出一再。老仙所以命之者。更在度外。爨桐之音方希。而化人之裾。已不可追矣。出聲慟哭。悲不自持。謹哀綴壹鬱。洩爲奠詞。往者如生。尙爲我惻。惟一賜宣燎。豈勝感涕之至。

與安撫李大卿芾號肯齋

某已專具僮。檳申敬記室。私心梗槩。不嫌裔髮。某辱知愛門牆。非一日之故。風流雲散。一別如雨。每一念此。神爽飛馳。江湖一雲。本不甚相隔。彼此出處。解后參差。至闊絕。乃爾。僕之罪多矣。明公當世人物。卷韜

山林四方顛顛。望其一出。方時多艱。婺緯忘食。然見王茂弘者。固以爲江左有管夷吾。某有計日以俟。鋒車耳。某避影深山。久不作馳騫想。公朝念其流落。畀節起家。釋絛上未而于征。未知所以淑後。幸甚。區區走趨。實在中台之里。十年契闊。一旦逢迎。豈命物者。開其親炙之機。而惠顧之乎。如聞閉門謝客。雅意絕塵。然待故人。固自有情。猿鶴必不我拒。相望寢近。凝泝如馳。

回永州楊守履順巨源之後

某嘗論一世人物。紫朱其綬。唱呵車塵。若是者駢肩矣。求其忠義貫日月。處漢賊危疑之間。臨大節而不可奪。至於殺賊奴。取纍纍金印。此事付度外。豈不凜凜大丈夫哉。父母講傳。百年間。吾見先太師一人而已。某官鍾岷峨之秀。嗣彝鼎之勳。忠臣之門。天人之所共祐。國士之器。君相之所束知。石崖齊天。唐中興頌功處也。公來其間。寧不感慨。今蜀道難。蜀道難。公收拾羣人。手揮天戈。一節之還。從甘棠刻第二頌。旂常濯濯。光于前聞。人某何幸。身親見之。歸隱空山。望湘雲千里。不圖使者。遽涉吾竟。仰惟明公。張主斯文。經始棘院。以相龍飛。興賢之盛。大張門顏。使某也得執事。從君侯。所以厚我。不同他人。小人雖無能爲役。烏乎敢辭。貢院二字。僭易奉上。進之退之。惟命。未諧握手。往來心聲。庶幾古道之契。臨紙拳拳。

回林侍郎卿孫誠雲屋。在臺時

某從望闕山。矯首五雲多處。寢疎起居。長沙少府傳仙書惠。并繳。祝琳琅之翰。仰惟緇衣宛變。古道顏色。

爲之歆拜。傳仙不肯望然而來。以書先訂出處。此意亦頗謹重。已遣禮聘之。且告以初筮如九層臺基。須令堅壯可耐。靜以待次。不失雅道。未知傳仙何所嚮。若其來訪。敢不惟命戒之共。

回前知衡州楊秘監文仲

某已端飭儷櫝。致敬心之精微。不嫌裔孽。首祈垂炯。某於足下。非敢以氣類詭流俗之縱。尙想疇昔。載色載笑。相遇不同他人。至今歷歷在夢。時方孔艱。荆吳多壘。坐廟朝。籌帷幄。折衝俎豆。正張趙韓范之事業。湘水以西。勤勞一障。天子曰歸借徑。斯文本色。俾執事樞。歎見之晚。某閉關念咎。不復作馳騫想。公朝出節。誤及荒濱。回顧黔驢。曷對湘雁。趣命且斂。單車于役。稍盡君親之誼。卽尋香火之緣。衡雲照人。垂執鞭弭。乃天上笙鶴。不復顧鷄犬矣。所恃襟期有素。且未忘甘棠。則其居中庇之誨之。某與蒸湘之人。均利賴焉。昂首慶雲。伏楮耿切。

與劉尙書黻

某夜拜文昌。朝馳函敬。感激疊疊。不嫌裔孽。首祈穹采。某庚午待罪底班。望英躔萬丈於絲綸閣。天章潤色。衣被青黃。雋永味言。稱於天下。曰知己。歸伏山阿。分霄壤絕。不敢以世俗書尺。候主進吏。熏香宣夜。北斗以南。共惟某官。文章稷言。而皋謨器度。商彝而周鼎。陶鎔帝皇。轆轤造化。燭六合。蕩八垠。吾道之福。布瀆流衍。翠幄青瑣之從容。文劍紫荷之凌厲。由八座而閭兩社。使天下再見希文稚圭之風流。某嘉與人。

士。且。稽。首。某。瓠。落。之。蹤。一。意。返。哺。夢。寐。不。到。山。外。公。朝。未。忍。捐。棄。披。拭。而。起。之。復。令。效。湘。節。牛。馬。走。烟。霄。流。眄。不。進。不。止。蓋。疇。昔。之。盛。心。未。愆。也。某。始。以。私。養。丐。閑。廩。天。高。聽。邈。且。趣。之。再。奉。明。命。以。趨。一。日。甫。履。回。雁。布。宣。德。意。唯。謹。湘。人。尙。力。抵。氣。末。俗。輕。生。蘇。息。而。調。服。之。既。竭。吾。力。焉。垂。天。之。雲。覆。羸。其。上。訖。濟。我。後。某。爲。之。夙。夜。願。言。因。謝。有。祈。臨。風。悃。結。

與陳察院文龍號知心

某夙在眷知。屢牋契闊。杓粲奎明。經緯碧落。曉夕詹馳。伏惟執事。以光明俊偉之胸。負法家拂士之望。鳳鳴朝陽。萬物吐氣。瓊廈密勿。熙明日新。陸贄處中。汲黯居禁。精神強而本根充。外難不足平也。上方屬以經濟。俾執事樞。某歷落之蹤。豈堪使事。公朝不忍終棄。盡出噓揚。始以私計。不使迎侍。冒干閑廩。趣旨且放。單車于役。以五月一日。受印司存。既見父老。具宣上德。意然兇猾相挺。山凋水瘵。扶持調習。庶幾一日非晚。且再陳情。爲歸養計。侯誰在矣。張仲孝友。儷語循比。藉手不足。以當劍首之一快。臨楮無任悃結。某輒有稟瀆。某昔者以臬敗。由書生本色。只當在斯文一邊。不應以刑獄爲職。故凡寬厚惻怛處。人皆由之而不知。其有不可以詘令甲者。則譁然以爲過當。所處非其位故也。自後諸公。速有論列。皆不實知其人。不過以前疏。潤色而爲之辭。某嘗願一日。有以自見於天下。使知吾所謂衡氣機者。而未易遂也。今年復除憲。實不願就。丐祠不遂。銳欲再請。又念起自廢閑。豈當重瀆已甚。故且黽勉驅馳。亦謂姑以平平處。

之可也。既入竟。乃知湖南風俗大不然。某若以身事。懲創靡然風采。懼無以肅一路觀聽。又坐失職。故初至不免見之榜揭。謹錄本以達台覽。夫如此。初未嘗有嚴厲之事。特示之以警戒之意。蓋於職分不得不然。然才作此差遣。便是惡滋味。兩日刷具一路獄案。數目甚多。莫非劫掠嘯聚等事。他時審覆既圓。皆不容付之輕典。某且獨奈何哉。某此來不及侍親。處此亦大不安。俟疎決後。惟有乞身歸養。所恃知己。肝膽相照。臨書不憚傾倒。念其久要。其必有以教之。嚮風卷卷之至。

與鄧校勘林

某頃繇春中走赫蹠。闖輦下。知上徹五雲閣。久矣。一節奔走行役。曠焉嗣音。矯首河漢。盈盈一水。某蒙賴如天之庇。以孟夏八日辭膝下。五月朔吉。受印於衡陽。初見吏民。既宣上德意。退坐棘木塵中。與徽纏相爾汝。爲之弊弊焉。江去湖不甚相遠。始者。殊不念其風氣之悉。至此始知尙力抵氣。以血人爲嬉。九城一波。莫障其瀾。某以爲怒之而不教。非古祥刑意也。見諸榜揭。嚴而不爲殘。楚人亦頗爲動悟。其肯繁中也。然某以書生爲之。非其本色。不諒者衆。此十年所以有申韓之謗。以至于今日。是安得而忘吹蠶之想乎。且重闈以老。不得就養。單車彷徨。雲舍切切。旦夕疎決後。且卽丐還屠羊。使叱馭回車。於君親兩不爲失。此其所以謝夙昔君子之教。而庶幾乎年盟之盛心也。厚德錫類。某惠徼福于宇下。蓋方新焉。偶逢便武。亟詞起居。且敘其所以跋躄馳驅者。遙對清切。臨楮泝觴。

與陳直院維善名合號中山

某踰睥睨霄寅致僂積心之精微敢嗣陳之某昨承鵠袍出使驛騎歸班嘗領廬山下所賜手書光氣垂虹下照空谷撫歲年而如雨恍河漢之一色也中山先生文運斤而成風氣振山而奔電元龍湖海突兀宇宙支架明堂曲摺萬丈光芒緯國典華帝制天下固以爲未也大明奎壁晉執事樞使士者顛顛歌仲淹弼一夔一卨某落落青山自返吾哺公朝未忍捐棄畀之一節使與衡雁相周遭草木吾味一引手馮翼之端出緇好某始以私計求閑廩聖恩闕俞且趣之載道遂以朔日見吏民宣德意然楚俗尙力概氣殺人爲嬉撫存而調習之未易爲力明公夙昔褰帷棠陰如屋五雲緯霄影落衡杜某爲之夙夜願言因謝有祈臨風依迺

某頃侍親抵郡輒持尺素專貢紫清懷今雨之綢繆望下風而慷慨也璧弟來京師拜夫子之門黃河秦華天下鉅麗之觀璧也所遇多矣今天下稱文章大手筆落落可數平園西山諸老之風流散在三光五岳間日月磅礴河漢經緯吾紫微公實當之南州之士僕將帥以聽某讀書涉獵筆墨空疎方青山蕭然水上之風猶吾意會一行作吏此事便廢間於故牘中掇拾親親長長之說見於行事邇來千里民氣覺稍洽和書生不知何方能終不迂關於事否昔人云未識意先感水火流燥記吾味久矣教思無窮勿替引之某豈勝倦倦

某自前拜書後。回首雁峯。不勝拳拳。水口吳權寨來。及承手書。備見繾綣故舊之意。百單二歲之姥。孟參發揚之安序表章之真。足以爲衡陽一段佳話。某六月朔日。祖母初度。亦及與一城老者相周旋。人生七十古來稀。是以自七十爲始。千數百名中。其最高者。爲九十六。延此母於堂。進趨語言。殊覺不衰。惜未有過百者。鄉間有羅提幹存叟。祖母去歲滿一百歲。某嘗偕朋友十餘人往拜之。當時有詩歌成軸。今年又百單一矣。此母大家。諸孫皆儒者。提幹登科。有福有壽。又非衡姬比。劉守卻未知。某旦夕亦當爲文。以白之。贛斗絕。與湘問久相隔。適有自建昌來者云。五月二日。廖恕齋過建昌。知五月末。主人到臺觀上矣。司存事。首尾關繫。無如孟參。在恕齋必不能相舍。安序權事半年。添此繁劇。想一旦釋重負。甚以爲喜。某於賀恕齋書中。已備道孟參一段。人將爭出我門下。此自無說。但願足下斂以靜鈍。守以廉朴。一如平日。則天下之奇材。青雲之遠業也。贛事稍簡。親老以下俱安平。竄出雲庇。但有疲於竿櫓。以一人之寡。應四方之多。覺甚苦之。鄉人相過者。隨分處之。亦不至甚相炒。中間只一榜禁假託。大者歸之臺。小者聽之縣。或以爲得體。贛只有出甲一項。未易杜絕。今春此輩在廣。聞某新上。皆急於歸。就保五。乘其畏向之機。近日未免先事諭曉。度今冬可得安靖。湘中旣獲諸渠魁。後想道州一帶已無事。湘鄉諸處寇攘之風。當是久已帖息。茲因專介。信筆傾倒。薄芹并瀆。向風如馳。

與曾架閣

某曠不奉狀者累月。杜門山居。無由四方上下。以相從於顧盼咳唾之末。馳仰中。得會李文復卿。廉知起居之詳。甚慰。子曰。苟患失之。無所不至。百千年間。天地不位。萬物不育。推尋其咎。常於患失之私基之。閣下出其浩然之蓄積。與當世之大人論成敗。爭曲尺。言不合。慨然竟去。榮途引於前。禍機怵於後。而毅然不變。由閣下自處。則本心內事也。自惴惴持固者觀之。則豈不患此失哉。歐公所謂我輩中人。敬歎敬歎。因復卿歸。并介以有請。先通判託孤與先侍郎。先侍郎以其責歸之架閣。事至重也。執事不以某弟爲不類。使昏名門。講好以來。涉四年矣。中間歲月雖多。機會甚少。以故告成吉禮。猶切遲之。獨至今日。則造物若有巧於其間者。執事當驅馳江淮。而某赴闕就道。執事卷風雲。藏林壑。而某恰亦骯髒來歸。兩家初意。誠不期有此暇也。某方尋香火之緣。自分閑散。而執事氣宇槩諸公。名聲動中朝。扶搖九霄。匪蚤伊莫。則川駛月流。舟飛岸奔。非復有此之暇。執事終先子之託。而某了同氣之責。今其時乎。區區肺肝。已具告之。復卿并疏其事。冀以關徹。幸執事終惠之。

回吉守王提舉必誠敬岩

某僻居林薄間。望旌麾所洩。遠在霄漢。道德朝望。蔚乎輝光。可仰而不可親。是其分也。乃蒙寵戒令。有聞教之便。忻快何如。入冬暄寒相泊。適有采薪之憂。莫酬隆厚。滋負皇恐。謹具狀謝。他容參謁。并敘區區。

自螺水而東。望西山。廬阜與三江五湖。如拱揖。知蜿蜒扶輿。有名勝宅其間。相去蓬弱。良覲差池。北斗芒耀。徒耿耿心目爾。不自意桑梓幸會。牛刀大手。姑爲此試。其惟明和介潔之譽。此邑不占已孚。歧予望之。艱難之秋。得君子之政。與拜燾覆之貺。滌篆云俶。未能躬闖賀庭。謹具劄子。代布忱悃。非晚當圖稟謝不敏。

與贛縣許權縣

惟廬陵與安成爲比郡。山川同在吉志。今茲遂得自附於鄉黨之末。幸甚。休甚。某往者。於諸公間。得聞政事一二。有司敬謹。莫重於獄。後世苟簡。幾以民命爲戲。濂溪爲小官。不肯殺人以奉其上。東坡謂今人爭減半年磨勘。雖殺人亦爲之。聖賢愚不肖之用心。其異如此。頗傳廉明與同州推官事。前後照映。辱在同里。與切增氣。銅章墨綬。賁止空同。一同風化。姑此相屬。奏最匪伊。騰太清。凌扶搖。錢公之步武也。某疇昔學校。曾於名門子姪。略有相知者。獨絢履末光。未有下拜之日。其如傾企何。適陳文成甫來。以爲託身桃李之國。輒拜此以識惓惓。陳文并乞公庇也。率文上狀。末繇參侍。仍冀自愛不費之寶。以須遠至。

賀劉敬德補入太學名欽。號絮矩。

茲審捷來南渚。聲振西雍。才名三十年。說屠龍之老手。冠帶億萬計。快走馬之脩程。儒榮有開。士論稱服。

其惟驩慶。某相期半生。聞榜折屐。無繇造慶。謹奉顯函。芝楮二百千。敬爲犒捷之助。不腆皇恐。臨風馳泝。

賀鍾有謙補入太學名山甫

茲審冰闌獻藝。璧水蜚聲。月旦評中。說八义之老手。朝雲飛處。艷三合之修名。下同。

與周德甫爲季弟從弟聘

某比者。牽率朝從一相過。兩日夜陪接議論之末。極慰翹企。獨恨去之匆匆。未遑屬賢耳。中間妄欲以二弟。相累陶冶。荷不鄙棄。許之以相周旋。甚幸甚休。鄰敵相交。則有盟。市道相質。則有券。吾徒相與。一諾已足。政不在要約區區也。然君子義以爲質。禮以行之。莘郊之幣。際可而幡。然雖虞人之微。非其招不往。非義無以將禮。非禮無以昭義。交際之道。不以節文將之。終必有弊。况爲弟子擇師乎。此書之所以不敢廢也。歲禮之數。息壤在前。無俟贅述。官楮一百貫。顯人送上。以少將聘致之敬。告幸麾頓。小弟差劣。不可大脫鈴束。燈前後早賜垂訪。乃所願望。觀德聽教。行有日矣。尙及傾倒其餘。

與文侍郎及翁號本心川人後參政

某久曠起居。遞申連得誨帖。仰佩至愛。邸狀間屢見丐祠。尊性樂在簡淡。急流勇退。仙風道骨人也。但老文學爲諸儒典刑。眞侍從爲朝路風采。上必不聽去耳。舍弟璧來拜侍。辱以家人進之。得與教誨。玉成實受尊賜。某向在湘。承命問一路書籍。後某去之匆匆。諸州來者不齊。今約見存。可二百册。贖書爲一萬九

千三百餘版。亦已陸續印背。別容一日專兵費申。某治郡以來。書生迂闊之說。頗有效驗。祖母六月生日。集城中內外老人。自七十一至九十六。爲男女一千三百九十名。犒恤有差。老者旣踴躍。而少者始皆知以老爲貴。禮遜興行。詞訟希省。又風雨以時。早禾甚稔。晚稻亦可望。諸縣民皆樂業。無持挺爲盜如宿昔者。稍追曠塚。皆尊誨所逮。宗老去國後。今寄居何處。想甚清健。恥堂先生居雪川。近況如何。批示幸甚。遇郵拜書。不宣備。

高恥堂名斯得。川人。參政。本心。癸丑榜眼。後來廬陵。省其叔可則。先生時年十八。邑校簾試。全篇論題。曰中道狂狷鄉原如何。冠榜遂通譜焉。道體堂謹書。

與楊大卿文仲

某頃繇岫巖。申敬羣玉之府。爾後僕僕西還。爲空同之役。一息半晷。海山一碧。秋風淩淩。翹企不勝。五雲紛郁。比審疏榮文石。晉武頌臺。制作一新。縉紳交慶。伏深歡忭。某官貞元朝士。西學宗師。玉雪照天。寒露清冰之操。璧奎行世。懸黎垂棘之光。屬時訪落。朝有老成。真天聖之蒼龜。元祐之麟鳳也。入告辰猷。條天章十事。冥之兩社。以福溥寰。某顛顛延睫。烏哺萬山間。於芻牧何補。亦惟召父杜母之政。是則是倣。蒙被吾味。至於今茲。璧弟來修門。得親炙典型。以濯去舊意。浸潤新雨。愛其兄施及其弟。此感殆未易名言也。念間起居。輒此馳泝空明。並候所以教。尙祈金玉。式副前禱。

與趙戶部平遠

某嫋嫋秋風中。若有天人噓新雨而沐之者。眄搖落之繽紛。把鉅麗而舒卷。則夏六月錦闌蛟龍字也。西平有子。惟我有臣。春秋書曰。季子來歸。國人貴之。麒麟游秦時。鳳凰集阿閣之候乎。朝廷清明。再天聖元祐。對揚訪落。爲東諸侯先。洗耳琅琅。爲天下誦之。某爲養承乏於此。何補芻牧。所以朝夕其民。亦惟親親長長之推。庶幾萬一云耳。諸邑大夫之相承通融。一家痛痒。一體緇衣之宜兮。若田君尤所謂用吾情者。執事惠以所知於此。見田君益奇。而某得納交幸也。結幽蘭兮延佇。此意褻積。專獻嗣箋。

某繇空同。起睨海山。虹氣緯霄。靡罅不照。吾石樓大地一粟也。輒倚空明來詞起處。惟偉人照以度外。某惟明世。雜選英賢。以綱紀生人。金玉新政。豈弟君子。來游來歌。經緯乎文武。轆轤乎風雲。伯埴仲篔。叔出季處。無非吉日車攻。間眞實經濟。臂指西北。本在中書。植之風聲。旂常世世。某拭目延和殿新綸之下。烏哺且半期。餐素祇益愧耳。且夕歸命香火。奉輕車歸。卽所安居中。引重允然終惠之望。泚筆廉泉。馳訊碧落。豈不嗣音。更僕以請。臨風無任悵結。

與陳侍郎伯大號篤齋

某熏沐薇露。闢敬高寒。惠徼五行俱下之躡。某玉峽撐空。水沙一碧。神仙人弭節其間。春花秋竹。鍾鼓餘閑。眞神龍深臥處也。咫尺五雲。不得時候猿鶴。則吏鞅實丹黜之。夜瞻明河。自訟不置。仰惟一代翔鸞神

駿騰踔凌厲。駕廖廓而振汗漫也。舒爲慶雲。卷爲清飈。其磅礴帝所。則福在海宇。其夷猶山澤。則望在廟朝。六合一握。天地一瞬也。厥今訪落廟謀。雲漢爲章。詔書出延和。公且兩社。某嘉與顛顛額手。某區區烏鳥之情。俯仰半菽。粉陰蔽芾。實持燾之宿昔。拊摩凋疲。曾微芒忽而髮皤皤。間亦念家。旦夕皈命香火。奉輕車卽所安。玻璃一江。光氣上下。某服媚之無斃。絕禮寄之九霄間。忘其蒙瀆。倘沐涵茹。幸甚。

與宋衡州

某介倚心知。不敢徒躑躅西曹。道邊幅首。祈紆省。某自抵空同。兩廡蜚翰。忽殷勤以寫心。折芳菲其寄遠。春風千里。著人如醉。至如飢餓之作。不足乎揚纒藉。而琮璜之。大好大慚。退卻三舍。顧區區定交才數月。宇宙意氣。不啻平生。忽飄風其相離。不勝回首。明河一方。如耿耿何。某官冰輪金井。雪柏霜松。西岷太白之精。九霄經緯。南平莫邪之氣。萬丈光芒。馳玉軼而坐朱陵。轡華絲而當銀漢。洗鼈鼈之窟穴。飽鴻雁之稻粱。已收暴公子之威名。小燕汲淮陽之清淨。綠綈方底。罈垂岫囀之雲。絳幘曉籌。催傍觚稜之月。某視郡印已十旬。初至如人家。風雨四壁。逐處經理。久之方成綸緒。日來甘霖應期。粗慰農望。想福星所次。時雨膏之。早熟必已可卜。恕齋新上。以同里而講交。承解后非偶然者。遠想楚觀五雲。衣冠玉立。不任馳羨。采采澗芹。薄旌一髮不足當莞頓。欲往從之。湘水深。三復是詩。神爽飛越。

與知江州錢運使

某日戴五雲。苟且爲治。自省其私。則統部中一支壘也。等威有截。不得以杏園宿昔自詭。乃者辱不彼賜之書。草木吾味。篤實嘔喻。略分際之崇卑。申度外之繾綣。言念君子。終不可諉兮。某惟滛浦。控上下流。古用武之國。陶士行庾元規諸公。藉此以鷹揚江表。虎視河洛。乃今天移福星。作鎮此土。激西江。蘇鮒轍。屹長淮而斷鯨波。作宋長城。真北平變化傑魁人也。東南金湯。施及虹翠。隸也受賜多矣。某私竊自念。贛山長谷荒。赤子龍蛇。雜襲而處。芻牧之責。大恨不任。而欲以詩書揉強暴。衣冠化刀劍。書生迂闊。而不至敗缺者。幾希。明公回首曲江。風誼一世。果不以九川四海之人例視之。則鞭辟其不迨。包蓄其未閑。如天之福也。某頓首下風。以請。馳一詞介上起居。薄采空青。以自附於潢汙。有敬之誼。犯嚴忤然。控露潦略。

某撫搖落之繽紛。泝空明而延佇。龍光射牛斗。福星出虛危。殆一夕九起也。某之爲郡。實隸照臨。月詞有典。當不懈益處。寧不嗣音。童瀆是懼。五雲九霄。凌倒景而下空同。斂爲清冰。溥爲膏雨。地雖辟絕。而天人顧復之益深。豈無他人。不如我同味。足下墳簾五老之嶙峋。襟帶九河之汗漫。要其胸中磊磊落落。倬彼雲漢。爲章于天者。曾未究也。忽而身作長城。手提半壁。嘉與一道桑麻。而菽粟之西人之子。幸則幸矣。然六轡如濡。王事一方。孰與入坐中書。經制天下。聞延和殿議。召公矣。某強顏芻牧。何補毫分。目前四境無虞。年穀粗豐。皆澄清餘潤所覃也。區區素餐。是愧。倘使者猶以故人未卽舉法。旦夕丐香火。奉輕軒。歸卽所安。徵福年盟。尙終惠之。遠道寵賚。雜還充庭。翠玉春暉。緹襲無斃。謹具劄申聞。伏觀新綸。專容郵賀。

與廣東曹提刑

某曉挹微露。注之赫蹠。上之東壁府。昭有敬也。某惟紫微雲煙。衣被炎海。若經若緯。紛郁輪困。施及虹翠。間山媚川暉。浩蕩何極。隸也且旦稽首。欽以某官才足以截蛟刺犀。文足以鏗鯨躍鳳。力量足以扶巨鯨之最屬。東都韓呂家。聲猷奕奕。江濤如許。更當坐玉關。爲天子當一面。繡衣霄漢。尙逶迤五嶺間邪。袖青冥之鉄鉞。行黃道之星辰。方底綠綈。已落天半。某不戴五雲。奉重諼空同小院。烏鳥私情。自揣逾分。起視四境。山長谷荒。赤子龍蛇。未易帖服。越雞伏鵠卵。何以克濟。邇只臺容。如面鐵壁。某恃此無恐。郡中舊例。以八九月間。申嚴編氓出甲之禁。往往此時。兇儔陳脚已動。履霜不戒。堅冰奈何。近者妄意預行曉揭。使家至戶曉。人人知所避就。今年僥倖。梅關以南。無一草一木之驚。僕之責始塞。榜檢求教。吏師尙不彼發藥之。某比爲五羊羅僉判。拜書強聒。持寸莛。撞巨鍾。多見其不知量。飛剡公車。不俟終日。明公有意天下士如此。感拜盛心。謹馳一价。脩詞節下。謝已往而祈方來。疊疊如也。東望芙蓉。玉立萬仞。伏諸神馳。

回汀州陳守

某惟自古民流爲盜。有受病淺者。有受病深者。淺者調其血氣。時其餒飼。不待針艾。而病已除。昔之人有行之者。龔少卿施於漢之渤海是已。深者參苓之所不能可。湯熨之所不能瘳。則大承氣湯證矣。昔之人有行之者。子太叔用於鄭之萑苻是已。今者使部弭盜一事。鯨峯先生豈弟之心。高明之識。見諸已行者。

其成效固班班著矣。賞一人而勸者百，罰一人而戒者亦百。春風之和，秋霜之栗，施及鄰境，皆有嘉賴。特在更酌其受病之淺深，而斷以行之，是殆非浮想懸度者所敢與知也。贛之爲州，雖曰以五城兵馬鈐轄繫之，銜顧建立司存本意，不過爲贛民出他境，使郡將得行通制之權，要其實則依然一列城也。若有所徵調，下郡稟承，實視朝命，謹布腹心，以謝委戒之辱，膏肓恐悚。

與趙大卿孟傅號松擊前知贛州

某汲廉泉，澡栗尾，通恣恣主書吏，昭初好也。某昨從湘花間，奉盈尺牘，一舒泄其宿昔雲龍之私。明河七襄，流麗空碧，地中之山謙，水上之風渙，十襲九緹，至今耿耿，光氣蓬萊水清淺，縹緲環佩，渴心湧泉，一日千里。某茲者，共審玉宸，渙寵金掌升班，維城維翰，維藩磐石，大宗之續，厥貢厥包，厥篚綱維，六府之司，禁籥雲開，神塗風動，伏惟慶忭，欽以某官，祥源異稟，若木殊輝，綺繡揮揚，汝陽天人之相，龍虎變化，北平魁傑之風，勞侍從而厭承明，經駘盪而出，馭娑公不淮海之薄，上爲宣室之思，玉珂金鑰之玲瓏，花綬藻衣之鳥奕，徑摩馳道，渙周卿六命之頒，不出都門，竚唐相九人之拜，某頃單車馳駒，嚙下鶴髮重重，一夕九起，效贖洗馬，歷歷陳情，君師天地之造，爲擇便州，夫子奔逸絕塵，乃使隸也，瞠若乎其後，雖鴻燕差池，不克而拜龜組，然天開百世之好，山川其忘諸，惟是求牧力綿，未知攸淑，一規一隨，賴有柯則，在我愛桐鄉，不隔風雨，肘後寵靈，不彼而惠綏之，此固憩棠中父老之所共望，賜者也，謹具劄子，申詞起居，未諸良晤。

願言金護玉持。式副前禱。應舊治要來。敢請其凡。

與前江西趙倉與樞號端齋

某澤露焚蕤。闢敬五畝花竹。下盡脫櫝。惟高明垂管。某沐膝塵。舊雨今十六七年。立冀部下風。則又六年。僕以荒落之資。踰伏於青原山中。如商鉅馳河。遠莫致之。先生如驚雲游龍。舒卷九霄。其步武不可俄度。宜乎其欲往之。而瞻望不可及也。區區九十之親。就養空同。今繡衣洛社中輩行也。間得訪問。獨樂起處。先生玩心神明之表。游日日月之上。蓄爲清氛。蒸爲非霖。一日舉而措之。沛然江河。孰能禦之。我有宗老。爲國之幹。訪于落止。以公歸兮。某半生出處。無足爲明公道。宿昔受教。所以護持其元龜者。至今不敢渝。世人自有一種毀譽。道眼自有一等高下。先生度外大觀。謂其人竟何如也。某因諗趙令君居中台之里。又出門下。值其良使。亟哀此墨。少敘戀思。臨楮馳泝。

與吉州劉守漢傳

某澤穎拔蕤。寫恣恣銅壺閣下。昭鄰好也。某日從郵置。得澣我私。盈盈一水間。鼓宮宮動。鼓角角動。精神流注。絕出翰墨町畦。芳菲菲兮。浩蕩何極。欽以某官。吐吞玉櫃之風烟。披拂青藜之光燄。卿雲甘雨。含天地之至和。古柏蒼松。炯雪霜而獨立。小駐星河之棹。頻分江國之符。春靄袴襦。神螺黼黻。雨籠絃誦。振鷺漣漪。鈍爲銛而頑爲廉。痿者膏而憤者醒。兵衛森畫戟。小宴清香。衣冠拜紫宸。佇班黃道。某宿盟園杏。又

尾朝花蒙霧一塵。稽首錫類。竭來空同。密倚五雲多處。楚波之及晉。魯柝之聞邾。川媚山暉。沐浴今雨。則所以誦信修睦者。奈何以簡陋廢采采澗蘋。以明有敬。玻璃一碧。此心俱東。

某日摩挲空翠。端飭側厘。以進之集古主書之側。蓋於門牆辱好有三焉。園杏之齊盟也。朝花之未至也。三間風雨。託於君侯之土地也。而豈但曰小國之於大國也。有交鄰之道焉。謙齋先生不以小人之美芹者爲僭。而察其明有敬之私。是能容之。其弘多矣。介使踵來。辭曰報聘。庭實維旅。芳菲彌章。是何君子施禮之周。執德之信。而僕何以當之。抑傳有云。長者賜不敢辭。取數之多。亦祇以媿。贛去吉一水三百里。而氣候風土習俗。事事不同。未春已花。才晴卽熱。山川之綢繆。人物之伉健。大槩去南漸近。得天地陽氣之偏。看來反不可以刑威懾。而可以義理動。書生出其迂闊之說。嘗試一二。觀聽之間。稍覺丕變。奉令承教於君子。尚願維今有聞。以淑厥後。廬陵之政。識與不識。皆云一佛出世。山川出雲。時雨流動。此爲霖之善者机也。民歌路謠。徹聞京師。天子明聖。恩光言遠。某雖不敏。尚能取皇甫公韻歌和之。占謝之次。寫其輪困。寧不嗣音。如此江水。

回吉州趙倅

某首春携便符歸省。道五臺下。華裾葱蒨。照我征衣。雪跨冰懸。灑灑清味。至今彷彿。霄榻間投膠沸糜。不克闕屏。星西來。以修賀上之禮。林琅金薤。忽啓虹翠。三過豈然以喜。某竝者犬齋。是試行春。畫堂開曉。袖

槐雲之五色。俎樓月之千峯。共惟歡慶某官。瑤震簫鍾。秋濤瑞錦。駕玉虹。垂蒼兕。凌紫清。而上之固其所也。鞞鞞珮璫。乃翱翔石泉松雪。間邪。輿簾簾繡。小燕屏題。方底綠緹。又看環召某視郡印十句。云云皆商燾之賜也。自省於涓曹。正負不敏。圓械鄭重。此禮奚宜至哉。鯨錦卷還。猶有餘媿。折寄芳菲。今雨何厚。頓首拜嘉。謹謝將命。尙容專致。厦成之慶。

回袁州鄒倅

朱明逾半。南薰之時。共惟襦袴行春。旌旗麗曉。有燕有翼。某對廉泉。飭側厘。東嚮以謝主書吏。某頃叨節南馳。得符歸省。三峽烟雨中。一再獲拜。瑤林瓊樹之側。疊疊吾味。我心寫兮。執祛幾何時。明月千里。惠而好我。錯落華音。下照虹翠。赤脚踏層冰。忘其執熱也。共審龜臺借重。鳳岳凝清。時雨誦絃。和風條教。伏惟歡慶某官。東山芝蘭之韻。北斗梧竹之標。朝發軔兮扶桑。夕攬轡兮玄圃。識者已竊遲之。兩樓山水。能久著神仙人邪。竚文組之卽眞。以介圭而入覲。某禊前一日。奉重闈。抵空同下。旣三閱月。公事稍清。得小遂半菽。歡錫類之餘也。實篋勤斯。芳菲襲予。新雨洒濯。感在下風。采采一芹。效賸隴寄。非所以報也。馳迺一方。

回臨江婁倅

夏鳴仲瑄。良苗懷新。共惟風月滿樓。江山入目。百神僕价。某焚蕤淪露。專謝中涓。若兩廡。氎氎。五鼎芍藥。

無庸爲仙人瀆。某於東都韓呂家。鼎鑪獨無耳乎。頃一節湘行。獲從衡陽廣文君。疊疊簷花。情味甚春容也。清江之上。頡頏飛霞。獨不得四方爲雲。追軼清絕。琳琅金薤。光墮玉虹。執熱以濯。我心寫兮。欽以某官。冰壺玉露之泠泠。瑤林瓊樹之英英。黃琮蒼璧之熒熒。上之清都。盛之紫微。便當還家。蘊本色。石泉松雪。可久爲麒麟係耶。方底綠綈。自天子所。某將指罔功。叨恩便養。空同小院。粗可從容。半菽歡皆。喬叟之賜。惟芻牧之才單。龍蛇之俗險。凜乎未知。攸濟渠渠。遠道頌不以規。旣謝下風。尙沐新雨。畫堂高處。槐桂成行。春蚓秋蛇。覺我形穢。明公不以覆瓿而顯設之。鍾軸爛然。一見頽發。謹復將命。不勝馳泝。

回隆興熊倅震龍

某撫今雨。懷清風。其契闊未有甚於此時者也。挹色絲於浦碧。追流水於爨焦。其慰浣有甚於斯乎。澹圃先生。以冰懸雪跨爲風骨。以鸞漂鳳泊爲文章。以規圓矩折爲政事。挈其堂堂。著之高處。以經緯河漢。舟楫江濤。萬夫一喙也。陳仲舉千載風流。乃獨與歲寒結印。倏靈轟颺。怒而起。有不磊磊落落者乎。時來則爲。當仁無遜。某雨別十年。無非俯仰林鳥之日。祖母行年八十有七。切切便養。承乏此來。公朝篤業。人紀之造。而諸君子錫類之餘也。第五閱朔于此。塵而入。鞅而出。於民無絲分補。行矣。丐一縷香火緣。奉輕軒以歸。疊疊襟期。明月千里。折寄芳菲。厚意不敢不拜。薄將石間一髮。非所以爲美芹也。廬陵廣文。玉曼金鏗。長沙識衡山簿。猶昂昂鷄羣之鶴。中峯有以服乎兩峯。觀者爲此膽慄。何當簪盍。上下慷慨。目送征

翰臨染馳去。

與楊縣尉如圭

某他日上下紫淦間。草木吾味。未必無解后之雅者也。廬陵少仙之庭。數有英游發軔其間。而君年又不
可及。當官風采。東西行者。輿聲誦言。知爲清修。知爲縝栗。培風怒飛。霄漢一碧。跂予望之。某誤恩便壘。夢
繞松楸間。伏戎于莽。有乘虛而干法犯禁者。霜臺遽以煩執事。知敏手爲可託也。寒泉白骨。蒙賴方新。惟
牽師從者。重愧重愧。草草持慫。高明臨染無任。

回唐書記

某一節湘行。得挹寶烟玉氣於芙蓉池淥間。輿聲吾味。歡如平生。岸花催路。吹絮滿衣。燁其五雲。落我店
月。厚意久不報。所思遠道。回首懔然。執事以瓊琚玉佩。照映東西。鸞鳳先驅。朝闥風夕玄圃。可也。赤雲瑞
氣。黃花歸期。當仁勿遜。某花朝前四日。抵雲舍。又十日。奉重闈。泝灘而上。禊前一日。抵空同。郡事稍簡。俯
仰半菽。皆齋齋賜也。江湖寥落。鴻影參差。安得素心人。相與數晨夕。每誦此詩。明發不寐。輒持只赤。小辭
我私。采采澗芹。臨風如結。

回黃強立

某薄游空同。繾綣半菽。故人知心。千里寄瑤華音。以繯藉之。讀之宛然促膝接語也。強立以排淮決漢之

胸行駕風鞭霆之氣。鑄爲雄辭。能使京師紙貴。新豐舍中。誦天下事。一日騰上。風聲千載。某來此。訟簡事稀。餘力可及。故讀四境倍稔。絕南剽之跡。皆五雲所照映也。久缺報襄。輒郵專筒。薄將聊奉一笑。

回文教名寶

某久後亢宗。無從通譜。璧弟幸托年盟。雲杏集中。不知曾得納拜否。己巳之歲。千騎過廬陵。有意來山中。時某適赴鶴書。取愧薛荔。失此交情。悵然一方之感。書來空同。陳誼天出。欲往從之。湘水深。令人聲聲。柳子厚謂南方之靈。鍾而爲石。故有多石少人之論。某常以爲未也。地氣自北而南。古有斯語。意者人物之數。斯文之運。亦莫不然。玉簪羅帶之勝。中州山川。所未有也。磅礴鬱積。而振發之。以其時可矣。吾宗文實當之乎。令業方來。雲湧川至。樹之風聲。快靚皦皦。某半生落魄。無足爲宗盟道。去年單車馳响。下堂有重慈。白雲間之陳情。至於一再。遂授今壘。闔門就祿。賣出過數。力綿求牧。未知何方。宗丈宦遊海外。坐隔一關。一介相先。是不以他人待同姓者。委貺所及。拜而受之。薄物非所以報。何當嗣音。

與胡節推幼黃

某他日盤之中。辱玉山朗然照之。舉帆凌斗牛。掛席拾海月。已占吾成玉堂堂於此時矣。空同落葉間。快讀千佛。喜見榜花。雙峯巽山。嶙峋蒼翠。布濩轆轤。何盛大如之。國家三百年。代有英傑。樹之風聲。五緯聚奎之符。彪炳未已。滅沒草根者。固復何限。吾成玉一大振起之。青原剗空。忠節生氣。是則草木同味也。陰

計書繡娛雙親時某當以奉祠歸里尚從鄉稚耆候馬首遮慶茲襃赫蹠寫此茂悅聲塵薄將祇瀆

繳奏藁上中書札子時吳履齋當國

某惟軍國萬微日至黃閣不敢爲竿櫓區區懼瀆威峻惟鈞宥是祈某頃罹人子之厄曾拜仁人親親之恩感激榮光永矢無斃不自意今春伏遇先生袞繡來歸爲國柱石遂得密邇陶鈞以庶幾一日履屐之役幸甚莫大先生當國以來上迎聖主悔悟之機下慰蒼生蘇息之望所謂垂紳不動聲色而措天下於泰山之安先生有焉乃一日伏讀明詔許中外臣庶得實封言事皇心光明言路軒豁恭惟啓沃至深也某私念今事變至此衝決橫潰使宗社有不測之憂者誰實爲之病根在內膠結不去終不可以爲國是以積忱具書先陳其愚慮之一而痛哭流涕終之人非不知愛身何苦如此冒死今日之事急矣懼其至於一旦則亦不免於死也惟是言輒如毛懼不足以感悟天聽尚賴先生狗通國之心出回天之力以措世道於清夷光晏之域某九殞無悔謹繳奏藁具申伏惟鈞慈俯賜鑒察

賀簽書樞密江端明古心

某夏五之月伏從下土切聽朝命共惟天子蒐選洪儒布滿侍從而先生以海內達尊居然冠文昌之首僕自惟念正人登崇天下誠幸誠賀不敢以草野自疎輒奉狀以爲斯人之慶記史登錄及徹巖視私心欣喜莫可涯涘山澤深遠與廊廟本不相接一日閭巷風傳歡吹則謂先生以某日踐政地參樞筦主上

文山先生全集 卷之六

二〇九

聖明君子終爲大用。莫不舉手加額。以爲共相天子。活百姓。遂在旦夕。以一方椎而放諸。知權欣交通。人情莫不皆然。人望有所宗。而斯民之譽。猶出於直道。僕爲之舞之蹈之。中夜以思。不能成寐。夫以穹壤之大。人倫之衆。而先生之進。大夫士庶民。皆欣欣然相告。如其父兄親屬之得用。將有所利賴於己者。此其心豈千金之所得。而家至戶曉。所能同哉。我朝先正。得此氣象。惟前有范文正。後有司馬公。范自諫府以來。以言事傾動中外。後來出帥西邊。入班兩地。岩穴之士。慕下風而望餘光。蓋皆延頸企踵。以庶幾其一日之爲相。司馬居洛中十餘年。當時兒童婦女。識與不識。競曰司馬相公。元祐初。衛士之感泣。都人之遮留。其所由來者漸矣。非一朝一夕之故也。范公得經世之望。司馬公得救民之望。嘗恨士大夫所以積望於平日。得望於當時。蓋幾世幾年而後得此。二公有以厭服天下之心口。聳動時人之耳目。而范公不及用。司馬公不及盡用。天之未欲平治天下。其如之何哉。今先生早以言語妙天下。中以政事動中朝。後以氣槩風度。上結人主之知。而下爲四海所傾慕。則先生都范馬之望於一身。蓋二公之後。又凡幾世幾年。而後得此。天下之所以責望於先生者。豈與佗佗睨睨。笑與秩終。而甘同草木俱腐者。同日而語哉。方今西有叛將。東有逆離。而江淮與強敵爲鄰。強兵富財之道。無所於講。主上不得怡。宰相以爲憂。其顯證莫過於此。而學士大夫。私相擬議。痛心疾首。以爲方來無窮之變。伏於不足慮之中。而發於不測而不可禁者。其幾尤切凜凜。天下無事。則代天理物之地。猶可從事於牽補架漏。以庶幾不至於敗缺。不幸槍攘

憂危之間。倘非碩德重名。積孚於人心。一日舉之。以從民望。則鎮服危疑。收拾渙散。精神氣勢。未能一旦動天下之聽也。今當揆身定大亂。奠安方極。不敢自以爲功。而方嘉與天下之賢者。共圖久安長治之策。先生從容於廟朝。訐謔於帷幄。則當揆所以隆體貌。敷腹心。未能或之先也。鄧侯所以舉代於平陽。茂弘所以深器於安石。其爲天下國家計者甚悉。豈曰身爲功業而已哉。則夫先生之一身。其關繫於方來之世道。誠重大。大而閭閻之內。父子骨肉。私憂過計。以爲脫有倉卒。則所以寄命而幸全者。非先生疇依然。則先生之望。近世以來。絕無而僅有者。將范馬不及爲之事。先生將來。雖欲逃之而不爲。其亦何辭以謝天地神人之所期哉。僕鄙野無足道。又執方不通於世。修門之書。每視以爲甚重。而未敢輒發。其於先生。獨亶亶不倦。自天下之公爲言。則僕之喜談樂道。與人情若不相遠。自一身之私而言。則僕誠何人。而辱先生特達之知。此其所以伸紙行墨。樂爲四海誦其情。而不自覺其僭且瀆也。伏惟先生少垂察焉。某仰惟三台熒煌之精。藐在雲漢。下土之人。夜詹額頌。曾無羽翰。可飛筵於經天光耀之側。間者不揆。雖荒繆之筆墨。時得以上登涓史。而觀道德。聽教誨。自謂未有疇昔。則左右亦以其人爲何如。先生度越常情。嘉惠後學。采於窮約之素。以爲可進而教之。廬陵之士。凡來謁先生者。未嘗不深念其姓名。至於造化人物之地。先生所以提撕薦進。使之得以齒下士於朝。則既有日矣。乃者。祕府之命。從天而下。空山不穎之蹤跡。一日有聞於人。自宰相鈞陶而言。曾無所偏私。而某心口相謂。山澤之人。何以及此。是蓋有所從。

來而不敢忘也。當秦之世，必有均調皇極之輔，深思遠計，周及人物，雖遐遠僻陋，如不肖，亦使之無所曠棄。九二曰：不遐遺，得向于中行。今當揆以之秦之未成也，必有一陽爲之先，而後衆陽之氣類隨其汲引以進。今正人滿朝，大抵以先生爲朋來之倡。至於晚陋，亦得依乘以前。初九曰：拔茅茹，以其彙。征，先生當之。屯之六二曰：匪寇婚媾，女子貞不字，十年乃字。二嫌於初，不願爲應，徘徊不字。至於十年，某雖不足語此，願惟刼而從之者衆矣。蓋至今日，得先生爲之宗主，奉命驅馳，惟此時爲然。某他無能爲役，至於守其本心，不與流俗爲軒輊，以求上不負知己，下不負嵬瑣之所存，則或可無愧怍於此。尙惟先生終數之，某欽惟新命，亟應祇赴，願以未服外庸，不敢卽造朝班，區區欲俟宮觀兩考批滿日，徐拜恩渥。蓋已顛狀控於朝矣。諒先生當許可之。遙睇清崇，未卽詹侍，輒奉狀臨拜懇悃。

與前人時以前宰相帥湖南回

某半生出門下，幸甚。乃從湖南，以一節奔走闔部。去年此時，拜長沙壽星，甫償分願，潭衡相望，郵置信宿，奉令承教，王事一家，以父兄師弟子之情，而行於連率方伯之際。湘人或云：前未見此比，而某也。受賜爲不貲矣。先生之入湘也，某後三數日而來。先生之出湘也，某後三數日而去。何其步亦步，而趨亦趨也。譬弟於臨江候迓使舡，獨蒙一再予進，所以愛之誨之，不令兄弟無間然者，曾不自意。先生及豐城以下，乃有門內之戚，盛德大業，如山如河，存神過化之學，先生其講之也孰矣。某所得郡，去家一篋，而近奉八十

七之祖母與老母俱闔門長幼無慮二百指悉從官居糜費俸粟是皆公朝錫類之造郡事頗簡四方無竊發之告日來風雨亦似調順使苟祿之日得免曠懷非大播之賜而誰賜秦孟四者久焉逋誅湖湘未了公事殊切介介比日來連得舊同官書閻計議駐兵永明誘孟四而生獲之爲廣兵所奪尋且告斃經司取其屍寸斬以謝兩路先是田定二據平原秦小九據鹽田爲秦孟四聲援引孟四以屠永明正田定二之爲也柯倅權全州首禽二兇磔於市自二兇死而孟四遂不能免先生一番出師其終條理如此孟四不死非但遺患南方其於根本關繫甚不細且得竣事功之在彼在此無足計也蕭獻可失其令嗣如塤廬陵生此士有數可爲痛惜詹望泰階中夕九起薄言傾寫有懷忡忡伏乞鈞照

與吉守李寺丞芾號肯齋

某居廬陵南陬蓋受塵之最遠者也其於當世人物無所交際惟從田間側聽輿論則天下伯淳雖隔在僻遠烏得不聞風稽首吾州自前守去後無主宰幾一年舞鱗號狐郡政泥濁斯人無辜亦云甚矣執事不鄙下士惠然此來天開日明是在今日某實爲鄉國稱慶仰藉喬雲在上區區非才叨恩入館極知負乘月朔嘗造州關印申免時聞千騎且入關某遂止旅間伺候攀迓前茅繼聞少展適頭目受病旋暈不可耐不得已載舟兼輿以歸相距兩月交臂失之不敏之咎其當何如方僥倖平復造謁以敘悃悞顛駛及門寵授翰墨山林疎賤之人乃得殊禮郡大夫之德爲不可及而某缺典之愧益加多矣祇誦來辱避

席再拜。有懷輪困。具嚴初積。謹具劄子。繳申職事之記。所有台翰。謹謹歸壁。示不敢當也。修有草率。顯圖侍見以謝。

回廣東曹提刑

伏以炎日正夏。薰風自南。共惟某官。玉節霄明。華絲雲度。穆清簡炷。交壤萊扶。台候動止。曼福。某淪穎廉清。通箋奎碧。惠徼書月。卻立下風。某遙企芙蓉。上插牛斗。儼繡衣之持斧。而孺靡以爲糧。弘鋪太和。勿問元吉。某欽以某官。簫鍾鏗夏。玉尺端方。慮阜青蒼。毓白石清泉之勝。北斗魁傑。挺碧梧翠竹之標。或弭節於人間。或影纓於帝所。旣盤礴而鬱積。復周遊以逍遙。流水青山。奪司馬尋春之志。荒崖絕島。行濂溪流物之心。欽哉。刑之恤哉。使也。言有先也。樓臺映白日。絲轡小馳。衣冠拜紫宸。綸音過下。某起觀宣夜。跋敬明河。方闊焉北樹之題。乃贈以南金之寵。跫然三復。愧此七襄。某頃綴楚軺。每懷綿未。賤天從欲。回叩坂之車。便地養親。得江南之舍。永惟錫類。不隔善鄰。璧積阻心。熒煌在目。某袖分蕤露。才劣錦雲。雜下俚於九成。發宗工之一莞。險瞻蓬翠。工輯蕊珠。冰桃碧藕之清涼。福英祿華之郁穆。臺容所戒。鞭影是趨。

回陳侍郎

某伏以回車叩坂。請自效於林鳥。得郡江南。取已捐之竹馬。綢繆錦覆。緹襲袞華。共惟某官。麾斥八極。之風雷。卷懷九天之星斗。古靈袖中之藁。屢薦時賢。溫公洛下之評。不遺人物。遂使忝求芻之寄。從而諧啜。

菽之私。某半竹奚堪。儂花甚寵。想五畝青山之樂。願請訂金。懷四愁明月之詩。曷酬贈璧。謹具劄子申謝。伏乞台照。

與湖南交代廖提刑

某汲瀛香。裹側厘。齋恣恣于主進吏。昭交好也。首祈紆省。茲者。伏審濡絲星轡。弭節霜臺。紫蓋撐空。開雲烟之五色。繡衣立漢。灑冰雪於九州。號令一新。江山胥動。共惟某官。金井玉淵之丰度。簫鍾瑤篴之聲名。老氣崢嶸。吐驚頭之山碧。清流瀉。貫龍影之潭星。凡踐敷中外以來。皆推行忠恕之學。惟刀劍狃楚氛之惡。賴旌旗指漢坂而驅于疆。于理于南。來宣王命。其刑其罰。其審曰。惟民中汲湘水而滌瘡。瘡。裕衡雲而燭幽枉。禮樂遣使臣也。於昭原隰之光。袞綉歸我公兮。邁任朝廷之重。某頃從岫。下一拜狀。後繼得旨。以臬事屬之。宋使君某。遂於正月末。解維而西。先花朝之四日。抵雲舍。禊前。奉重闈。至空同上。俯仰半菽。皆喬霽賜也。第念夙緣結習。實開衣冠百世之好。乃不克迎拜馬前。面奉龜組。江海契闊。有足念者。近得之東西行人。始知歡節前。玉節道盱境。以時考之。此際久建牙。楚觀上矣。某不勝爲湖南一道賀。舞後木人。蕭然音節。納之錦覆。過者化之。亦以自賀也。某春杪得府第所遣答書。仰佩篤敘。數月念念。嗣音相望。次寥。遂坐不敏。茲想築臺有俶。謹跽下風。傾此篋積。臨拜無任馳泝之至。伏乞台照。

與前浙西安撫李大卿號肯齋

某頃從湘花間解維而西也。故人意厚。棹酒壺三十里而飲餞之。風飄飄兮吹衣。芳菲菲兮襲予。啁噓篤綴。一何勤也。回首江空。明月千里。因念向留楚觀。望午橋鍾鼓。不隔簷陰。從容玉塵。曾不能以數數。矧今去之。汀洲杜若。開蓬弱三萬。不翅明河在天。瞻仰夙夜。如此悵結何。某共以某官懸黎垂棘。瑤簾簫鍾。崢冰雪。走雷霆。精神麾乎八極。潤金石。諧韶濩。文采被乎五音。維今江濤正須人物。外之而北門筦鑰。內之而西府樞機。竄惟老成。具有經濟。青山五畝。未容寄傲之深。黃道九天。佇看傳呼之近。某丕承喬燾。先花朝之四日。抵雲舍。又十日。奉重闈。沂灘而上。禊前抵郡邸。賤事乍入沸糜。不免轆轤。既三閱月。遂就簡平。親老安健如常。半菽俯仰。皆錫類之及。惟起視四境。長山谷荒。赤子龍蛇。未易帖服。商鉅馳河。凜乎其未濟。教思無窮。惟勿替宿昔。重訓飭之。秦寇一段。某未了事而去。日夜念此。半年師旅。數州杼柚爲空。疽根仍存。憂曷有極。今聞罪人斯得。黨類悉就殲夷。我愛桐鄉。屐齒爲折。顧撫摩凋瘵。鎮定危疑。湖嶺間方來正欠工夫耳。洛中花竹平安。悠然長思。當必及之。某數月念念。專曩上起居。及今方走一介。不敏甚矣。未繇佳晤。暑氣方殷。願言金護玉持。以副蒼生之望。孤臺有委。一唯鞭影所向。某臨風馳泝之至。

與劉吉州漢傳

某介恃薄雲之誼。忘其爲瀆。僭有願陳。吾鄉歐陽巽齋先生。講學天出。從游滿門。登科三十年。獨處環堵。晚見召擢。一再登朝。先生居之淡如也。其修於家。終日清言。接引後進。未嘗爲擔石謀。捐館之日。橐無贏

賁諸生爲集喪事。悠悠人生。惟死乃見眞實。嗚呼。先生之風。可使懦夫立也。其子浚。字資深。世先生之學。頽然布衣。禁路諸公。每以鄉先生歿而無澤爲闕典。有欲從化地言者。人情好德。信不相遠。先生不以貨財遺其子。而資深亦復能守拙甘貧。酷與乃翁相似。區區謂文獻所屬。吾輩當相與輔成之。大監樂善若不及。又於巽齋爲庚年同朝。儻念其孤。時分廩俸。月償送之。使先生有子。不至乏絕。非惟使爲善者知勸。而名公念舊下士之盛心。所風厲遠矣。某旦夕亦謀具辭幣。聘資深至郡齋。庶幾前輩之典刑。斯文之宿昔。念同志孰有如門牆者。故輒以書至焉。當暑案聽。慚汗瀋流。伏乞台照。

回兩淮制使李端明庭芝

伏惟龍虎魁傑。手提鐵鉞。重鎮東郊。淮山崇崇。江水不波。施於南土。隸也。踧敬階符。等威有截。不圖親灑。袞翰。賁之榮光。下士伏讀感激。某仰承寵戒。信豐趙宰。真古大臣。勤小之威心。趙於某同年。宿相厚。今又得以郡邑。聯好人事。結習非偶然。矧知出自晉公門下。他日稱吾榜得人。有所受之矣。謹具劄子。百拜控謝。藁稽萬罪。伏乞鈞照。

回岳縣尉

惟中興之初。先武穆王。手扶天戈。忠義與日月爭光。名在旂常。功在社稷。天報勳勞。克昌厥後。雖百世可知也。縣尉生北平龍虎家。而又偉然植立。誰不知敬。幸出結習。乃託一日之嘗僚。判論批曆。亦旣欽承。遠

昇鱗緘爲禮過矣。

與洪端明雲巖名齋

去歲在湘中。專人詣越拜起居。過沐報教。以門牆一介之舊。撫問所及。勿替引之。相望廓寥。感戴不可言。喻繼閱邸狀。欣審端殿陞班。安車就第。于疆于理。既了旬宣。某水某丘。逕歸遊釣。共惟驩慶。欽以某官。中朝耆舊。前輩典刑。早歲驅馳。持國子華之並出。晚年脫灑。盤洲野處之所無。今世浮沉畏途。不知止足者。勿論。固有掛冠請老。欲一日婆娑里門。而不可得者。先生袖手版。還丞相。天目山中。逍遙野服。獨立於得喪寵辱之表。真人哉。左轄頻虛。上方側席。只恐禁中。朝出傳宣。天使夕至。未容公久作碧山學士耳。某堂有重慈。今年八十有七。昨者將指而出。牽於行路。鶴髮不容迎養。歲晚力扣化地。乃昇麾章。貢家園相去三百里。一箬可杭。闔門二百指。皆仰祿焉。此先生喬雲所覃。某到郡後。頗與郡人相安。日來四境無虞。早收中熟。覺風雨如期。晚稻亦可望。惟是力綿求牧。來日方長。凜乎淑後。先生襦袴舊譜。出其一二以惠綏之。蒙戴而行。敢不知賜。某於左右。缺禮久矣。謹寅奉赤紙。申綠野平安之問。采采澗芹。犯巖悚仄。未卜聞侍。願言觀頤。視履益扶神明。以慰中外屬望。臨風拳拳。

與贛州屬縣宰

顯有公稟。保伍本領在於隅圍。比者。郡家稟使者之命。欲於十縣從新整刷一番。見之公文。固已詳盡。所

謂差過隅團。蓋所在積弊。有公差者。有買充者。正在賢令尹用其明焉。可因者。因可革者。革按之舊籍。參之僉言。一日而可決也。使者屢問及此。卻望辦以敏手。月未如期。申來隅團。定則保伍。周保伍。周則盜賊弭。郡之所以蒙成也。而縣亦職有利焉。申嚴出甲榜。比想皆已家。至今有賞罰鏤榜。煩更徧揭。

回袁永州

某引首三吾。環清匯碧。神仙人居之。坐隔千里。方嘆衡雁之參差。緹騎秋風。落我虹翠。豈然瑤華音之在耳也。共惟某官。以羔羊素絲爲節槩。以清霜紫電爲精神。以布帛菽粟爲政事。自擁千車。來照二水。發舒家學。一二便足以破奸膽。甦民氣。期月而可。百廢具興。萬石山中。遂爲古潁川渤海郡。真刺史敏手也。清廟訪落。諸侯來朝。風聲堂堂。歸植千載。某承乏便州。僥倖娛恃。庭空無事。年穀粗登。凡前此龍蛇之淵。皆屏跡絕影。要是奉教宿昔。陰有以惠利之。然親意亦復念家。旦夕皈命香火。歸哺山之南。水之北矣。遠道寄將。有實其庭。吾味之厚。不翅懷連城而佩明月也。臨風慷慨。亟此馳謝。尙猷緝繭。申候起居。伏乞台照。

賀京尹曾尙書

某茲者共審露綸渙渥。星履陸華。東澗西瀍。冠十連之元帥。南昌北斗。表六典之地官。丹屏雲開。紅牙日麗。共惟某官。依乘日月。吞吐江湖。直氣摩空。金天晶之錯落。清規照世。玉井水之紺寒。自噦噦於鸞聲。遄峨峨乎豸角。文章大手。南豐先生。政事十條。小范老子。出袖摩霜之鉞。坐吟卷雨之簾。真侍從。歸拜於甘。

泉慈父母來臨於京兆。乃由太一徑陟文昌。冰懸雪夸而朝望兮。日暖潮平而民氣悅。儼衣冠於建禮。益鎮千筦。籌帷幄於延和。遄歸兩地。某喜傳除綽。阻趁賀綦。五緯明霄。望龍泉之秋色。九河流潤。懷虹翠之春暉。謹具劄子申賀。伏乞台照。

回曾知縣晞顏號東軒後除御史

某去秋知紫氣飛度雁峯。法不得相候。西風徹棘。新雨來車。知必不我遐棄也。未幾喜開玉垣。飛檄榮甚。錦歸交臂參差。殊重回首。今年出湘之日。乃千騎載入湘之時。又不得相隨。雞豚社中。一數契闊相隔。耿耿心知。不圖帳犀。遠持五雲。下賁虹翠。筆墨淋漓。起敬英妙。而縹藉所及。不敢當。不敢當。某堂有重慈。自高安歸後。十年不克迎侍。昨歲叨節。本不能出。請祠不獲命。姑以單騎驅馳。非其欲也。轆轤白雲。情表連上。君師天地之造。畀之便州。非徼福隸遺。端不及此。千里遠將。折寄何厚。衣被重襲。其宏多矣。乍理糜沸。稟對臬宴。薄附芹心。非所以爲報也。蓬萊玉雪。小置之松竹間。會有新綸。倚布婁賀。

回曾連推宗甫名尹

某淪穎廉清。起而謝所蒙。東嚮輿輿。一拜幾何年。西方美人。豈不夙夜。飛鴻踏雪。閱其廓寥。去年漫浪行湘。於東軒公甚相厚。竭來八境。又日從巖山先生遊。獨於吾秦宇。何其闊如也。春榜旣開。聞謝家鳳毛。世科盛事。芙渠勝處。僅隔庾梅。每念璧牋。寫此篋積。乍入沸麩中。墮此不敏。而琳琅金薤。卷五仙雲氣下之。

言念知心喜而不寐。吾泰字以乾坤清氣。晶晶銀河。朝發輞兮咸池。曠曝鱗於沃焦。以其時可矣。河陽幕中。雲飛川泳。老子倚胡床。誇有此客。佇由黃金臺。徑上清瑣闥。某單車馳响。樓下十閱月。太行白雲。繚繞清夢。陳情一再。天高聽下。畀以便符。奉重闈。抵空同。三見萸莢矣。郡稍簡靜。得遂半菽歡。皆錫類所及也。渠渠然頌不以規。望塵辟易。芳菲遠道。第懷我私。聞車馬行色。且旦夕出領。某倘未以罪去。得握手道舊。豈不快哉。占謝絕如。馳遡一碧。

回李本中

某一節稍疎。聞問千里相望。方賦所思。得手書讀之。展轉情話。慰此契闊。某數年以兒女講授。爲琴書累。發初啓蔽。作成方來。三世交遊。此意不敢忘去。區區出山。親老不任行役。雲龍隔絕。不得日奉從容。本中獨處寒齋。覺戶外屢不至。靜中倍有方冊工夫。然門可張羅。庖隸自放。所以奉師者。必甚鹵缺。負愧奈何。諭及小子年漸長。當學聲律。尤認真至。第此兒自以爲得師。甚欲從師學而學焉。又念吾先人以賦起門。重於改作。貪賢且奈何。今姑尊來教。擇賦師爲代。但未知來年有意他出否。倘有圖回。某雖江湖懸隔。豈無可效綿者。拳拳此衷。亦以屬之新昌弟。唯命東西矣。敬憑使稟控。別牋薄物。少寄芹私。令祖困學老先。生貧候多福。侍邊乞道起居。

回長沙傅縣尉合

某他日接玉泉於涓涓中去之十年。君且撫汗漫神變化而爲龍已。高言軋霄。自當向上位置。需雲岳翠。不淹騰蹕乎。豸府知心。貽書道君出處之槩。廣文又緹襲琳琅以來。目中將快見縉之好也。敢不預戒行窩。汛掃以俟。雖然。落木荒涼之境。飄風瀟蕩之蹤。以君堂堂發軔。而肯相從於庖俎間。此意携持琬琰者。不屑也。吾意不薄。惟君熟裁之。持對不敏。切惟照寬。